

Tyiño Cha Casacuvī Ra Apóstol: Ra Cha Tyatyíño Ra Jesucristo Chi

Nu catyí ra Jesús tyi
cuaquichi Tatyí Ii Nyoo

1 Yoho Teófilo, yuhu ra Lucas sacuhjñ tutu chuun quivi cuan. Ta nu sacuhjñ tutu cha xihna ri cuan, tyaj tandihi cha quichahā sacuvi ra Jesús ta tandihi cha sañahā ra nya quivi xihna ri ²ta nya quivi nandaā xica ra andivi. Ta cha cumañi ca nandaā ra andivi, nacachi ra chi ra apóstol cuenda ra. Ta tyatyíño ra chi ra chihin Tatyí Ii Nyoo tyi cacaca ra tyiño ra. ³Ta maa ra Jesús nyehe ra tindoho ta chihī ra. Ta cha yahā cuan, nandoto ra ta tuvī ra nu canyicú ra apóstol. Ta chichi cha uvi xico quivi, cuaha xaan chaha tuvī ra nu canyicú ra, vatyí na cacoto ra vatyí ndicha cha nyitó ra. Ta cahan ra tuhun yoso caa nyacá ñaha Nyoo chi yo.

⁴Cuhva cha nyaá ca ra chihin ra, ra Jesús catyí ra chi ra:

—Ma quita ndo Jerusalén ihya, nyacua nya naquehen ndo Tatyí Ii cha catyí Suti tyi cuhva ra chi ndo, tari catyí chi ndo quivi cuan.

⁵Chihin ndutya sacondutya ra Juan chi ñáyivi. Soco nyoho ña cuaha ca quivi ta cucondutya ndo chihin Tatyí Ii —catyí ra Jesús.

Nu nandaā xica ra Jesús andivi

⁶Cuhva cha canyicú ra apóstol iin ri chihin ra Jesús, ta candaā tuhun ra chi ra:

—Sutu Mañi yuhu, ¿atu vityin ri cusacacun chi ñuu yo Israel ihya ndaha ra ñuu Roma? —catyí ra.

⁷Ta nacahan ra Jesús ta catyí ra: —Ña tahan chi coto nyoho nya quivi. Noo tuhun ri maa Nyoo Sutu yo cuacatyí ra ama. ⁸Soco cuhva cha quichi Tatyí Ii siqui ndo cunaquehen ndo tunyee iñi, ta cuquita ndo vatyí cahan ndo tuhun Jerusalén ihya ta tandihi ñuu cha nyicú Judea ta Samaria, ta nicahnu ñuhu ñayivi.

⁹Ta cha yahā cha catyí ra Jesús tuhun ihya, ta cha ni ri ca cha canyehé ra chi ra, nandaā xica ra andivi, ta quihvi ra chichi noo vico. Ta ña canyehé ca ra chi ra. ¹⁰Ta cuhva cha canyehé ndaa ra andivi, ta tuvī uvi tahan ángel yatyin nu canyicú ra. Ñihnó ra sahma cuichin. ¹¹Ta cacatyí ra cuan chi ra:

—Nyoho ra Galilea, ¿ñáá tuhun cha ndoō ndo nyehé ndaa ndo andivi? Suri maa ra Jesús cha nyehe ndo nandaā xica ihya, tyehe caa cuquichi tucu ra inga chaha.

**Nu canacachí ra apóstol
chi ra Matías vatyí ndihvi
ra tyiño nuu ra Judas**

¹²Tyicuan ta quitā coyo ra apóstol nu chinyicu ra yucu nu iyó yutun olivo cuan. Ta cuanuhú coyo ra ñuu Jerusalén. Ta yatyin ri nyaá ñuu cuan, tari sava hora ri. Ta sava ri hora cuví caca ñáyivi quivi nyitatú ñu, vatyí tyicuan caa catyí ley cha tyaa ra Moisés. ¹³Cuhva cha nachaa coyo ra Jerusalén cuan, candaa ra nu cu uvi piso noo vehe nu ca iyó ra. Ta tandihi ra cuan, ican ra cuví, ra Pedro, ra Jacobo, ra Juan, ra Andrés, ra Felipe, ra Tomás, ra Bartolomé, ra Mateo, ra Jacobo sehe ra Alfeo, ta ra Simón cuenda ra cacuñi naquiqui siqui gobiernu Roma, ta ra Judas yañi ra Jacobo. ¹⁴Ta nyita ri ndu iin ri ra ta iin ri cuhva cachicá xiñi ra ta cachicán tahvi ra chi Nyoo. Ta nyicú tucu yañi ra Jesús ta cu María sihi ra, ta inga ñusihí ñandihí.

¹⁵Tari noo ciento oco ñáyivi ndu iin ri ñu quivi cuan. Ta nicuinanyaa ra Pedro. Ta catyí ra chi ñu:

¹⁶—Nyoho yañi, cuñi chi cha cuví tari cuhva catyí nu tutu Nyoo. Vatyí cahañ Tatyí Ii chihin yuhu ra David yoso caa cucuhva cuenda ra Judas chi ra Jesús chi ra xaan iñi chi ra. ¹⁷Ta ra Judas cuví ra noo ra chindihí chihin yo. Ta iin ri chica ra tyiño Sutu Mañi yo chihin yo. ¹⁸Soco chahañ ra, ta sata ra noo ñuhú chihin xuhun cha ñihí ra cha chahañ cuenda ra chi ra Jesús. Yaha cuan ta canacava ra chihin xiñi ra, ta ndata chichi ra ta quitā tandihí chiti yihvi ra. ¹⁹Ta quivi cha cachito

ñu ca iyó Jerusalén ihya cha chihí ra, casacunañi ñu chi ñuhu cuan Acéldama. Ta cha chihin sahan maa ñu cuñi chi catyí Nu Catuvi Niñi.

²⁰Vatyí nu libru Salmo catyí chi tuhun ra Judas tyehe caa:

Na ndoo maa ri maa vehe ra.

Ta yori coo chichi.

Ta catyí tucu chi:

Inga ra cunanduvi tyiño nuu ra.

²¹⁻²²Ta vityin nyicú ra cachica noo chihin yo quivi chinyaa Sutu Mañi yo Jesús chihin yo; nya quivi sacondutyā ra Juan chi ra, ta nya quivi nandaa xica ra andivi. Ta vityin cuñi chi cha ndu iin ri noo ra chihin yo, vatyí cuvi ra cha ndaa cha cuenda cha nandoto ra Cristo —catyí ra Pedro.

²³Tyicuan ta cacana ra chi uvi tahan ra, chi ra José cha nañi Barsabás, ta suri nañi tucu ra Justo; ta cacana tucu ra chi ra Matías.

²⁴Ta cachican tahvi ra tyehe caa:

—Sutu Mañi yuhu, yoho chitón cha caa añañi tandihí ndi. Sañaha chi ndi chichi cha uvi tahan ra ihya, nya ra cha nacachi maun, ²⁵vatyí sacuvi ra tyiño cha sacuna ra Judas cha cuenda cuatyí ra, ta cuahañ ra nu tahan chi cuhun ra —cacatyí ra, chicán tahvi ra.

²⁶Tyicuan ta cachahañ ra noo sihva, tacuhva nyehe ra nya ra tahan chi chi ra Matías. Ta yucuan cuví nu ndu iin ri ra chihin ndi uchi iin apóstol.

Nu chañ Tatyí Ii

2 Ta iin ri nyicú ñáyivi yihí cuenda ra Jesús ta chañ quivi vico Pentecostés cha sanducahnú

ñáyivi Israel. Ta iin ri cuhva chicá xihí ñu. ²Ta sana iñi ñu ta nacuiñi ñu noo cha cayu vachi ityi andivi. Tari cha cayu yahá noo tatyí ñihi. Ta iyo cuví tandihí chichí vehe nu canyicú ñu. ³Tyicuan ta tuví tari yaa ñuhu quití cuatyí siqui noo noo ñu. ⁴Ta tandihí ñu chitu ñu chihin Tatyí Ii. Ta quichahá cahan ñu inga sahan yoso cuhva saquehen ityi maa Tatyí Ii chi ñu.

⁵Ta quivi cuan cuaha xaan ra Israel ra vaha chicá chihin Nyoo canyicú ra ñuu Jerusalén cuan. Cuaha xaan ra ca iyó inga ityi nicahnu siqui ñuhú ñáyivi chaꝥ coyo vatyí casanducahnu ra vico Pentecostés. ⁶Ta cha cachiñi ra cuan cha iyo xaan cuví nu canyicú ñu, ta cuahan coyo ra ta nataꝥa ra yatyin ri nu nyicú ñu. Ta ña cutuñí iñi ra ñáá cha cuví cuan, vatyí noo noo ra cachiñí ra cahán ñu cuhva sahan cha cacahán maa ra. ⁷Iyo cuñí ra ta catyí ra chi ra tahan ra:

—¿Atu ñima ñu Galilea cuví tandihí ñu cha cahán ihya? ⁸¿Ñáá tuhun cha chiñí yo cahán ñu cuhva sahan noo noo yo? ⁹Ihya nyicú yo cha cuví yo ñu Partia, ta ñu Media, ta ñu Elam, ta ñu Mesopotamia, ta ñu Judea, ta ñu Capadocia, ta ñu Ponto, ta ñu Asia. ¹⁰Ta ñu Frigia ta ñu Panfilia, ta ñu Egipto, ta ñu iyó ityi nuu ca Cirene ityi Africa. Ta nyicú tucu ñu ñuu Roma cha iyó ñuu ihya. Ta suhva ñu cuví ñu ñu Israel nya quivi cacu ñu. Ta inga ñu cuví ñu ñáyivi nanduví cuenda ñu Israel ta nyicon ñu ley ra Moisés. ¹¹Iyó tucu ñáyivi ñuhú Creta ta ñu Arabia. Soco tandihí yo ta chiñí yo cahán ñu chihin sahan cha cahán

yo. Ta nacatyí ñu cha cahnu cha sacuví Nyoo —cacatyí ra.

¹²Tandihí ra, iyo xaan cacuñí ra, ta yihí ra ndacá tuhun ra chi tahan ra:

—¿Ñáá cha cuñí chi catyí chi tandihí tuhun ihya? —catyí ra.

¹³Soco inga ra cahán nyaa ra ta cacatyí ra vatyí cachiñí ñu.

Nu cahán noo ra Pedro nuu ñáyivi

¹⁴Tyicuan ta nicuinanyaꝥ ra Pedro chihin inga uchi iin tahan apóstol. Ta chihin cha chaa cahán ra ta catyí ra:

—Nyoho yañi, cha cuví ndo ra Israel, ta tandihí nyoho cha iyó ndo Jerusalén ihya. Coto ndo tuhun ihya. Ta cuñi vaha ndo tuhun cha cuacatyí chi ndo. ¹⁵Vatyí cuñí maa ndo tyi chiñí ndi. Soco ña chiñí ndi, vatyí ña tuhvá ñáyivi chiñi cha cuhva ihya, vatyí ni ca iin cha ñaha ri cuví. ¹⁶Soco ihya cuví tuhun cha cahán ra Joel, ra cuví profeta Nyoo ta cha naha. Vatyí catyí ra:

¹⁷Nu cuandihí ca quivi, catyí Nyoo, cusaquichi Tatyí Ii siqui tandihí ñáyivi. Ta cucahan sehe ndo cuende. Ta ra tyivaa ta ñu tyivaa cunyehe ñu cha sañaha Nyoo chi ñu. Ta ra chahnu cunyehe ra ñumahna.

¹⁸Cusaquichi Tatyí Ii siqui ñu sacuví tyiño nui. Ta cucahan ñu cuende, catyí Nyoo.

¹⁹Ta catyí ra vatyí cusañaha ra cha iyo cucuvi ityi andivi. Ta ityi nu ñuhu ñáyivi cusañaha ra seña, seña niñi, seña ñuhu, ta vico ñuhma.

²⁰Cunduñaa ñanyii. Ta yoo tari caa tyacu niñi cunanduvi.

Tyicuan caa cucuvi cha niri ca cha chaá quivi quichi Sutu Mañi yo. Ta cucuvi noo quivi cahnu vatyi cucutuñi chi yo nuu ra.

²¹ Ta tandihi ñu chicán tahvi sivi ra cucacu ñu. Tyicuan caa catyi ra Joel.

²² Cuiñi ndo nyoho ra Israel.

Cuiñi ndo tuhun cha cuacatyí ihya. Ra Jesús ra Nazaret cuví ra noo ra cha cachí Nyoo chi vatyi quichi ra nu nyicu yo. Ta chitó yo vatyi ndicha vatyi cuaha xaan cha iyo, ta cuaha xaan milagru ta seña sacuvi Nyoo nu canyicú yo cha cuenda ra Jesús. Ta nyoho chitó vaha ndo tuhun ihya. ²³ Soco quivi quehen cuenda ndo chi ra, sacuvi ndo tari cuhva tyaa maa Nyoo cuhva nyata quivi xihna ri. Vatyi chahá cuenda ndo chi ra chi ra quiñi iyó. Ta chitacaá ra chi ra nu cruzi. Ta tyicuan caa chahñi ndo chi ra.

²⁴ Soco Nyoo sanandoto ra chi ra vatyi sacacu ra chi ra ndaha tuhun chihi. Vatyi tuhun chihi ña cuví cunyaca ñaha chi ra. ²⁵ Vatyi ra David cahān ra tuhun ra Cristo ta cha naha, ta catyí ra:

Tyicuan ri nyehí chi Sutu Mañi yo ityi nui.

Maa ra nyaá iin chiyo vahi ta ñahri maa cha cuví sayuhvi chii.

²⁶ Yucuan chaha cusii xaan cuñi añime. Ta chité yaa chihin cha sii cuñi.

Ta siin ri coño ñuhi cunyatatu chi vatyi chité tyi cunandote.

²⁷ Vatyi yoho Nyoo Suti, ma sandoun añime nu nyicu ñu

chihi, ta ni ma cuhvon cha tyahyu coño ñuhi.

Vatyi sehe iun cuví chii.

²⁸ Sañahún ityi cha cuahán nu coi ñayivi chaa cha ma naa ca maa. Ta sacutún chii chihin tusii iñi vatyi nyaún chihin, catyí ra David ta cha naha.

²⁹ Nyoho yañi, chitó cachi yo vatyi ra David sutu chahnu yo chihí ra ta quihvi ra chichi ñuhu. Ta ñaña ra nyaá ca chi ihya nya vityin. ³⁰ Soco ra David cuví ra noo profeta cuenda Nyoo. Ta chitó ra vatyi Nyoo tyaa ra cuhva ta iin ri tuhun cahan ra chihin ra vatyi suri tata maa ra ican cuacacu ra Cristo. Ta ra Cristo, ican ra cunyaca ñaha. ³¹ Ta tyicuan caa ra David tari cha vatyi nyehe ra cha cuacuvi nu cuahan ca chi quivi. Ta cahan ra tuhun cha cunandoto ra Cristo. Ta catyí ra vatyi ma ndoo añima ra nu nyicu ñu chihí. Ta ni ma tyahyu coño ñuhu ra, catyí ra. ³² Ta ra Jesús ihya sanandoto Nyoo chi ra. Ta tuhun ihya tandihi maa ndi cuví ndi cha ndaa. ³³ Nyoo sacahnú ra chi ra Jesús, ta cuatyaá ra chi ra chiyo vaha ra andivi. Ta ra Jesús naquehen cuenda ra Tatyí Ii cha catyí Sutu yo Nyoo ta cha naha vatyi cuhva ra chi yo. Ta ican cuví cha chahá ra chi ndi vityin. Ican cuví nyehé ndo ta chiñi ndo. ³⁴ Vatyi ñima ra David nandaá ra andivi. Vatyi suri maa ra David cahān ra tuhun ra Jesús, ta catyí ra: Catyí Suti Nyoo chi Suti ra Cristo: “Cunyaa chiyo vahi ³⁵ cha niri ca cha caquin chi ra xaan iñi chuun chahun”, catyí

Nyoo chi ra Cristo chihin yuhu ra David.

³⁶Nyoho ta tandihí ca ñu Israel, coto vaha ndo vatyí tuhun ra Jesús ican cahín ihya. Chitacaá ndo chi ra nu cruzi. Soco Nyoo cuatyaa ra chi ra tyi cuvi ra Sutu Mañi yo, ra nyaca ñaha chi yo —catyí ra Pedro.

³⁷Cuhva cha chiñi ñu tuhun cahan ra Pedro ihya, nducuihya iñi ñu. Ta ndaca tuhun ñu chi ra Pedro ta chi tandihí ca ra apóstol, ta catyí ñu:

—Nyoho yañi, ¿yoso caa sacuvi ndi vityin? —catyí ñu chi ra.

³⁸Yucuan ta catyí ra Pedro chi ñu:

—Noo noo ndo ndu uvi iñi ndo cuatyí ndo ta nasama ndo cuhva iyó ndo nuu Nyoo. Ta condutya ndo chihin sívi ra Jesucristo. Tacuhva na saha ra ticahnu iñi cuatyí ndo. Tyicuan caa ta cua cuhva Nyoo Tatyí Ii ra chi ndo. ³⁹Vatyí cha naha catyí Nyoo vatyí cuhva ra Tatyí Ii ra chi maa ndo, ta chi sehe ndo, ta chi ñu cha cañi nyaa ñandihí. Vatyí tandihí ñu cha nacana Sutu Mañi yo Nyoo chii cucuhva ra Tatyí Ii ra chi ñu.

⁴⁰Chihin tuhun ihya ta chihin inga tuhun, ra Pedro chahá ra tuhun chi ñu ta catyí ra chi ñu:

—Nducu ndo cuhva na sacacu Nyoo chi ndo, tacuhva cuví sandoo ndo cha caa ñáyivi quiñi iyó ihya —catyí ra chi ñu.

⁴¹Tyicuan ta tandihí ñu cha natiñ cuenda tuhun cahan ra Pedro condutya ñu. Ta quita tari noo uñi mil ñu, ta ndu iñ ri ñu chihin ñu yihí cuenda ra Jesucristo. ⁴²Ta tyicuan ri ndu iñ ri tandihí ñu, ta chihin cha ñi iñi ñu tyasoho ñu

cha sañahá ra apóstol chi ñu. Ta iñ ri cuví ñu chihin tahan ñu, ta chicán tahvi ñu ta chachí ñu pan ta chihí ñu vinu vatyí nicohón iñi ñu tyi chihí ra Cristo tyiño nuu ñu.

Cuhva iyó ñu yihí cuenda Sutu Mañi yo Jesucristo quivi cuan

⁴³Ta cuaha milagru ta seña sacuvi Nyoo chihin ndaha ra apóstol. Ta tandihí maa ñáyivi iyo cuñi ñu.

⁴⁴Tandihí ñu yihí cuenda ra Cristo iñ ri cacuvi ñu chihin cha iyó chi ñu. ⁴⁵Xicó ñu cha tyayii ñu ta cha iyó chi ñu. Ta sachá ñu xuhun ñu chi tahan ñu yoso cuhva cha chiñuhú chi noo noo ñu. ⁴⁶Ndiquivi ta ndu iñ ri ñu nya vehe ñuhu cahnu. Ta ndu iñ tucu ri ñu noo noo vehe tahan ñu ta chachí ñu pan ta chihí ñu vinu. Ta iñ ri cachachí ñu chihin cha siñi cuñi añima ñu. Ta chahá ñu cha cachi tahan ñu chihin cha ñi iñi ñu. ⁴⁷Ta sacahnú ñu chi Nyoo. Ta vaha cahán tandihí ñáyivi siqui ñu. Ta tahan tahan quivi cuahan sanducuahá ca Sutu Mañi yo chi ñu cha cuahán sacacu ra.

Nu nduvahá noo ra coxo

3 Noo quivi cuahán coyo ra Pedro chihin ra Juan vehe ñuhu cahnu. Cuví chi cuhva caa uñi cha cha iñi, cuhva cha tuhvá ñáyivi Israel cachicán tahvi ñu chi Nyoo. ²Ta ndi quivi maa nyaá noo ra ndahvi, ra coxo nyata cacu, yuvehe ñuhu cahnu cuan. Vatyí chinyacá ñu chi ra na cacan ra limuxtán chi ñáyivi quihvi yuvehe cuan, ta nañi chi: Yuvehe Tyaquí. ³Tyicuan ta nanyehé ra coxo cuan chi ra Pedro ta chi ra Juan cha cuaquihvi

ra chichi vehe ñuhu cahnu. Ta chican ra noo limuxtan chi ra. ⁴Ta cananyehe ra Pedro ta ra Juan chi ra. Ta ra Pedro catyí ra chi ra:

—Nyehe chi ndi —catyí ra.

⁵Tyicuan ta quichaha nyehe ra coxo cuan chi ra. Cuñí maa ra vatyí iyó cha cuacuhva ra chi ra. ⁶Soco ra Pedro catyí ra chi ra:

—Ñahri maa xuhun cuichin ta xuhun cuan iyó chii, ta cuhve chuun. Soco nonga cha iyó chii cua cuhve chuun. Chihin sivi ra Jesucristo ra Nazaret, catyí chuun, ndicuita ta cacon —catyí ra Pedro chi ra.

⁷Tyicuan ta tiin ra Pedro ndaha chiyo vaha ra ta nacoñehe ra chi ra. Ta caa cuhva ri cuan nicoo fuerza chaha ra ta tatu chaha ra. ⁸Tyicuan ta ra coxo cuan ndava ra noo, ta nicuinanya ra. Ta quichaha chica ra. Ta quihvi ra chihin ra chichi vehe ñuhu. Ta chicá ra. Ta cañá ndava ra. Ta sacahnú ra chi Nyoo. ⁹Tandíhi ñáyivi nyehe ñu chicá ra ta sacahnú ra chi Nyoo. ¹⁰Ta iyo xaan cuñí ñu ta yuhví ñu cha cuenda cha nduvaha ra cuan. Vatyí nichón nu ñu chi ra. Ta chitó ñu vatyí suri maa ra cuví cha tuhva chinya Yuvehe Tyaquí cuan chican ra limuxtan.

**Nu cahán noo ra Pedro tuhun
ra Cristo nuu ñáyivi nu cuví
corredor ra Salomón**

¹¹Ra coxo cha nduvaha cuan, ña sañá maa ra chi ra Pedro ta ra Juan. Ta tandíhi ñáyivi iyo cuñí ñu ta chinó ñu nataca ñu nu nyicú ra, nya nu cuví corredor ra Salomón chichi vehe ñuhu. ¹²Cha nanyehe ra Pedro cha tyicuan caa, catyí ra chi ñáyivi:

—Nyoho ra Israel, ¿ñáá tuhun cha iyo xaan cuñí nyoho? ¿Ñáá tuhun cha nyehé xaan ndo chi nyuhu?

Tari cha vatyí chihin tunyee ñni maa ndi, o cha cuenda cha cachi iyó ndi nuu Nyoo, sanduvaha ndi chi rayi ihya, cuñí maa ndo.

¹³Nyuhu ña cuví sanduvaha ndi chi ñáyivi. Nyoo cuenda sutu chahnu yo, ra Abraham, ra Isaac, ta ra Jacob, ican ra sacahnú xaan ca ra chi Sehe ra, ra Jesús. Ta maa ndo chaha cuenda ndo chi ra chi ra Pilato, ra cuví tyiño. Ta maa ra cuñi ra saña ra chi ra. Soco nyoho ña chaha ndo. ¹⁴Cha nuu cha cacan ndo cha saña ra chi ra vaha, ra ii cuan, nyoho chican ndo cha saña ra chi noo ra tuhva chahni ñáyivi.

¹⁵Tyicuan caa chahni ndo chi ra cha chahá ñáyivi chaa coo yo chihin Nyoo. Soco Nyoo sanandoto ra chi ra. Ta ña ndo ra chihin ñu chihí. Ta nyuhu cuví ndi cha ndaa.

¹⁶Ta suri maa ra Jesús cuví ra chaha fuerza chaha ra coxo ihya. Vatyí chinó ñni ndi tyi iyó tunyee ñni chi ra Jesús. Yucuan chaha ndunyee chaha ra ihya, ta ñohó nuu vaha ndo chi ra ihya. Ta nduvaha ra vatyí chinó ñni ndi chi ra Jesús. Ta tandíhi nyoho cha nyehe maa ndo vityin.

¹⁷Chité yañi —catyí ra Pedro— vatyí quivi cha chahni ndo chi ra Jesús, ña chito ndo tyi ña vaha cha nyacuví ndo. Ta tyicuan caa tucu ra cuví nuu chi ndo, ña cachitó ra. ¹⁸Soco tyehe caa chinó cava tuhun cahán Nyoo chihin yuhu ra profeta cuenda ra ta cha naha, vatyí catyí ra vatyí ra Cristo cunyehe ra tindoho. ¹⁹Yucuan chaha ndu uvi

iñi ndo cuatyí ndo. Ta nacuhva ndo añima ndo chi Nyoo, tacuhva na ndachi cuatyí ndo. Tyicuan ta Sutu Mañi yo sandunyeer a añima ndo vatyí cohon ra añima ndo. ²⁰Tyicuan ta cutachi ra chi ra Jesús ra cuví Cristo na quichi ra inga chaha. Vatyí quivi xihna ri tyaa Nyoo cuhva tyi quichi ra cha cuenda ndo. ²¹Tahán chi cha ndoó ra Jesucristo andívi cha vityin nyacua nya sanduchaa Nyoo tandíhi maa. Tari cuhva catyí maa ra chihin yuhu ra profeta cuenda ra ta cha naha. ²²Vatyí tyicuan caa catyí ra Moisés chi sutu chahnu yo: “Cusaquichi Sutu yo Nyoo chi noo ra cahan cuenda ra. Ta suri ñáyivi chi yo cucuvi ra. Ta cuacahan ra tuhun Nyoo chihin ndo tari cahán yuhu. Quichaha ndo tandíhi cha catyí ra chi ndo. ²³Vatyí tandíhi ñu cha ma tyasoho tuhun cahan ra, cunaa ñu, vatyí ma cu iin ri ñu chihin ñáyivi cachi Nyoo chii”, catyí ra Moisés.

²⁴Ta tyicuan caa tucu tandíhi profeta cuenda Nyoo nya quivi ra Samuel ta nyacua nya vityin, casacoto ra tuhun cha cuví vityin. ²⁵Tandíhi promesa cha chaha Nyoo cha cahan ra profeta tuhun ta cha naha, chi maa ndo cuví. Ta tuhun cha natyihí tahan Nyoo chihin sutu chahnu yo, chihin ra Abraham, suri cha cuenda maa ndo cuví. Vatyí catyí Nyoo chi ra Abraham: “Tandíhi ñáyivi cha iyó siqui ñuhu ñayivi cunasoque chí ñu cha cuenda ñáyivi chuun.” ²⁶Ta quivi sanandoto Nyoo chi Sehe ra, xihna ca nu nyicú ndo tachí ra chi ra, vatyí nasoco ra chi ndo. Tacuhva vatyí tahan tahan ndo sandoo ndo

cha quiñi caa —catyí ra Pedro chi ñu.

Nu catiñ ra cacuví nuu vehe ñuhu cahnú chi ra Pedro ta chi ra Juan

4 Ni cahán ca ra Pedro ta ra Juan chihin ñáyivi, ta chaꝥ coyo tata sutu cuenda ñu Israel chihin ra cuví nuu chi ra sahá cumi vehe ñuhu, ta chihin ra cuví saduceo. ²Cacuxaan xaan ra vatyí ra Pedro ta ra Juan sañahá ra chi ñáyivi ta catyí ra vatyí ndicha cha nandoto ñu chihí, vatyí ra Jesús nandoto ra. ³Tyicuan ta catiñ ra chi ra. Ta catyihí ra chi ra vehe caa. Ta candog ra nyacua nya inga quivi vatyí cha iñi xaan cuhva cuan. ⁴Soco cuaha ñu cha chíñi tuhun cahán ra Pedro nachinó iñi ñu. Ta candu iin ri ñu chihin ñu yihí cuenda ra Jesús. Ta cha tandíhi ñu vasi quita ohon mil ñu cha maa ri maa rayi ri.

⁵Tuvi inga quivi ta candu iin ri ra cacuví tyiño chi ñu Israel, ra chahnu, ta ra casacuaha cuenda ley cha tyaa ra Moisés, nya Jerusalén cuan. ⁶Ta ñohó tucu ra Anás ra cuví nuu chi tata sutu. Ta ra Caifás, ta ra Juan, ta ra Alejandro. Ta nyicú tucu tandíhi ñáyivi chi ra cacuví nuu chi tata sutu. ⁷Tyicuan ta catachí ra tyiño chiquehen chi ra Pedro ta chi ra Juan. Ta chitayucu ra chi ra mahñu. Ta candacꝥ tuhun ra chi ra: —¿Yóó cha chaha ityi chi ndo vatyí sanduvaha ndo chi ra cuan? ¿Yóó chi cha cuenda nyacuví ndo tyehe caa? —cacatyí ra chi ra.

⁸Ta ra Pedro tyitu ra yihí Tatyí Ii Nyoo. Ta catyí ra chi ra: —Nyoho ra nyacá ñaha Israel ñu yo ihya. Ta nyoho ra chahnu.

⁹Vityin ndacá tuhun ndo chi ndi tuhun vaha cha cuvī chi noo ra coxo ihya, vatyī cuñī ndo coto ndo yoso caa nduvahā ra. ¹⁰Yucuan chaha cunacatyī ndi chi ndo tacuhva nacoto tandīhi ñáyivi Israel. Vatyī ra ihya nanyaá ra nuu tandīhi ndo. Vatyī nduvahā ra chihin tunyee iñi ra Jesucristo ra ñuu Nazaret, ra cha chahā cuenda ndo vatyī cúvi ra nu cruzi. Soco Nyoo sanandoto ra chi ra. ¹¹Ta suri ra Jesús ihya cuvī yuu cha chiñuhú ca cha ña cuñī ra savahá vehe cotyiño ra, tari cuhva catyí nuu tutu Nyoo. Ta ican ndo cuvī tari ra savahá vehe ta ña cuñī ndo yuu cha chiñuhu ca cuan. ¹²Vatyī yori inga ra cuvī sacacú chi yo. Vatyī noo tuhun ri maa ra chahā Nyoo vatyī sacacu ra chi yo. —catyí ra Pedro chi ñu.

¹³Tyicuan ta cachiñi ra cacuvi tyiño cuan vatyī ñi xaan iñi ra Pedro ta ra Juan cacahán ra. Ta ñima ra cañoho vaha sicuela cacuvi ra. Ta iyo xaan cuñi ra. Tyicuan ta nicohon nuu ra chi ra vatyī ican ra cuvī ra cha cachicā noo chihin ra Jesús. ¹⁴Ta siin ri, ra cha nduvahā cuan, nanyaá ra chihin ra yucuan. Yucuan chaha ña cuvī cahan ña vaha ra cacuvi tyiño cuan siquí ra Pedro ta ra Juan. ¹⁵Tyicuan ta catyī ra chi ra naquita coyo ninduñi ra chata vehe. Ta candoq maa ra cacuví tyiño cuan candatuhun tahan ra. ¹⁶Ta catyí ra:

—¿Yoso caa cunyacuvi yo chihin ra ihya? Vatyī tandīhi maa ñu Jerusalén chitó ñu seña cha casacuvī ra ihya. Ta ma cuvī catyī yo vatyī ña ndicha. ¹⁷Soco tacuhva

cha ma cono tuhun ihya nicahnu chichi ñuu ihya, cutyanaha yo chi ra, tacuhva vatyī ma cahan ca ra tuhun ra Jesús chihin ñáyivi — cacatyí ra.

¹⁸Tyicuan ta cacana ra chi ra Pedro ta ra Juan. Ta catyī ra chi ra vatyī ni chiin ca maa ta ma cahan ca ra tuhun ra Jesús. Ta ma sañaha ca ra chi ñáyivi. ¹⁹Soco ra Pedro ta ra Juan canacahan ra ta catyí ra: —Ndīchi xiñi nyoho ta nyehe ndo tatu vaha ca cha quichaha ndi chi maa ndo o vaha ca cha quichaha ndi chi Nyoo. ²⁰Vatyī nyuhu ma cuvī cha sandīhi ndi cha nacatyī ndi tuhun cha nyehe ndi ta chiñi ndi —cacatyí ra.

²¹Tyicuan ta nacatyanahā tucu ra chi ra. Soco saña ra chi ra vatyī ña ñihī ra cuhva tachi tuñi ra chi ra. Vatyī tandīhi ñáyivi sacahnú ñu chi Nyoo cha cuenda cha cuvī cuan. ²²Vatyī rayi cha nduvahā cuan, yaha ca uvi xico cuiya ra, ta tyicuan cuiya nyehe ra tindoho ta nduvahā ra saha Nyoo.

Nu chicān ñu yihí cuenda ra Cristo tunyee iñi Nyoo

²³Ta casañā ra chi ra Pedro ta chi ra Juan. Tyicuan ta cuahan coyo ra nu nyicú ra tahan ra. Ta canacatyí ra tandīhi cha cacatyī ra chahnu ta ra cacuví nuu chi tata sutu chi ra.

²⁴Cuhva cha cachiñi ñu tuhun ihya tandīhi ñu ta iin ri quichahā chican tahvi ñu chi Nyoo. Ta catyí ñu:

—Sutu Mañi yuhu, yoho savahun andivi ta ñuhu ñayivi. Savahun tyañuhu. Ta tandīhi ca cha iyó, maun savahā. ²⁵Ta yoho chihin Tatyī Iun sacahun chi ra David ta cha naha. Ta catyí ra:

¿Ñáá tuhun cha naquiqui ñáyivi ña ñohó nuu Nyoo? ¿Ñáá tuhun chicá xiñi ñu cha ñima ri tuhun?

²⁶ Rey ta inga cha nyacá ñaha siqui ñuhu ñayivi ihya candu cuita ra sicun Sutu Mañi yuhu, ta siqui ra Cristo, catyi ra David.

²⁷ Sutu Mañi yuhu, ndicha vatyí ra Herodes, ta ra Poncio Pilato candu iin ri ra ñuu Jerusalén ihya chihin ra ñuu Roma ta chihin ra Israel vatyí cahñi ra chi ra Jesús Sehe iun cha cachí vahun. ²⁸ Ta tyicuan caa ta casacuví ra, tari cuhva cha catyi maun ta cha naha tyi cucuvi. ²⁹ Ta vityin, Sutu Mañi yuhu, nyehe cha tyanaha ra chi ndi. Ta cuhva cha cunñi ca iñi ndi tyi tyiño nuu maun sacuvi ndi, Sutu Mañi yuhu. Ta cuhva cha cahan ndi tuhun chihin cha ña yuhví ndi. ³⁰ Ta chihin fuerza maun ta cunduvaha ñu cuhví, ta cunyehe ndi seña ta milagru cha cuenda tunyee iñi ra Jesús Sehe iun —catyi ñu chicán tahvi ñu.

³¹ Ta cuhva cha ndihi savaha ñu oración ta tañ nu nyicu ñu. Ta tandihi ñu chitu ñu chihin Tatyí Ii ta cañan ñu tuhun Nyoo chihin cha ñi iñi ñu.

Ñahri cha cumañi chi ñu yihí cuenda Nyoo

³² Tandihi ñu cha chinó iñi, iin ri cuví ñu, ta iin ri cuhva chicá xiñi ñu. Ni noo ñu ta ña catyi ñu vatyí chi maa ñu cuví cha iyó chi ñu, soco chi tandihi ñu cuví, catyi ñu. Vatyí iin ri nyicú ñu. ³³ Ta chihin tunyee iñi cahnu, cacahán

ra apóstol tuhun cha nandoto Sutu Mañi yo Jesús. Ta Nyoo nasocó xaan ra chi tandihi ra. ³⁴ Ta ni noo ñu ta ñahri cumañi chi ñu vatyí tandihi ñu cha iyó vehe o ñuhú, xicó ñu. Ta quichi nyacá ñu xuhun, ³⁵ ta chahá cuenda ñu chi ra apóstol. Ta maa ra nasachá ra chi noo noo ñu yoso cuhva cha chiñuhú chi ñu. ³⁶ Tyicuan caa sacuvi noo ra cha nañi José. Ra cuan vachi ra tata ra Levi. Ta cacu ra ñuhú Chipre cha nyaá mahñu tyañuhu. Ta ra apóstol sacunañi ra Bernabé chi ra. Ta cuñi chi catyi sívi cuan: Ra Naquehen Ndahvi. ³⁷ Ta ra Bernabé cuan xico ra ñuhú ra. Ta chaha ra xuhun cuan chi ra apóstol.

Cuatyi ra Ananías ta cu Safira

5 Soco noo ra cha nañi Ananías chihin cu Safira ñasihi ra, xico ñu noo ñuhú. ² Soco tixehe ñu suhva xuhun. Tyicuan ta chinyaca ra Ananías suhva xuhun chi ra apóstol. Ta catyi ra vatyí tandihi xuhun cha quiyahví ñuhú cuví cuan. ³ Tyicuan ta catyi ra Pedro chi ra:

—Yoho Ananías, ¿ñáá tuhun cha chahun cha quihvi ra ña vaha añimon, vatyí cuñun sandavi ñahun chi Tatyí Ii, ta catyún vatyí tandihi xuhun cha quiyahví ñuhu cuví ihya ta ndoún chihin suhva? ⁴ Chuun cuví ñuhú, ta chuun cuví xuhun cha ñihun cuenda ñuhú cuan. ¿Ñáá tuhun cha cuñun sandavi ñahun chi Nyoo ta catyún tyi tandihi xuhun chahun? Ñima chi nyuhu sandaví ñahun, chi Nyoo sandaví ñahun —catyi ra Pedro chi ra Ananías.

⁵ Cha chiñi ra Ananías tuhun cha cañan ra Pedro, nduva ra ta

chihĭ ra. Ta quichi noo cha yuhvi cuñĭ ñáyivĭ cha chitó ñu tuhun ihya. ⁶Tyicuan ta quichĭ coyo suhva ra tyivaa ta tyihĭ ra coño ñuhu ra chichi noo sahma. Ta chahān ra chityihĭ ra chi ra chichi ñuhú.

⁷Yahā noo uñi hora ta chaā ñasihi ra Ananías ta quihvĭ ña nu nyicú ra apóstol. Soco ña chitó ña cha cuvĭ cuan. ⁸Ta quichahā ndaca tuhun ra Pedro chi ña ta catyĭ ra:

—¿Atu tyehe cuvĭ yahvi cha quiyahvĭ ñuhú ndo? —catyĭ ra.

Ta nacahān ña ta catyĭ ña:

—Ay, tyehe cuvĭ yahvi chi —catyĭ ña chi ra.

⁹Tyicuan ta catyĭ ra Pedro chi ña: —¿Ñáá tuhun cha ñohō naha ndo tuhun ta sandavi ñaha ndo chi Tatyĭ Ii Sutu Mañi yo Nyoo? Cha cuandichi coyo ra cha chahān chityihĭ chi yĭun chichi ñuhú. Ta vityin cuhun tucu ra cutyihĭ ra chi yoho —catyĭ ra Pedro chi ña.

¹⁰Caa cuhva ri cuan ta nduvā ña chaha ra Pedro, ta chihĭ ña. Ta caquihvĭ coyo ra tyivaa cuan, ta nyehē ra vatyĭ chihĭ ña. Ta canacoñehē ra chi ña ta chityihĭ ra chi ña xiin yĭ ña. ¹¹Ta tandihĭ ñáyivĭ yihĭ cuenda ra Cristo, ta tandihĭ ca ñu chitó tuhun cuan, canayahvi xaan ñu.

Cuaha milagru ta seña sacuvi ra apóstol

¹²Cuaha seña ta milagru sacuvĭ ra apóstol sahá Nyoo nu nyicú ñáyivĭ. Ta tandihĭ ñu yihĭ cuenda ra Cristo ndu ĩn ri ñu nu cuvĭ corredor ra Salomón. ¹³Ta ni nonga ñu cha inga cuenda ta ña cañá ĩni ñu cutahan ñu chihin ñu yihĭ cuenda ra Cristo.

Soco vaha cahán ñáyivĭ siqui ñu.

¹⁴Ta cuaha xaan ñáyivĭ nachinó ĩni chi Sutu Mañi yo Jesús, tari rayĭi ta ñusihi. ¹⁵Ta nyacua tavá ñu chi ñu cuhvĭ ityĭ cahnu, chacún ñu chi ñu nu chito. Vatyĭ tatu yaha ra Pedro soco vasi xiñahñu ra yaha siqui ñu, ta nduvaha ñu. ¹⁶Tyicuan tucu ñu iyó yatyin ri Jerusalén cuan, quichĭ nyaca ñu chi ñu cuhvĭ ta ñu cha yihĭ tatyĭ ña vaha chi. Ta nduvahā tandihĭ ñu.

Nu nyehé ra Pedro ta ra Juan tindoho

¹⁷Tyicuan ta ra cuvĭ nuu chi tata sutu, ta ra cayihĭ cuenda ra cuvĭ saduceo, quiñi cuñi ra nyehē ra chi ra apóstol cha cuenda cha vaha cha casacuvĭ ra chihin tunyee ĩni chahá Nyoo chi ra. ¹⁸Tyicuan ta catiĭn ra chi ra apóstol. Ta catyihĭ ra chi ra vehe caa. ¹⁹Soco cha cuaa cuan quichĭ noo ángel cha tachi Sutu Mañi yo, ta nuñā ra yuvehe caa cuan. Ta tavā ra chi ra. Ta catyĭ ra chi ra:

²⁰—Cuāhan ndo ta cuĭnanyaa ndo chichi vehe ñuhu cahnu. Ta ñacatyĭ ndo chi ñáyivĭ yoso caa cuvĭ coo ñu ñáyivĭ chaa cha iyó ndo —catyĭ ángel cuan chi ra.

²¹Cha cachihĭ ra tuhun chahān ángel cuan, ta cuahan coyo ra. Ta ñaha cuiĭ ri quihvĭ coyo ra chichi vehe ñuhu cahnu. Ta quichahā sañaha ra chi ñáyivĭ. Ta cha ni ri ca cha sañahá ra apóstol cuan, ndu ĩn ri ra cuvĭ nuu chi tata sutu ta ra ndihĭ chihin ra. Ta canā ra chi ra cacuvĭ tyiño cuenda ñáyivĭ Israel vatyĭ coo ra junta. Tyicuan ta tachĭ ra na cuquehen chi ra apóstol nu

cañohó ra vehe caa cuan. ²²Soco cuhva cha chaꝥ coyo policia chichi vehe caa cuan, ña nañihí ra chi ra apóstol. Ta cuanuhu coyo ra cuanacatyí ra chi ra cuví nuu chi tata sutu. ²³Ta cacatyí ra chi ra:

—Nyasi yuvehe caa cuan ta chaꝥ ndi. Ta sindaro, tayucú ra yuvehe casahá cumi ra. Soco cuhva cha nuña ndi, ña nañihí ndi chi ni noo ra chichi vehe caa cuan —catyí ra chi ra.

²⁴Cuhva cha cachiñí tata sutu chihin ra cuví nuu chi ra, ta ra cuví nuu chi ra casaha cuenda vehe ñuhu tuhun ihya, iyo xaan cuñí ra. Ta candatuhun tahan ra yoso caa sacuvi ra ta cundihi tuhun cuan.

²⁵Tyicuan ta chaꝥ noo ra ta catyí ra:

—Ra cha tyihí ndo vehe caa cuan, nyicú ra chichi vehe ñuhu sañahá ra chi ñáyivi —catyí ra.

²⁶Tyicuan ta ra cuví nuu chi ra casahá cuenda vehe ñuhu, chahꝥ ra chihin policia, ta chiquehen ra chi ra chihin cha vii ri ta ña cañí ra chi ra, vatyí yuhví ra chi ñáyivi coto tuchi ñu yuu chi ra. ²⁷Chinyacꝥ ra chi ra nuu ra cacuví tyiño vehe ñuhu cahnu. Ta ra cuví nuu chi tata sutu catyí ra chi ra:

²⁸—Nyuhu catyí cachi ndi chi ndo vatyí ma cahan ca ndo tuhun ra Jesús. Soco nyoho ña tyasohó maa ndo. Cha ndíhi maa chichi ñuu Jerusalén sacotó ndo tuhun ra. Ta cuñí ndo natyaa ndo siqui ndi vatyí nyuhu chahñí ndi chi ra cuan — catyí ra cuví nuu chi tata sutu chi ra apóstol.

²⁹Tyicuan ta nacahꝥ ra Pedro ta inga ra apóstol, ta catyí ra:

—Nyaá siqui ndi cha quichaha xihna ca ndi chi Nyoo ta ñima ca chi rayii. ³⁰Nyoo cuenda sutu chahnu yo ican sanandotó chi ra Jesús, ra cha chitacaꝥ ndo nu cruzi ta chahñí ndo chi ra. ³¹Ta ra Jesús ican ra cuví ra cha sacahnu xaan Nyoo chi, ta cuatyaa ra chi ra chiyo vaha ra, vatyí cunyaca ñaha ra tandíhi. Ta noo tuhun ri maa ra cuví ra sacacú chi yo. Vatyí tyicuan caa chahá ra cuhva chi yo cha cuví yo ñu Israel na ndu uvi iñi yo cuatyí yo tacuhva saha ra ticahnu iñi cuatyí yo. ³²Ta nyuhu cuví ndi cha ndaa cuenda ihya. Ta tyicuan caa tucu Tatyí li cha chahꝥ Nyoo cunyaa ñima ñu quichahá chi ra — catyí ra Pedro chi ra.

³³Ta cha cachiñí ra cha catyí ra Pedro, nduxaan xaan ra. Ta cuñí ra cahñi ra chi ra. ³⁴Soco mahñu ra cacuví tyiño cuan ñohó noo ra cuví fariseo cha nañi Gamaliel. Ta cuví ra ra sacuahá cuenda ley ra Moisés. Ta ñáyivi sahá xaan ñu ñáyivi chi ra. Ta ra Gamaliel cuan, nicuinanayaꝥ ra. Ta tachí ra naquita coyo ra apóstol cuan noo cuhva ri. Tyicuan ta quita coyo ra. ³⁵Ta quichahꝥ catyí ra Gamaliel cuan chi inga ra cacuví tyiño:

—Nyoho ra nyacá ñaha ñu Israel, saha ndo cuenda chi ndo chihin cha cua cunyacuví ndo chihin ra chiña. ³⁶Ñicohon iñi ndo vatyí cha iyó suhva quivi ndicuitꝥ noo ra cha nañí Teudas. Ta catyí ra vatyí cuví ra noo ra vaha. Ta tari cha cumi cientu rayii chinyicon chi ra. Soco yahꝥ cuan chahñí ñáyivi chi ra. Ta tandíhi ra chinyicon chi ra nacutyꝥ cuatyí ra. Ta ndíhi tuhun. ³⁷Yahꝥ

cuan ta nu cuahan ca chi, quivi nacahvi ra gobiernu chi ñáyivi, ta ndicuita ra Judas ra ityi Galilea cuan. Ta cuaha ñu chinyicon chi ra. Soco suri चाह्नि ñáyivi chi ra. Ta tandihi ñu cha chinyicon chi ra chitya cuatyí ñu. ³⁸Yucuan chaha saña ndo chi ra chiña. Ta ma tyihi ndo chi ndo chihin ra vatyí tatu tuhun ñáyivi ri cuví cha chicá noo ra, cundihi tuhun. ³⁹Soco tatu ndicha tyi tuhun Nyoo cuví, ma cuvi chi nyoho sativi ndo. Saha ndo cuenda chi ndo coto vaha chihin Nyoo cañi tahan ndo —catyí ra Gamaliel chi ra.

⁴⁰Tandihí ra ndoo ra vaha. Tyicuan ta cana ra chi ra apóstol. Cacañi policia chi ra. Ta chasi ra nu cahan ca ra tuhun ra Jesús. Tyicuan ta saña ra chi ra. ⁴¹Ta quitá coyo ra apóstol nuu ra cuví tyiño. Ta sii xaan cacuñi ra vatyí chaha Nyoo cuhva vatyí nyehé ra tindoho cha cuenda ra Jesús. ⁴²Ta ña casandihí ra cha cacahán ra. Ta ndiquivi ri sañahá ra tuhun ra Jesucristo vehe ñuhu ta vehe ñáyivi ñandihí.

Nu nacachí ñu yihí cuenda ra Jesús ucha tahan ra vatyí saha cuenda ra ñáa cha chiñuhu chi ñu

6 Ta nu cuahan ca chi quivi cuaha xaan nanduví ñáyivi cha yihí cuenda ra Cristo. Tyicuan ta ñu cha cahán sahan griego quichaha cahan ñu siqui ñu cha cahán sahan hebreo cuan. Vatyí catyí ñu tyi ña tyiñuhú vaha ra cha cahán sahan hebreo chi ñu chihí yíi cuenda ñu, cuhva cha sachá ra cha cacachi ñu ndiquivi ri. ²Tyicuan ta ndi uchi uvi tahan apóstol sandu

iin ri ra chi tandihí ñu yihí cuenda ra Cristo. Ta cacatyí ra chi ñu:

—Ña vaha cha sandihí ndi cha cahan ndi tuhun Nyoo ta sachá ndi cha cachi ndo. ³Yucuan chaha yañi, nanducu ndo ucha tahan ra nu canyicú ndo ihya, ra vaha iyó chihin Nyoo, ra chiñi tuñi, ra tyitú yihí chihin Tatyí Ii. Ta cuhva yo tyiño ihya chi ra. ⁴Ta nyuhu sañihi ndi cacan tahvi ca ndi. Ta cuasañaha ca ndi tuhun Nyoo —catyí ra apóstol.

⁵Tandihí ñu ndoo ñu vaha. Ta nacachi ñu chi ra Esteban. Vatyí chinó xaan iñi ra chi Nyoo. Ta tyitu ra chihin Tatyí Ii. Ta nacachi tucu ra chi ra Felipe, ta chi ra Prócoro, ta chi ra Nicanor, ta chi ra Timón, ta chi ra Parmenas, ta chi ra Nicolás cha cuví ra noo ra ñuu Antioquía, ta nanduví ra noo ra Israel. ⁶Tyicuan ta quichí nyaca ra chi ra nu nyicu ra apóstol. Tyicuan ta catyiso ra ndaha ra xiñi noo noo ra ta cachican tahvi ra chi Nyoo cha cuenda ra.

⁷Ta cuahan chitya ca tuhun Nyoo. Ta nducuhá ca ñu yihí cuenda ra Cristo ñuu Jerusalén. Ta na chingo iñi tucu cuaha tata sutu cuenda ñu Israel ñandihí.

Nu catyihí ra chi ra Esteban vehe caa

⁸Ra Esteban cuví ra noo ra cha tyitú chihin tunyee iñi Nyoo. Ta vaha xaan ñáyivi cuví ra vatyí tyitu aña ra chihin cha vaha Nyoo. Ta cuaha xaan milagru ta seña sacuví ra nu nyicú ñáyivi. ⁹Tyicuan ta suhva ra vehe ñuhu ñuu Israel cha nañi Vehe Ñuhu Cuenda Ñáyivi Ndoos Libre, candu iin ri ra chihin

ra ñuu Cirene, ta ra ñuu Alejandría, ta ra ityi Cilicia, ta ra ityi Asia. Ta quichahaꝑ cuvi yuhu ra chihin ra Esteban. ¹⁰Soco ña cacuvi chasaha ra chi ra, vatyí ra Esteban cahán ra chihin cha chiñi tuñi cha chaha Tatyí Ii chi ra. ¹¹Tyicuan ta catyiyahví ra cuan chi suhva ra vatyí canducu ra cuendu chaha ra Esteban ta catyí ra cuendu cuan vatyí ra Esteban cahán ña vaha ra siqui ra Moisés, ta siqui Nyoo. ¹²Yucuan chaha tandihí ñáyivi cuan naquiquí ñu. Tyicuan ta ra chahnu ta ra sacuaha cuenda ley ra Moisés, catiñ ra chi ra Esteban. Ta chahan ra chinyaca ra chi ra nu ndu iin ri ra cuví tyiño cuenda vehe ñuhu ñu Israel. ¹³Ta canducu ra chi ra cahan cuendu chaha ra. Ta maa ra catyí ra tyehe caa:

—Ra Esteban ihya, ña sandihí ra cha cahan cuehe ra siqui vehe ñuhu yo ta siqui ley ra Moisés. ¹⁴Ta chiñi ndi cahan ra vatyí ra Jesús ra Nazaret cuan cusatani ra vehe ñuhu cahnu ihya. Ta cunasama ra costumbre cha sandoꝑ ra Moisés chi yo na —catyí ra cuendu cuan siqui ra Esteban.

¹⁵Tyicuan ta ra cacuví tyiño ta ra canyicú yucuan canyehe ra chi ra Esteban vatyí tari maa nuu ángel tyicuan caa nuu ra cuhva cuan.

Nu cahán ra Esteban tuhun Nyoo chihin ñáyivi nducú cahni chi ra

7 Tyicuan ta ra cuví nuu chi tata sutu ndacaꝑ tuhun ra chi ra Esteban, ta catyí ra:

—¿Atu ndicha cha catyí ra ihya?

²Tyicuan ta nacahan ra Esteban ta catyí ra:

—Nyoho yañi, ta nyoho tata, cuiñi ndo tuhun cahín. Sutú yo Nyoo cha cahnu ca tuví ra nuu sutu chahnu yo, ra Abraham quivi nyaá ra ityi Mesopotamia cha niri ca cha cumañi cucoo ra nya ñuu Harán. ³Ta catyí ra chi ra: “Sandoo ñuun, ta chi tandihí ñáyivi chuun. Ta cunuhu inga ñuu cha cusañahi chuun”, catyí Nyoo chi ra Abraham. ⁴Tyicuan ta ra Abraham quitaꝑ ra ñuu Caldea ityi Mesopotamia cuan, ta cuanuhu ra nya ñuu Harán. Ta yucuan cuví nu chihí sutu ra. Yaha cuan saquichí Nyoo chi ra ñuhú nu iyó yo vityin. ⁵Soco ñahri ñuhú chahaꝑ Nyoo chi ra quivi cuan. Ni noo nu cuinanyaa chaha ra ta ña chaha ra. Soco catyí Nyoo chi ra vatyí cucuhva ra. Ta cutahan chi chi sehe ra chata cha yaha cúvi ra. Tyicuan caa catyí Nyoo chi ra Abraham, vasi ta coo ca sehe ra quivi cuan. ⁶Ta siin ri catyí Nyoo chi ra vatyí ñáyivi chi ra cucoo ñu inga ñuu. Ta cusacuvi ñu tyiño nuu ñáyivi ñuu cuan, ta ma tyiyahvi ñu chi ñu. Ta cunyehe ñu tindoho cumi cientu cuiya. ⁷Soco catyí tucu Nyoo chi ra tyehe caa: “Ñáyivi ñuu cuan cusanyehe ñu tindoho chi ñáyivi chuun. Yucuan cuenda cuatachi tuñi yuhu chi ñu. Ta yahaꝑ cuan ta cuquita ñáyivi chuun ñuu cuan ta cuquichi ñu ihya. Ta cusacuvi ñu tyiño nuu mai ihya”, catyí Nyoo chi ra Abraham.

⁸Tyicuan caa natyihí tahan Nyoo tuhun chihin ra. Ta chahaꝑ Nyoo noo costumbre cha cuasacuvi ñu coto naa iñi ñu. Chahaꝑ ra tyi cutahnya chiin ñiñi ñiñi ndivi cha lee sehe ñu, o cha sahá ñu

circuncidar chi sehe ñu cuví cuan. Ta cha yahá uña quiví cha cacú ra Isaac sehe ra Abraham, tyicuan caa chinyacuví ra chihin ra. Ta suri tyicuan caa sacuví tucu ra Isaac chihin ra Jacob sehe ra. Ta ra Jacob tucu chihin uchi uvi tahan sehe ra, tyaa ra noo seña cuan chi noo noo sehe ra. Ta ican ra cuan cacuví sutu chahnu yo.

⁹Ta ican uchi ifn tahan ra sehe ra Jacobo ihya catasi cuñí ra nyehe ra chi ra José yañi ra cha cuenda vatyi vaha ca ra nuu sutu ra. Yucuan chaha caxico ra chi ra na cuhun ra Egipto. Soco Nyoo ña sandoó ra chi ra José. ¹⁰Ta sacacú ra chi ra nu nyehé ra tindoho. Ta chahá ra cha chiñi tuñi ra chi ra. Ta chahá ra cha vaha coo ra nuu ra Faraón, ra cuví rey Egipto. Ta rey cuan chahá ra cha cuvi ra José gobiernu Egipto cuan. Ta chinyacá ñaha tucu ra vehe maa rey ñandihí.

¹¹Tyicuan ta chiyo tama nicahnu ityi Egipto ta ityi Canaán. Ta nyehe xaan ñáyivi tindoho. Ta tandihí sutu chahnu yo cha chicoo tyembu cuan ña cañihí ra cha cachi ra.

¹²Soco quiví chito ra Jacob vatyi iyó trigu nya Egipto, ta tachí ra chi sehe ra na cuquehen ra. Ta chahan coyo ra noo chaha. ¹³Ta cha cu uvi chaha cha chahan coyo ra, ra José sacoto ra chi ra vatyi yañi ra cuví chi ra. Yucuan quiví chito ra Faraón yóó chi tata vachi ra José.

¹⁴Tyicuan ta tachí ra José tyiño na quichi sutu ra, ra Jacob, chihin tandihí ñáyivi chi ra, uñi xico chahun tahan ñu. ¹⁵Ta tyicuan caa cuvi cha cuahan ra Jacob cuacoo ra Egipto cuan. Yahá cuan ta chihí ra

yucuan. Ta chihí tucu sehe ra, ra cacuví sutu chahnu yo. ¹⁶Tyicuan ta chaá quiví cha chinanyaca ñu yiquí ra Jacob ta yiquí sehe ra nya Siquem. Ta yucuan quihvi ra chichi ñuhú nu satá ra Abraham noo ñaña chi sehe ra Hamor ta cha naha.

¹⁷Soco cha ni cumañi ca quita ñu Egipto, ñáyivi chi ra Abraham cha iyó Egipto cuan cuaha xaan nanduvi ñu. Ta cha nyaña yatyin quiví cha cuacuhva Nyoo ñuhú chi ñu tari cuhva catyi cachi ra chi ra Abraham. ¹⁸Tyicuan ta quichahá nyaca ñaha noo rey cha ña ñohó nuu chi ra José. ¹⁹Rey cuan sandavi ñaha ra chi ñáyivi chi yo cuan. Ta sanyehé xaan ra tindoho chi ñu, ta saniñi ra chi ñu na sanandoo ñu chi sehe ñu cha ni cacu vatyi na cúvi ndotyin. ²⁰Ta suri quiví cuan cacú ra Moisés. Ta tahan xaan iñi Nyoo chi ra lee cuan. Ta uñi yoo sacuahnu sihi ra chi ra nya vehe ña. ²¹Yaha cuan ña cuví ca tixehe sihi ra chi ra. Ta sandoo ña chi ra chichi noo tica yuhu yutya. Tyicuan ta sehe maa rey Egipto cuan nañihí ña chi ra. Ta naquehen ña chi ra. Ta sacuahnu ña chi ra, tari cha sehe ña cuví chi ra. ²²Yucuan chaha cutuhvá ra Moisés tandihí cha chito ñu Egipto. Ta siin ri nyee xaan cuhva cahan ra, ta cuhva sacuví ra ñandihí.

²³Ta quiví cha chaá uvi xico cuiya ra Moisés quichi cuvi iñi ra cuhun ra cunyehe ra nu nyicú ñu Israel, ñáyivi chi ra. ²⁴Tyicuan ta noo quiví nyehe ra nu cañi noo ra Egipto cuan chi noo ra Israel cuan. Tyicuan ta chahñi ra Moisés chi ra Egipto cuan vatyi satasi iñi ra chi ra Israel ra ñuu ra. ²⁵Cuñi

maa ra Moisés cuan vatyí ñáyivi Israel cuan cutuñi iñi ñu tyi Nyoo tachí chi ra vatyí cusacacu ra chi ñu. Soco maa ñu ña tuví iñi ñu cha tyicuan caa cucuvi. ²⁶Tyicuan ta cha inga quívi cuan nyehé ra Moisés chi uvi tahan ra Israel cha cacañi tahan ra. Ta ra Moisés, cuñi ra cha ma cacañi tahan ca ra, ta quichaha catyí ra: “Ña vaha cha cacañi tahan nyoho, vatyí suri yañi ndo cuví”, catyí ra chi ra. ²⁷Tyicuan ta ra cha cañi chi tahan cuan tyandaha ra chi ra Moisés, ta catyí ra chi ra: “¿Yóó cha tyatyíño chi yoho vatyí cunyaca ñahun ta cuvun juez chi ndi? ²⁸¿Atu cuñun cahñun chii tari chahñun chi ra Egipto cuan icu?” catyí ra chi ra Moisés. ²⁹Cuhva cha chiñi ra Moisés cha catyí ra, chino ra. Ta cuahan ra nya ñuu Madián. Yucuan ñihí ra ñasihi ra. Ta yucuan chiyó uvi tahan sehe ra.

³⁰Yaha uvi xico cuiya. Tyicuan ta noo quívi chicá noo ra Moisés chiqui ndii yatyin noo yucu cha nañi Sinaí. Ta nyehé ra noo taca iñu cha cayú. Tyicuan ta tuví noo ángel chichi ñuhú cha cayu cuan. ³¹Iyo xaan cuñi ra Moisés cha nyehé ra yucuan. Ta kuhva cha tuhva yatyin ca ra vatyí tacuhva nyehe vaha ra, chiñi ra noo ndusu Sutu Mañi yo. Ta catyí ra tyehe caa: ³²“Yuhu cuví Nyoo cuenda sutu chahñun, Nyoo cuenda ra Abraham, ta ra Isaac, ta ra Jacob”, catyí Nyoo chi ra. Tyicuan ta ra Moisés quichaha nihi ra chihin cha yuhvi ra. Ta ña caña iñi ra nanyehe ra. ³³Ta quichaha catyí tucu Sutu Mañi yo chi ra: “Tava ndichan chahun vatyí ñuhú

nu chañun, ñuhú ii cuví. ³⁴Yuhu nyehí tandíhi tindoho cha nyehé ñáyivi cuende ñuu Egipto chiña. Ta chiñi ndusu ñu cha chacú chaa ñu. Yucuan chaha noó xique vityin vatyí sacaqui chi ñu. Ñaha, vatyí cutachi chuun nya Egipto”, catyí Nyoo chi ra Moisés.

³⁵Quívi cuan ña cuñi ñáyivi Israel chi ra Moisés cha cunyaca ñaha ra chi ñu, ta catyí ñu chi ra: “¿Yóó cha tyatyíño chi yoho vatyí cunyaca ñahun ta cuvun juez chi ndi?”, catyí ñu chi ra. Ta vasi ña cuñi ñu cha cunyaca ñaha ra chi ñu, soco Nyoo tachí chi ra vatyí cuví ra nuu, ta sacacu ra chi ñu. Vatyí tyicuan caa catyí ángel cha tuví nuu ra nu taca iñu cha cayu cuan. ³⁶Ta ican ra Moisés cuan tava chi ñáyivi Israel Egipto cuan. Ta cha yaha savaha ra milagru ta seña ñuu cuan, ta sacuvi tucu ra nu yaha ñu Tyañuhu Cuaha. Ta nu chica noo ñu ñuhú ityi chichi cha uvi xico cuiya sacuvi tucu ra ñandíhi. ³⁷Ta suri maa ra Moisés cuan cuví ra cha catyí chi ñu Israel ta cha naha tyehe caa: “Nyoo cutachi ra noo profeta ra tari tachí ra chi mai. Ta cucuvi ra noo ra Israel tari maa ndo. Quichaha ndo chi ra”, catyí ra. ³⁸Ta suri maa ra Moisés cuan ndíhi ra chihin ñáyivi chahnu yo nu chica noo ñu ñuhú ityi cuan. Ta ican ra cuví ra cha cañan ángel cuan chihin nya yucu Sinaí. Ta ican ra quehen cuenda ra tuhun yoso caa coo ñáyivi ta sañaha ra chi yo. ³⁹Soco ñáyivi chahnu yo ña quichaha ñu chi ra. Tava xiin ñu chi ra. Ta cacuñi ñu cunuhu coyo ñu nya Egipto. ⁴⁰Yucuan chaha kuhva

cha nyaá ca ra Moisés yucu Sinái ta cahan ñáyiví chihin ra Aarón ta catyí ñu: “Savahun suhva nyoo cha cuhun coyo ityi nuu ndi. Vatyí ña chitó ndi ñáá cha cuví chi ra Moisés, ra cha tava chi ndi Egipto”, catyí ñu. ⁴¹Tyicuan ta casavaha ñu noo becerru xuhun cuaan. Tyicuan ta cachahñi ñu quití vatyí cuhva cuenda ñu chi xitohyo cuan. Ta sii xaan cuñi ñu cachiyo ñu vico cuenda xitohyo cha casavaha ñu chihin ndaha ñu. ⁴²Tyicuan ta Nyoo cuachiyo ra chi ñu. Ta saña ndaha ra chi ñu vatyí cusacahnu ñu chi ñanyii, chi yoo, ta ñáá ndihi tiño cha iyó ityi andívi. Vatyí tyehe caa catyaa ra profeta cuenda Nyoo nu libru ta cha naha:

Nyoho ñáyiví Israel, ¿atu chahñi ndo quití vatyí cuhva cuenda ndo chi yuhu chichi cha uvi xico cuiya cha chica noo ndo ñuhu ityi? Ñima.

⁴³Soco sacahnü ndo chi nyoo cha nañí Moloc, ta sacahnü tucu ndo chi nyoo cha nañí Renfán cha caá tari caá tiño andívi. Suri maa ndo savaha xitohyo cuan, vatyí sacahnu ndo.

Yucuan chaha yuhu cuatave chi ndo ñuu ndo, ta cuasacuhin chi ndo noo nu cañi ityi nuu ca Babilonia, catyí Nyoo chi ñu.

⁴⁴Nu chicá noo sutu chahnu yo ñuhú ityi cuan, chicumi ra noo vehe ñuhu cha chino chihin ñii quití. Ta chichi vehe cuan chicumi ra tabla yuu cha nyaá ley Nyoo nuu. Ta ra Moisés tachí ra tyiño na savaha ñu vehe ñuhu cuan ta ityi chata ca tari cuhva sañaha maa

Nyoo chi ra. ⁴⁵Yucuan ta ra Josué nanduví ra nuu chi ñu. Ta quehen ñu vehe ñuhu ta chicoo ñu chihin nu nyaá yo ihya vityin. Vatyí Nyoo tava ñehe ra chi ñáyiví chiyo ñuhu ihya ta nacuhva cuenda ra chi ñu Israel ñáyiví chi yo. Ta chotyíño ñu vehe ñuhu cuan nyacua nya quiví chiyo rey David. ⁴⁶Ta rey David ñihí ra tumañi ñi nuu Nyoo. Ta cuñi ra savaha ra noo vehe vaha nu coo Nyoo. Suri Nyoo ihya sacahnü ra Jacob ta cha naha. ⁴⁷Soco ra Salomón savaha vehe Nyoo. ⁴⁸Vasi ña iyó Nyoo chichi vehe ñuhu cha savahá ñáyiví. Tari catyí ra chihin yuhu ra profeta ta cha naha tyehe caa:

⁴⁹Andívi cuví tyayu nu nyaí ta nyacá ñahi tandíhi. Ta ñuhu ñayiví, yucuan cuví nu chañí chahi.

¿Atu cuví savaha ndo vehi ta coi chichi, cuñí maa ndo?

¿Ta nya maa maa cuví nyitati, cuñí maa ndo?

⁵⁰¿Atu ña chitó ndo vatyí mai savahi andívi ta ñuhu ñayiví? catyí Nyoo.

⁵¹Soco nyoho —catyí ra Esteban— tyicuan ri tuhvá ndo sandava ndo ñi ndo. Ta ña cuñí ndo naquehen ndo tuhun cahan Nyoo. Tyicuan ri ña quichahá ndo chi Tatyí Ii. Inuu ri caa ndo chihin sutu chahnu ndo. ⁵²Sutu chahnu ndo satasi ñi ra ta cachahñi ra chi tandíhi ra profeta cuenda Nyoo ta cha naha. Ta ican ra cuan cacatyí vatyí cuquichi noo ra vaha. Ta cha quichí ra vityin, nyoho ña cuñí nyehe ndo chi ra, ta cachahñi ndo chi ra. ⁵³Nyoho naquehen cuenda

ndo ley Nyoo cha chaha ángel chi ndo, soco ña cuñi ndo sacuvi ndo cuhva catyí ley cuan —catyí ra Esteban.

Nu chihí ra Esteban

⁵⁴Cuhva cha chihí ra cacuví tyiño vehe ñuhu cahnu tuhun ihya, xaan xaan cuñi ra, nyacua casacahñi noho ra nyehé ra chi ra Esteban.

⁵⁵Soco ra Esteban tyitú cuíi maa ra chihin Tatyí li ta nanyehé ra ityi andivi. Ta nyehé ra cha cahnu cuví Nyoo. Ta suri nyehé ra chi ra Jesús nanyaá ra chiyo vaha Nyoo.

⁵⁶Tyicuan ta catyí ra Esteban: —iNyehé ndo! Nyehí tanuña andivi. Ta nyehí chi ra Jesús, Rayii cha quichi nya gloria, nanyaá ra chiyo vaha Nyoo —catyí ra Esteban.

⁵⁷Soco ra cuan cachasi ra soho ra, cha ma cuñi ra tuhun cahán ra Esteban. Tyicuan ta vaa ri cananduvi ra. Ta tandihi ra cuahan coyo ra siqui ra Esteban. ⁵⁸Tyicuan ta catavá ra chi ra yuhu ñuu. Ta ca chahñi ra chi ra chihin yuu. Ta ra cha casacuví cha ña vaha cuan, casandoo ra sahma cha nyaa chata ra vatyí sahadumi noo ra tyivaa cha nañi Saulo. ⁵⁹Cha niri ca cha cacañi ra yuu chi ra Esteban, quichaha chican tahvi ra Esteban chi Nyoo, vatyí tuvi iñi ra cuacúvi ra. Ta catyí ra tyehe caa:

—Sutu Mañi yuhu Jesús, naquehen añime —catyí ra.

⁶⁰Yaha cuan, tyicuan ta chicuñi chiti ra, ta chaa canachaa ra ta catyí ra:

—Sutu Mañi yuhu, ma tiin cuendon cuatyí cha sacuví ñu — catyí ra.

Ta cha yaha catyí ra tyehe caa, ta chihí ri ra.

Nu chicá nyicon ra Saulo chi ñáyivi yihí cuenda ra Cristo

8 Ta ra Saulo ña chinó iñi ra chi ra Jesús, ta ndoó ra vaha cha chahñi ra chi ra Esteban.

Ta suri quívi cuan quichaha nducu xaan ñáyivi chi ñu yihí cuenda ra Cristo ñuu Jerusalén cuan vatyí cucahñi ñu chi ñu. Soco ra apóstol ña caquita ra. Candoo ra nyicú ra Jerusalén. Ta tandihi ca ñu cachino ñu, cuahan coyo ñu cuacoo ñu ityi Samaria, ta ityi Judea. ²Ta suhva ra cha nyicón vaha chi Nyoo Jerusalén cuan, catyihí ra coño ñuhu ra Esteban chichi ñuhú. Ta cachacu xaan ra cha cuenda ra. ³Cha niri ca cha tyicuan caa, ra Saulo chicá nyicon vavaha ra chi ñáyivi yihí cuenda Cristo. Ta tahan tahan vehe ñu chahan ra. Ta suri quiñoño ñaa ra chi ñu, ta chaha cuenda ra chi ñu vatyí cohon ñu vehe caa, rayii ta ñusihi.

Nu cacahán ñu tuhun ra Cristo ityi Samaria

⁴Soco tandihi ñu cha quita ñuu Jerusalén, cahán ñu tuhun yoso caa sacacú ra Cristo añima ñu tandihi ri maa ityi nu cha coyo ñu.

⁵Mínoo ra cha nañi Felipe cha ra noo ñuu ityi Samaria. Ta quichaha cahan ra tuhun ra Cristo chihin ñu. ⁶Ta tandihi ri ñáyivi ta tyasoho ñu tuhun cha cahán ra. Ta nyehé ñu milagru ta seña cha savahá ra.

⁷Vatyí cuaha vavaha ñáyivi cha yihí tatyí ña vaha chii nduvaha ñu. Vatyí tatyí ña vaha cha yihí chi

ñu, quitā chi ta suri canachaa chi cuahan chi. Ta cuaha vavaha ñáyivi coxo ta ñáyivi cha ña cuví nacanda, nduvaha ñu. ⁸Yucuan chaha ñáyivi ñuu cuan, sii xaan cacuví chi ñu.

⁹Soco ñuu Samaria cuan iyó noo ra tasi cha nañí Simón. Ta sandaví ñaha ra chi ñáyivi cuan. Catyí ra vatyí cuví ra noo ra cahnu. ¹⁰Ndii cuii maa ñáyivi tyasohó ñu tuhun cahan ra, nya ñu tyayii, ta nya ñu ndahvi. Ta cacatyí ñu:

—Ndicha ndicha cuii, vatyí tunyee iñi Nyoo nyaá chihin ra ihya — catyí ñu.

¹¹Quichahá xaan ñu tuhun cahán ra vatyí cha naha xaan sandaví ñaha ra chi ñu chihin tuhun tasi.

¹²Tyicuan ta quichi ra Felipe. Ta sacoto ra chi ñu yoso caa nyaá ñaha Nyoo añima ñáyivi. Ta yoso cuhva cha cahnu cuvi ra Jesucristo. Ta yucuan ta chino iñi ñu chi ra Cristo, rayii ta ñusihi. Ta condutyā ñu. ¹³Nyacua nya ra Simón cuan, ta nachino iñi ra chi ra Cristo, ta condutyā ra. Ta quichahā chica noo ra chihin ra Felipe. Ta iyo xaan cuñi ra nyehe ra milagru, ta seña cha sacuví ra Felipe cuan.

¹⁴Tyicuan ta ra apóstol cha canyicú ñuu Jerusalén cuan ñihí ra tuhun cha canachinó iñi ñáyivi ityi Samaria cuan tuhun Nyoo. Ta catachí ra chi ra Pedro ta chi ra Juan. ¹⁵Cuhva cha chaq coyo ra yucuan, ta chicān tahvi ra chaha ñu quihvī cuenda ra Cristo vatyí tacuhva tyi naquehen ñu Tatyí Ii. ¹⁶Vatyí ñu cuan, ta naquehen ca ñu Tatyí Ii. Tacuhva condutyā ri ñu chihin sivi Sutu Mañi yo Jesús. ¹⁷Tyicuan ta ra Pedro ta ra Juan

catyiso ra ndaha ra síqui ñu, ta naquehen ñu Tatyí Ii. ¹⁸Ta ra Simón cuan nyehe ra cuhva cha catyiso ra apóstol ndaha ra síqui ñu cuan, ta naquehen ñu Tatyí Ii. ¹⁹Ta quichaha catyí ra tyehē caa:

—Yoso xuhun cuñí ndo ta cuhva ndo tunyee iñi chiña chii, vatyí tacuhva cuvi tyise ndahi síqui ñáyivi, ta naquehen tucu ñu cuan Tatyí Ii —catyí ra Simón cuan chi ra apóstol.

²⁰Tyicuan ta nacahan ra Pedro ta catyí ra:

—Na cunaun iñ ri chihin xuhun chiña. Vatyí chicá iñun tyi cuví sata yo chihin xuhun nyatu cha chahá maa Nyoo chi yo. ²¹Yoho, ña tahán chi tyihun chuun chihin tuhun ihya. Vatyí añimon ña vaha nuu Nyoo.

²²Ndu uvi iñun cuhva chicá xiñun chiña, vatyí cahnu cha quiñi caa cuví cuan nuu Nyoo. Ta çacan tahvi chi ra na nyehe yo tatu saha ra ticahnu iñi chuun cha cuenda cha caa chichi añimon. ²³Vatyí nyehí tyi chichi añimon tyitú maa yihí cha quiñi caa cha cuvi tari cha uva. Ta cha quiñi caa cuan, ña chahá cotton cha vaha. —catyí ra Pedro chi ra Simón cuan.

²⁴Tyicuan ta nacahan ra Simón ta catyí ra:

—Çacan tahvi maa ndo cha cuende nuu Nyoo, ta cuhva cha ma quichi tandihi tuhun cha catyún chiña síqui —catyí ra Simón chi ra Pedro.

²⁵Cha yahā cuan ta ra apóstol nacatyí ra tandihi cha nyehe ra cha sacuví ra Cristo. Ta cahān ra tuhun Nyoo. Tyicuan ta cuanuhū coyo ra nya Jerusalén. Ta suri sacoto ra

tuhun yoso caa sacuví yo ta cacu añima yo tandihí ñuu ityi Samaria nu yaha ra.

**Nu cahán ra Felipe tuhun
Nyoo chihin noo ra Etiopía**

²⁶Cha yaha tuhun cuan tyicuan ta cahan noo ángel Nyoo chihin ra Felipe, ta catyí ra:

—Ndícuita ta cuhun ityi sur, ityi quita nya Jerusalén ta cuahan nya Gaza —catyí ángel cuan chi ra.

Yucuan cuvi ityi cha yaha noo ñuhú ityi. ²⁷Tyicuan ta ra Felipe ndícuita ra ta cuahan ra. Ta ityi cuahan ra ta ñihi tahan ra chihin noo ra ñuu Etiopía. Ta cuvi ra eunuco. Cuví ra noo ra cuví tyiño cahnu ñuu Etiopía, vatyí sahá cuenda ra xuhun cu Candace, ñaha cha cuví reina ñuu Etiopía cuan. Ta chahan ra Etiopía cuan chisacahnú ra chi Nyoo nya Jerusalén. ²⁸Ta ityi cuanuhú ra nya ñuu ra nyaá ra siquí carru ra. Ta sacuahá ra libru cha tyaá ra Isaías ra profeta cuenda Nyoo ta cha naha. ²⁹Tyicuan ta Tatyí li catyí chi ra Felipe:

—Sátuhva ca nu cuahan carru cuan.

³⁰Ta cuhva cha tuhva ra Felipe, chihí ra vatyí sacuahá ra cuan nu libru cha tyaá ra Isaías. Ta ndaca tuhun ra chi ra:

—¿Atu cutuñí iñun cha sacuahún? —catyí ra.

³¹Tyicuan ta nacahan ra cuan ta catyí ra:

—¿Yoso caa cutuñí iñi ta yori sañahá chii? —catyí ra chi ra.

Ta chican ra chi ra Felipe na ndaa ra ta cunyaa ra chihin ra.

³²Ta nu cuahan sacuahá ra, catyí chi tyehé caa:

Chahñi ra chi ra tari chahñi ra noo mbee.

Vatyí tari ña chacú mbee tatu cuasatya ra ixi ti, ta tari ña chacú ti tatu chahñi ra chi ti, tyicuan caa cuví ra cuan tyi nyehe ra tindoho ta ñahri maa catyí ra.

³³Sanocuee ñu chi ra ta yori cuñí sacacu chi ra.

¿Yóo ra cuvi nacatyí tuhun sehe ra cha cuacoo?

Yori, vatyí chihí ra.

Catyí chi nu tutu cha sacuahá ra cuan.

³⁴Tyicuan ta ra cuan quichaha ndaca tuhun ra chi ra Felipe, ta catyí ra:

—Saha tumañi iñi chii, ta catyun chiin chii yóo chi tuhun cahán ra profeta ihya. ¿Atu tuhun maa ra, o yóo chi tuhun cahán ra? —catyí ra chi ra Felipe.

³⁵Tyicuan ta ra Felipe quichaha cahan ra siquí tuhun cha cha yaha sacuahá ra cuan, ta nacatyí ra chi ra vatyí tuhun ra Jesús cahán ra cuan. Ta nacatyí ra vatyí ra Jesús cuví ra cha sacacú chi yo.

³⁶Tyicuan ta cha cuayaha ra noo nu ñohó ndutya. Ta ra cuan quichaha catyí ra chi ra Felipe:

—Ihya ñohó ndutya. ¿Atu ma cuvi condutye vityin? —catyí ra.

³⁷Tyicuan ta nacahan ra Felipe, ta catyí ra:

—Tatu chinó iñun chihin cha tandihí añimon, cuví condutyon —catyí ra chi ra.

Tyicuan ta nacahan ra cuan, ta catyí ra:

—Chinó iñi yuhu vatyí Sehe Nyoo cuví chi ra Jesucristo —catyí ra.

³⁸Tyicuan ta ra cuan catyí ra chi musu ra na sacucuiñi ra carru cuan. Tyicuan ta canoꝝ nduvi tahan ra. Ta caquihvi ra chi ndutya. Tyicuan ta sacondutya ra Felipe chi ra. ³⁹Ta cuhva cha caquita coyo ra chichi ndutya cuan, Tatyí Ii Sutu Mañi yo naquehen chi chi ra Felipe. Ta ra cuan ña nyehe ca ra chi ra. Soco sii xaan cuví chi ra, cuanuhu ra. ⁴⁰Ta ra Felipe chaꝝ ra ñuu Azoto. Ta cuahan ra tahan tahan ñuu, ta cahān ra tuhun ra Cristo chihin ñáyivi nyacua nya cha chaꝝ ra ñuu Cesarea.

Nu nachinó iñi ra Saulo chi ra Cristo
(Hch. 22.6-16; 26.12-18)

9 Cha ni ri ca cha chicá noo ra Felipe cahán ra tuhun ra Cristo chihin ñáyivi, ra Saulo ña sandihí ra tuhun cha nducú cahñi ra chi ñu yihí cuenda Sutu Mañi yo. Ta chahān ra nu nyaá ra cuví nuu chi tata sutu, ²chicacān ra noo tutu chi ra, tacuhva nacuhva ra cuhun ra vehe ñuhu ñuu Damasco, ta tiin ra chi ñu cuahan ityi ra Cristo, ta quichi nyaca ra chi ñu vehe caa Jerusalén, rayi o ñusihi. ³Ñihí ra Saulo tutu cuan ta cuahan ra. Ta cuhva cha cuachaa ra ñuu Damasco cuan, sana cuii ri iñi ra, ta quichí noo nduva ñuhū ityi andiví, sacundichin nicachico maa nu cuahan ra. ⁴Tyicuan ta ra Saulo nduva ra nu ñuhú. Ta chiñi ra noo ndusu cha catyí tyehe caa:
—Saulo, Saulo, ¿ñáá tuhun cha chicá nyicon chí yuhu? —catyí ndusu cuan chi ra.

⁵Tyicuan ta nacahān ra Saulo ta ndaca tuhun ra chí ra ta catyí ra:

—¿Yóó yoho Tata? —catyí ra.

Tyicuan ta nacahān ndusu cuan chihin ra, ta catyí:

—Yuhu cuví ra Jesús, ra chicá nyicon chí. Suri chí maun sañicuehún, tari sañicuehé sindiqui quiti tahví ñuhu chí ti cha chañi nyaa ti nu noo cha xaan cha saquehen ityi ra chí ti —catyí ra Jesús chí ra.

⁶Tyicuan ta ra Saulo suri ñihi ra chihin cha yuhvi ra. Ta catyí ra:

—Sutu Mañi yuhu, ¿ñáá cha cuñún tyi sacuvi? —catyí ra.

Tyicuan ta Sutu Mañi yo catyí ra chí ra tyehe caa:

—Ndícuita ta quihvun chichi ñuu Damasco chiña. Ta yucuan cucatyí noo ra chuun ñáá cha cusacuvun —catyí ra Jesús chí ra Saulo.

⁷Ra cha candihi chihin ra Saulo, yuhvi xaan ra cacuvi. Ta ña cañihí ra tuhun cahan ra vatyí cachiñi ra ndusu cuan soco yori chí nyehe ra. ⁸Tyicuan ta ra Saulo ndicuita ra. Soco cuhva cha nuñā ra chiti nuu ra, ña cuví ca maa nyehe ra vatyí nducuaꝝ ra. Yucuan chaha, ra tahan ra cayindahā ra ndaha ra ta chinyaca ra chí ra ñuu Damasco cuan. ⁹Yucuan chinyaꝝ ra uñi tahan quivi. Ta ña cuví nyehe ra. Ta niri ña chachí ra, ta ña chihí ra ndutya.

¹⁰Nuu Damasco cuan iyó noo ra chinó iñi chí Nyoo. Ta nañi ra Ananías. Ta nyehe ra noo visión nu catyí Sutu Mañi yo chí ra tyehe caa:
—iAnanías! —catyí ra chí ra.

Tyicuan ta nacahān ra Ananías, ta catyí ra:

—Ma yuhu ihya, Sutu Mañi yuhu —catyí ra chí ra.

¹¹Tyicuan ta Sutu Mañi yo catyí ra:

—Nd̄icuita, ta c̄uhun noo ityi cahn̄u cha nañi Ndōo. Ta n̄anducun vehe noo ra cha nañi Judas. Ta nd̄aca tuhun sivi noo ra cha nañi Saulo, ra ñuu Tarso. Vatyí chicán tahvi ra chi Nyoo. ¹²Ta nyehé ra noo visión, ta nyehé ra chi noo ra nañi Ananías. Ta chaá ra nu nyaá ra, ta tyisó ra ndaha ra síqui ra tacuhva cuví nanyehe ra inga chaha —catyí Sutu Mañi yo chi ra Ananías.

¹³Tyicuan ta nacah̄an ra Ananías ta catyí ra:

—Sutu Mañi yuhu, cuaha xaan ñáyivi nacatyí chii vatyí cuaha xaan cha ña vaha chinyacuví ra Saulo cuan chihin ñu yihí cuendon nya ñuu Jerusalén. ¹⁴Ta vityin vachi tucu ra ihya vatyí chah̄a ra cacuví nuu chi tata sutu ityi chi ra cha tyihi ra chi ñáyivi chicán tahvi chihin sivun vehe caa —catyí ra Ananías chi Sutu Mañi yo.

¹⁵Soco Sutu Mañi yo catyí ra chi ra:

—Cūhan vatyí yuhu cha nacachi vahi chi ra Saulo cuan, vatyí cahan ra tuhun chihin ñáyivi inga ñuu, ta chihin rey inga ñuu, ta suri cahan tucu ra chihin ñáyivi Israel ñand̄ihi. ¹⁶Yuhu cusañahi chi ra yoso caa cha cuaha t̄indoho cunyehe ra cha cuende —catyí Sutu Mañi yo chi ra Ananías.

¹⁷Tyicuan ta cuahan ra Ananías vehe nu nyaá ra Saulo. Chāa ra vehe cuan ta quih̄vi ra chichi vehe. Ta tyisó ra ndaha ra síqui ra Saulo, ta catyí ra chi ra tyehe caa:

—Yañi Saulo, Sutu Mañi yo ra Jesús ra tuv̄i nuun ityi vachun, ican ra tachi

chii vatyí tacuhva cuví nanyehun inga chaha. Ta cusacutu ra chuun chihin Tatyí Ii ra —catyí ra Ananías chi ra Saulo.

¹⁸Caa cuhva ri cuan ta can̄a coyo noo cha tari caa soo tiyaca cha yih̄i ch̄iti nuu ra Saulo. Tyicuan ta cuví nanyehe ra inga chaha. Yah̄a cuan ta condutȳa ra. ¹⁹Yah̄a cuan ta chachi ra. Ta ndunyēe coño ñuhu ra inga chaha. Ta ndōo ra suhva quivi chihin ñu yihí cuenda ra Cristo ñuu Damasco cuan.

Nu quichah̄a cahan ra Saulo tuhun ra Cristo chihin ñáyivi ñuu Damasco

²⁰Tyicuan ta numi ri quichah̄a cahan ra Saulo tuhun ra Cristo chihin ñáyivi tand̄ihi vehe ñuhu ñu Israel ñuu Damasco cuan. Ta catyí cachi ra vatyí ra Jesús, Sehe Nyoo cuví chi ra. ²¹Nd̄ii cuii maa ñáyivi cha chiñ̄i tuhun cahán ra, iyo vavaha cuñí ñu. Ta catyí ñu chi tahan ñu:

—¿Atu ñima ra ihya cuví ra cha chica nyicon chi ñu chicán tahvi chihin sivi ra Jesús ityi ñuu Jerusalén cuan? ¿Atu suri ñima ra cuví cha vachi t̄iin chi ñu ityi tyehe vatyí cucuhva cuenda ra chi ñu chi ra cacuví nuu chi tata sutu? —catyí ñu.

²²Soco ra Saulo ñihi ca cahán ra tuhun ra Cristo chihin cha ñi ca ñi ra. Ta sañah̄a ra vatyí ra Jesús cuví ra Cristo, Sehe Nyoo. Nyacua ña cutuñí ñi ra Israel nyicú Damasco cuan nya ityi chino ñi ra.

Nu chinq̄ xehe ra Saulo chi ra Israel

²³Cha yah̄a suhva quivi, ta ra Israel cha ña chinó ñi chi ra Cristo catyih̄i tahan ra tuhun cha cah̄ni ra chi ra Saulo. ²⁴Ta ndiyaca ta ñiyaca

canyatú ra chi ra yuvehe cahnu ñuu cuan. Soco ra Saulo cuan numi ri chito ra tuhun cuan. ²⁵Tyicuan ta ñáyivi cha chinó iñi chi ra Cristo ñuu cuan catyihí ñu chi ra chichi noo tica cahnu. Ta noo cha cuaa casanoq ñu chi ra ityi ventana noo vehe cha cacu chihin barda cha nyaá nicachico yuhu ñuu cuan. Ta tyicuan caa chinqo ra cuahan ra.

Nu ñohó ra Saulo Jerusalén

²⁶Quivi cha chaq ra Saulo Jerusalén, cuñi ra ndu iin ri ra chihin ñu yihí cuenda ra Cristo. Soco tandihí maa ñu cuan ta yuhvi ñu chi ra. Vatyí ña chinó iñi ñu cha yihí ra cuenda ra Jesús. ²⁷Soco noo ra cha nañí Bernabé, naquehen ra chi ra. Ta chaha cuenda ra chi ra chi ra apóstol. Ta nacatyí ra chi ra yoso caa nyehe ra Saulo chi Sutu Mañi yo ra Cristo ityi ñuu Damasco; ta nacatyí ra yoso caa cahan Sutu Mañi yo chihin ra. Ta yoso caa cahan ra tuhun ra Cristo chihin cha ña yuhvi ra nya ñuu Damasco cuan. ²⁸Tyicuan ta ndoq ra Saulo Jerusalén chihin ñu yihí cuenda ra Cristo. ²⁹Ta cahan ra tuhun Sutu Mañi yo chihin cha ña yuhvi ra. Ta ndatuhún xaan ra tuhun ra Cristo chihin ra Israel cha cahan sahan griego. Soco ra cuan cananducy ra cuhva yoso caa ta cacahni ra chi ra. ³⁰Soco cachitó ra hermano cuan vatyí tyicuan caa yihí iñi ra cuan. Yucuan chaha chinyaca ra chi ra Saulo nya ñuu Cesarea. Ta yucuan ta natachi ra chi ra nya Tarso ñuu ra.

³¹Tyicuan ta ñu yihí cuenda ra Cristo cha nyicú tandihí ityi Judea,

ta ityi Galilea, ta ityi Samaria, vii xaan nyicu ñu vatyí ña cuxaan ca ñáyivi chi ñu. Ta ndunyeé ca iñi ñu chihin fuerza Nyoo vatyí quichaha vaha ñu cuhva catyí Nyoo, vatyí yuhví ñu coto ma sacuvi ñu cuhva cuñi ra. Iyó ñu chihin cha tyinyeé Tatyí Ii chi ñu. Ta cuaha xaan ñu cuahan nanduvi.

Nu nduvaha ra Eneas

³²Tyicuan caa cuvi ta ra Pedro tuhvá ra chica noo ra nyehe ra yoso caa canyicu hermano noo noo ñuu. Ta chahan tucu ra chinyehe ra nu nyicu ñu yihí cuenda ra Jesucristo noo ñuu cha nañí Lida. ³³Yucuan nañihí ra chi noo ra cuhvi. Nañi ra Eneas. Ta cha uña cuiya catuví ra ña cuvi nacanda ra vatyí ndundava coño ñuhu ra. ³⁴Soco ra Pedro catyí ra chi ra:

—Yoho Eneas, ra Jesucristo sanduvaha ra chuun. Ndícuita ta natuvi yuvun —catyí ra chi ra.

Tyicuan ta caa cuhva ri cuan ndícuita ra Eneas. ³⁵Ta nyehe tandihí ñáyivi ñuu Lida cuan tyi nduvaha ra. Ta ñáyivi ñuu Sarón ñandihí. Tyicuan ta ñu cuan nachino iñi ñu chi Sutu Mañi yo. Ta sandoo ñu tuhun chahnu cha chinqo iñi ñu ta cumañi ca coto ñu tuhun ra Cristo.

Nu nandoto cu Dorcas

³⁶Quivi cuan chiyo noo ñaha chinó iñi chi ra Cristo ñuu Jope. Ta nañí ña Tabita, soco chihin sahan griego, Dorcas nañí ña. Ta tyicuan ri sacuvi ña cha vaha chihin ñáyivi. Tyinyeé ña chi ñu ndahvi. ³⁷Ta quivi cuan cu Dorcas quehen noo

cuehe chi ña ta chihí ña. Ta cha yahá sacutyí ñu chi ña, chicacun ñu chi ña chichi noo cuarto nu cu uvi piso. ³⁸Ñuu Jope cuan yatyin ri nyaá chihin ñuu Lida, nu nyaá ra Pedro. Ta ñu cha yihí cuenda ra Cristo ñuu Jope cuan chitó ñu vatyí nyaá ra Pedro ñuu Lida cuan. Tyicuan ta tachí ñu chi uvi tahan ra na cucatyí ra chi ra Pedro vatyí naquichi ra cha numi ri. Cuahan ra cuan ta catyí ra chi ra Pedro:

—Coho nya Jope. Sanumi ta ma cucueun —catyí ra chi ra.

³⁹Tyicuan ta ra Pedro ndicuita ra ta cuahan ra chihin ra. Ta cuhva cha chaa ra, chinyaca ra chi ra nya cuarto nu caa ndiyi cuan. Ta tandihi maa ñu chihí yíi catuhva ñu nicachico chata ra. Suri chacú chaa ñu. Ta sañahá ñu sahma cha quicu cu Dorcas ta chinyito ña.

⁴⁰Tyicuan ta ra Pedro tava ra chi tandihi ñáyivi cuarto cuan. Tyicuan ta chicuiñi chiti ra ta quichaha chican tahvi ra chi Nyoo. Tyicuan ta nanyehe ra chi ñaha chihí cuan catuvi ña. Ta quichaha catyí ra chi ña:

—Hermana Tabita, ndicuita —catyí ra chi ña.

Tyicuan ta nandica ña chiti nuu ña. Ta cuhva cha nanyehe ña chi ra Pedro, nicunyaá ña. ⁴¹Tyicuan ta ra Pedro tijn ra ndaha ña ta sandicuita ra chi ña. Tyicuan ta cana ra chi ra hermano, ta chi ñu chihí yíi. Ta nacuhva cuenda ra chi ña chi ñu vatyí nandoto ña. ⁴²Yaha cuan ta ndii cuii maa ñu Jope chitó ñu cha nandoto ña cuan. Ta cuaha vavaha ñu nachino ñi chi Sutu Mañi yo.

⁴³Ta ra Pedro ndoo ra cuaha ri

quivi ñuu cuan. Nyaá ra vehe noo ra satyahyu ñii. Nañi ra Simón.

Ra Pedro ta ra Cornelio

10 Ñuu Cesarea iyó noo ra cha nañi Cornelio. Ta cuví ra capitán cuenda noo ciento sindaro. Ta ityi sindaro cuan, Italia nañi.

²Ta ra Cornelio cuan yuhví ra chi Nyoo ta vaha sacahnú ra chi ra, maa ra ta ñáyivi chi ra ñandihí. Ta siin ri cuaha vavaha xuhun chahá ra chi ñu ndahvi ñu Israel. Ta tyicuan ri chicán tahvi ra chi Nyoo.

³Ta cuví noo quivi cuan cuhva cha caa uñi cha cha ñi, nyehe ra noo visión. Ta yucuan cuví nu cachi xaan nyehe ra vatyí noo ángel cha tachí Nyoo quihvi nu nyaá ra, ta catyí ra chi ra:

—iYoho Cornelio! —catyí ángel cuan chi ra.

⁴Tyicuan ta nanyehe ra Cornelio chi ángel cuan. Ta yuhvi xaan ra cuvi. Ta quichaha ndaca tuhun ra ta catyí ra:

—¿Náa cha cuví ihya, Tata? —catyí ra chi ángel cuan.

Tyicuan ta ángel cuan quichaha catyí ra chi ra:

—Nyoo chiñi ra ndii cuii maa cha chicón chi ra. Ta tahán ñi ra vatyí tyinyeé xaun chi ñu ndahvi. ⁵Ta vityin cuñi chi cha tachun tyiño nya ñuu Jope na cuquehen chi noo ra cha nañi Simón Pedro. ⁶Ta maa ra cuan cuacatyí ra chuun ñáa cha tahán chi sacuvun. Ta iyó ra vehe noo ra cha nañi tucu Simón, cuví ra noo ra satyahyú ñii. Ta iyó vehe ra yuhu tyañuhu —catyí ángel cuan chi ra Cornelio, ta cuahan ángel cuan.

⁷Ta cha yaha cuahan ángel cuan, ra Cornelio cana ra chi uvi tahan musu ra, ta chi noo sindaro cha chinó xaan iñi chi Nyoo. Ta cuví tucu ra noo ra sahá cuenda chi ra Cornelio ñandihí. ⁸Ndii cuii tuhun cahán ángel cuan chihin ra Cornelio ta nacatyí ra chi nduñi tahan ra cuan. Ta tachí ra chi ra ñuu Jope.

⁹Tuvi inga quivi ta cuahan coyo ra cuan. Ta cuhva cha cuachaa coyo ra yuhu ñuu Jope cuan, ra Pedro ndaa ra xiñi vehe vatyí cuacacan tahvi ra chi Nyoo, ta cha cuñí hora cuví cuhva cuan. ¹⁰Ta chaa noo soco chi ra ta chisocó vavaha ra. Soco cha niri ca cha sanduvahá ñu cha cachi ra, quichaha nyehe ra noo visión. ¹¹Ta nyehe ra vatyí nicuitacoho andivi. Ta nyehe ra cua noo noo sahma cahnu vavaha ityi andivi. Ta tari quivi nuhñi noo noo tutun sahma cuan ta cuahan noo ityi nu ñuhu. ¹²Ta chichi sahma cuan ñohó tandihí maa nuu quiti cha cumi tahan chaha. Ta tandihí nuu coo, ta tandihí nuu saa. ¹³Tyicuan ta chiñi ra noo ndusu cha catyí chi ra:

—Pedro, ndicuita ta cahñi quiti ihya, ta cahun —catyí ndusu cuan chi ra.

¹⁴Soco ra Pedro nacahan ra ta catyí ra:

—Ma cachi, Sutu Mañi yuhu. Yuhu ña tuhvé chachi quiti cha catyí ley tyi yica cha cachi ndi —catyí ra Pedro.

¹⁵Tyicuan ta quichaha catyí tucu ndusu cuan chi ra inga chaha:

—Ma catyun vatyí yica cha cahun noo cha cha yaha sanduvii

yuhu —catyí ndusu cuan chi ra Pedro.

¹⁶Uñi tahan chaha sañaha Nyoo visión ihya chi ra. Tyicuan ta sahma cahnu cuan nandaa cuanuhu tucu ityi andivi. ¹⁷Cha niri ca cha chicá xiñi ra Pedro ñáa cha cuñi chi catyí visión cuan, chaa coyo musu cha tachí ra Cornelio. Ta candaca tuhun ra nya nyaá vehe ra Simón. ¹⁸Ta cha chaa coyo ra ityi yuvehe candaca tuhun ra tatu yucuan iyó noo ra cha nañi Simón Pedro. ¹⁹Ta ra Pedro suri cha chicá xiñi ra ñáa cha cuñi chi catyí visión cha nyehe ra. Tyicuan ta Tatyí Ii quichaha catyí chi ra:

—Nyehe Pedro, uñi tahan ra nanducú chuun. ²⁰Ndicuita ta cahun chihin ra, ta ma quihí uvi iñun vatyí mai tachí chi ra ihya —catyí Tatyí Ii chi ra.

²¹Tyicuan ta ra Pedro noo ra nu canyicu ra cha tachí ra Cornelio, ta catyí ra chi ra:

—Yuhu cuví ra nanducú ndo. ¿Ñáa tyiño vachi ndo?

²²Tyicuan ta canacahan musu ra Cornelio ta catyí ra:

—Ra Cornelio, ra cuví capitán chi ndi ican tachí chi ndi. Noo ra vaha xaan ñáyivi cuví. Ta vaha xaan quichahá ra nu cahán Nyoo. Ta tandihí maa ra Israel ityi Judea ihya cacuñi ra chi ra chaha cha cuenda cha vaha ñáyivi cuví ra. Ta noo ángel Nyoo catyí chi ra vatyí na cana ra chuun, vatyí cahun vehe ra vatyí tacuhva cuiñi ra tuhun cha cuacahun —cacatyí musu ra Cornelio chi ra Pedro.

²³Tyicuan ta chaha ra Pedro quihvi coyo ra chichi vehe. Ta

candoꝝ ra chihin ra cha cuaa cuan. Ta cha inga quiví cuan ta cuahan ra Pedro chihin ra. Ta cuahan suhva ra hermano cha iyó Jope cuan ñandíhi.

²⁴Cha inga quiví chaꝝ coyo ra nya Cesarea nu nyatú ra Cornelio chi ra chihin ñáyiví chi ra, ta chihin tandíhi ra tahan ra. ²⁵Cuhva cha chaꝝ ra Pedro vehe ra, ra Cornelio quita ra ta cahan ra chihin ra. Ta chicuini chiti ra nuu ra ta quichaha sacahnu ra chi ra. ²⁶Soco ra Pedro nacoñehē ra chi ra, ta catyí ra chi ra:

—Ndícuíta vatyí noo rayi ri cuví yuhu tari yoho, ta ñima Nyoo cuví —catyí ra chi ra.

²⁷Ta cha niri ca cha cahán ra chihin ra, quihví ra ta nanyehe ra cuaha ñáyiví candu iin ri.

²⁸Tyicuan ta catyí ra Pedro chi ñu:

—Nyoho chitó ndo vatyí ley nyuhu cha cuví ndi ñu Israel, ña chahá chi cha cu iin ri ndi chihin ñáyiví inga ñuu. Ta ni ri chichi vehe ñu ta ma cuví quihví ndi. Soco Nyoo sañahꝝ ra chii, ta catyí ra: “Yoho, ma catyun chi ni noo ñáyiví tyi ña vaha ñu”, catyí Nyoo chii. ²⁹Yucuan chaha quiví cha canꝝ ndo chii, numi ri vachi. Ta vityin cuñí cote ñáá cuenda canꝝ ndo chii —catyí ra Pedro chi ra Cornelio.

³⁰Tyicuan ta nacahan ra Cornelio, ta catyí ra:

—Cha iyó cumi quiví vityin, suri maa cuhva ihya cha nyaí vehi ta ña chachí ta chicán tahví chi Nyoo cha cha iñi. Ta tuví noo ra nui. Ñihno ra noo sahma xiño vavaha. ³¹Ta catyí ra chii: “Yoho Cornelio, Nyoo chiñí ra cha chicán tahvun. Ta nicohón

iñi ra cha sacuvún vatyí tyinyeún chi ñu ndahvi. ³²Tachi tyiño nya ñuu Jope na quichi ra Simón Pedro. Nyaá ra vehe inga tucu ra cha nañí Simón, noo ra cha satyahyu ñii. Ta vehe ra nyaá vatyin ri yuhu tyañuhu. Ta na quichi ra Simón Pedro ta cahan ra chuhun”, catyí ángel cuan chii. ³³Tyicuan ta numi ri tachi tyiño vatyí cuquehen chuun. Ta vaha vatyí vachun. Ta vityin tandíhi yo nyicú yo nuu Nyoo. Ta cuñí ndi cuiñi ndi tandíhi cuii maa cha tachi Sutu Mañi yo chuun vatyí nacatyun chi ndi.

Nu cahán ra Pedro tuhun ra Cristo vehe ra Cornelio

³⁴Tyicuan ta quichaha cahan ra Pedro ta catyí ra:

—Vityin cutuñi iñi vatyí Nyoo cuñí ra chi tandíhi ñáyiví. Cuví ri yo ñu Israel, o cuví ri yo ñu inga ñuu. ³⁵Soco naquehen ra chi yo tatu quichaha yo chi ra, ta sacuví yo cha vaha. ³⁶Cahan ra chihin nyuhu ñu vachi tata ra Israel, ta sacotoꝝ ra vatyí nduvaha coo yo chihin ra cha cuenda ra Jesucristo. Maa ra nyacá ñaha tandíhi maa yo. ³⁷Nyoho chitó vaha ndo tandíhi cha cuví ñuu Israel ñui, yoso caa quichahꝝ chi nu cuví Galilea cha yahꝝ cha cahan noo ra Juan nuu ñáyiví, ta sacondutyꝝ ra chi ñu. ³⁸Chitó ndo yoso caa chahꝝ Nyoo tunyee iñi Tatyí Ii ra chi ra Jesús, ra Nazaret. Ta chicꝝ noo ra sacuví ra cha vaha, sanduvahꝝ ra chi tandíhi ñu cha nyehé tindoho sahá ra ña vaha. Tyehe caa sacuví ra Jesús vatyí Nyoo nyaá ra chihin ra. ³⁹Nyuhu cuví ndi cha ndaa tandíhi

cha sacuvī ra Jesús nīcahnu Judea ta ñuu Jerusalén. Yahā cuan ta chahñī ñu chi ra nu cruzi. ⁴⁰Soco sanandoto Nyoo chi ra nu cu uñi quivi. Ta tuvī ra nuu ndi. ⁴¹Ña tuvī ra nuu tandīhi ñáyivi. Soco tuvī ra nuu nyuhu vatyī nacachī ra chi ndi nyata ityi chata ca vatyī cuvi ndi cha ndaa cuenda ra. Nyuhu chachi ndi ta chihī ndi chihin ra cha yahā cha nandoto ra. ⁴²Ta tachī ra chi ndi vatyī cahan ndi tuhun ra chihin ñáyivi. Ta cuvī ndi cha ndaa vatyī Nyoo cuatyaā ra chi ra Jesús tyi cuvi ra juez chi ñu cha nyitō ta ñu cha chihī. ⁴³Ta tyicuan caa tucu nyata ityi chata ca, cacahan tandīhi ra profeta Nyoo tuhun ra Jesús. Ta cacatyī ra vatyī tandīhi ñu cha chinó ñi chi ra Jesús, cusandachi Nyoo cuatyī ñu cha cuenda maa ra.

Nu naquehén ñu Tatyī Ii ta ñima ñu Israel cuvī ñu

⁴⁴Ni cahán ca ra Pedro ta noq xica ri Tatyī Ii siqui tandīhi ñu tyasohó tuhun cahán ra. ⁴⁵Ta ra Israel cha cayihí cuenda ra Jesús cha chaq coyo chihin ra Pedro iyo xaan cuñí ra vatyī chahā tucu Nyoo Tatyī Ii ra chi ñu cha ñima ñu Israel cuvī. ⁴⁶Chitō ra tyi tyicuan caa cuvī vatyī chiñí ra cahán ñu inga sahan, ta sacahnú ñu chi Nyoo. ⁴⁷Tyicuan ta quichahā catyī ra Pedro chi ra cha chaq coyo chihin ra:

—Ma cuvī casi yo nu condutya ñáyivi ihya. Vatyī cha naquehen tucu maa ñu Tatyī Ii tari maa yo — catyī ra chi ra.

⁴⁸Tyicuan ta tachī ra Pedro chi ñu ni ñihí Tatyī Ii na condutya ñu chihin sivi ra Jesucristo. Tyicuan ta

chacu ndahvi ñu nuu ra Pedro vatyī cuñí ñu cha ndoo ra suhva quivi chihin ñu.

Nu nacatyī ra Pedro chi ñu yihí cuenda ra Cristo Jesús nya Jerusalén yoso caa cuahan chitya tuhun ra inga ñuu

11 Ra apóstol ta inga ra hermano cha nyicú Judea, ñihī ra tuhun vatyī nyacua nya ñu cha ñima ñu Israel cuvī ta naquehén ñu tuhun Nyoo. ²Tyicuan ta nachaā ra Pedro Jerusalén. Ta ra cha catyī vatyī cuñí chi cha sacuvi yo costumbre circuncisión ta cuhva cuvi cacu yo, xaan xaan cuñí ra nyehe ra chi ra Pedro. ³Ta cacatyī ra chi ra tyehe caa:

—¿Ñáá tuhun cha chahun vehe ñu cha ñima ñu Israel cuvī ta chachun chihin ñu? —catyī ra.

⁴Tyicuan ta ra Pedro nacatyī ra nya nu quichaha tandīhi cha cuvī chi ra ta catyī ra:

⁵—Yuhu nyaí ñuu Jope. Ta cuhva cha chicán tahvi chi Nyoo ta nyehī noo visión. Ta nyehī tari noo sahma cahnu cha noó ityi andivi. Tari cha nuhñí noo noo tutun ta cuahan noo ityi nu ñuhú nu nyaí. ⁶Ta nanyehē vahi ñáá cha ñohó chichi. Ta nyehī quitī cha cumi chaha, quitī cuhu, ta coo, ta saa. ⁷Ta chiñī noo ndusu cha catyī chii: “Ndīcuita Pedro. Čahñi quitī ihya ta cāchun”, catyī ndusu cuan chii. ⁸Ta nacahin ta catyī tyehe caa: “Sutu Mañi yuhu, ma cuvī, vatyī ni noo chaha ta ta cachi que coño quitī quiñi caa.”

⁹Tyicuan ta ndusu andivi nacahan chi chihin inga chaha, ta catyī chi: “Ma catyī yoho vatyī ma cachun noo

cha yaha sanduvijí”, catyí ndusu cuan chi. ¹⁰Uñi chaha cuví tyehe caa. Yaha cuan ta nandaá tandíhi chihin sahma cuan ityi andívi. ¹¹Ta caa cuhva ri cuan chaá coyo uñi tahan ra vehe nu nyaí, quita ra ñuu Cesarea ta nanducu ra chii. ¹²Ta Tatyí li tachí chii na cuhin chihin ra. Ta catyí ra chii tyi ma caca iñi cha ñima ñu Israel cuví ñu. Ta chahan coyo tucu iñu tahan ra yañi yo ihya chihin. Ta cha chaá ndi nya Cesarea quihví ndi chichi vehe noo ra. ¹³Ta nacatyí ra cuan chi ndi yoso caa nyehe ra chi noo ángel chichi vehe ra. Nanyaá ángel cuan ta catyí ra chi ra vatyí na tachi ra musu ra ñuu Jope na cana ra chi noo ra cha nañi Simón Pedro. ¹⁴Vatyí ican ra cucatyí ra chi ra yoso caa cacu añima ra ta añima tandíhi ñáyivi chi ra, catyí ángel cuan chi ra cuan na. ¹⁵Ta sacuví ra cuan tari cuhva catyí ángel cuan chi ra. Ta cuhva cha chaj vehe ra quichaha cahín chihin ñu. Ta quichí ri Tatyí li siqui ñu tari quichí siqui yo cha xihna ri. ¹⁶Tyicuan ta nicohon iñi cha catyí Sutu Mañi yo quivi cuan. Ta catyí ra tyehe caa: “Ndicha vatyí ra Juan sacondutyá ra chi ñáyivi chihin ndutya. Soco nyoho cucondutya ndo chihin Tatyí Ii”, catyí ra. ¹⁷Nyoo chaha tucu ra Tatyí Ii ra chi ñu cuan tari chaha ra chi maa yo quivi chino iñi yo chi Sutu Mañi yo Jesucristo. Ta cha tyicuan caa ¿yóo ra cuvi yuhu vatyí casi cha sacuví Nyoo? —catyí ra Pedro chi ra.

¹⁸Tyicuan ta cuhva cha cachíñi ra yañi yo ra Jerusalén tuhun cuan ña nacahan ca ra. Ta casacahnu ra chi Nyoo. Ta cacatyí ra:

—Tu tyicuan caa cuví, cuñí chi catyí vatyí Nyoo chahá tucu ra chi ñu cha ñima ñu Israel cuví vatyí ndu uvi iñi tucu maa ñu cuatyí ñu, ta coo ñu ñáyivi cha ma naa ca maa —cacatyí ra.

Ñu yihí cuenda ra Cristo ñuu Antioquía

¹⁹Quivi cha cachahñi ra chi ra Esteban, quichaha chica nyicon ra chi inga ñu yihí cuenda ra Cristo. Ta yihí ñu cachino ñu ta cuahan coyo ñu ityi Fenicia. Ta inga ñu nya noo ñuhú cha nyaá mahñu tyañuhu cha nañí Chipre. Ta yihí ñu chaá coyo ñu ñuu Antioquía. Ta suri cahan ñu tuhun ra Cristo soco iin ri maa chihin ñu Israel. ²⁰Ta chihin ñu cha cuahan coyo cuan, ndihí suhva ñáyivi ñuhú Chipre. Ta yihí tucu suhva ñu ñuu Cirene. Ta cha chaá coyo ñu ñuu Antioquía, ta quichaha cahan tucu ñu cuan chihin ñu cha ñima ñu Israel cuví. Ta sacoto ñu tuhun Sutu Mañi yo Jesús, ra cha sacacu añima yo. ²¹Ta tunyee iñi Sutu Mañi yo nyaa chihin ñu. Ta yucuan chaha cuaha ñáyivi casandoq ñu tuhun chahnu cha chino iñi ñu. Ta nachino iñi ñu chi Sutu Mañi yo. ²²Tyicuan ta chaá tuhun cuan nya Jerusalén. Ta ñu yihí cuenda Cristo tachí ñu chi ra Bernabé na cuhun ra nya Antioquía. ²³Ta cha chaá ra Bernabé Antioquía cuan, nyehe ra yoso caa nasocó Nyoo chi ñu. Ta ndusii xaan cuñí ra. Ta cahán ra nuu ñu na cunyicon ñu chi Sutu Mañi yo chihin cha ñi iñi ñu. ²⁴Tyicuan caa sacuví ra Bernabé vatyí cuví ra noo ra vaha. Tyitú ra chihin Tatyí Ii. Ta chinó

xaan iñi ra chi Nyoo. Ta tyicuan caa ta cuaha ñáyiví quihví ñu cuenda Sutu Mañi yo. ²⁵Cha yaha cuan ta cuahan ra Bernabé cuananducu ra chi ra Saulo nya ñuu Tarso. Ta cha nañihí ra chi ra, chinyaca ra chi ra nya ñuu Antioquía. ²⁶Ta cachinyicu ra chihin ñu yihí cuenda Nyoo ñuu cuan noo cuiya nanií ta sañaha ra tuhun Nyoo chi cuaha ñáyiví. Ta suri ñuu Antioquía cuan cuvi nu quichaha catyi ñáyiví: Cristiano chi ñu, o ñu yihí cuenda ra Cristo cuví cuan.

²⁷Ta quívi cuan chaá coyo ra cachahá cuenda tuhun cahán Nyoo, ra cacuví profeta. Quita ra ñuu Jerusalén ta chaá coyo ra Antioquía. ²⁸Ta noo ra cuan nañí ra Agabo chicuinanyaá ra nu nyicú ra yihí cuenda ra Cristo ta cahan ra tuhun cha chahá Tatyí Ii chi ra. Ta catyí ra vatyí cuquichi noo tama nicacahnu ñayiví. Ta tyicuan caa cuví quívi chinyaá ra Claudio cuví ra rey cahnu. ²⁹Tyicuan ta ñu yihí cuenda Cristo nya Antioquía tyihí tahan ñu tuhun vatyí cucuhva ñu yoso cuhva cundaa iñi maa noo noo ñu, vatyí cutyinyee ñu chi ñu yihí cuenda Cristo cha iyó ityi Judea. ³⁰Tyicuan caa sacuví ñu ta sacuhun ñu xuhun chi ra cuví nuu chi ñu yihí cuenda Cristo nya Jerusalén. Ta ra Bernabé ta ra Saulo chinyaca ra xuhun cuan.

Nu chihí ra Jacobo ta nu quihví ra Pedro vehe caa

12 Ta quívi cuan quichaha chica nyicon rey Herodes chi suhva ñu yihí cuenda ra Cristo. ²Ta tachí ra tyiño vatyí na cahñi ra

chi ra Jacobo yañi ra Juan chihin mityí. ³Ta nyehe ra Herodes vatyí tahan xaan iñi ñu Israel cha sacuví ra tyicuan caa, ta tyihí ra tyiño vatyí tiin ndihí ra chi ra Pedro. Ta cuví chi noo quívi vico pascua nu tuhva ñu chachi ñu pan cha ñahri yuchan iya yihí chihin. ⁴Cha yaha cha tiin ra chi ra Pedro, tyihí ra chi ra vehe caa. Ta cumi ityi sindaro sahá cumi chi ra. Ta cumi sindaro cha noo ityi ra ta sahá cuenda ra suhva suhva cuhva chi ra. Ta tyaá ra Herodes cuhva vatyí nayahá vico cuan ta cucuhva cuenda ra chi ra chi ñáyiví. ⁵Ta tyicuan caa ñohó ra Pedro vehe caa. Ta sindaro cuan sahá cumi vaha xaan ra chi ra. Soco cha ni ri ca cha ñohó ra yucuan, ñu yihí cuenda ra Cristo chicán tahvi xaan ñu nyita cuii ri maa cha cuenda ra.

Nu sacacü Nyoo chi ra Pedro vehe caa

⁶Ta tyaá ra Herodes cuhva vatyí cha ñaha ri inga quívi cuan cutava ra chi ra Pedro nuu ñáyiví. Ta suri cha cuaa cuan ra Pedro quixí vavaha ra mahñu uvi sindaro cuan. Ta nuhñí ra chihin uvi cadena. Ta uvi ca sindaro canyicú ra yuvehe casahá cumi ra. ⁷Ta tañi ri ta tuví noo ángel cha tachí Sutu Mañi yo. Ta ndundichin ri chichi vehe caa cuan. Ta ángel cuan tiin ra xiin ra Pedro. Ta sandoyo ra chi ra. Ta catyí ra chi ra:
—Sanumi. Ndícuíta —catyí ángel cuan chi ra.

Tyicuan ta ndachí cadena cha nuhñi ndaha ra Pedro. ⁸Ta ángel cuan catyí ra chi ra:

—Nacuhñi vaha chichun ta natyihí ndichan chahun —catyí ángel cuan.

Tyicuan caa sacuví ra Pedro. Ta catyí ángel chi ra:

—Quehen sahmon ta tyaun chaton ta quichun chate —catyí ángel cuan chi ra Pedro.

⁹Ta ra Pedro quitá ra chata ángel cuan. Soco ña chitó ra tatu cha ndicha o cha ña ndicha cuví cuan, ta cuñi maa ra vatyí visión nyehé ra. ¹⁰Soco cuahan ra chata ángel cuan ta cayahá ra noo nu sahá cumi sindaro. Tyicuan ta cayahá ra inga tucu nu casahá cumi sindaro cuan. Yahá cuan ta chaá coyo ra yuvehe caa cahnu nu quita ñáyivi ta quihvi ñu chichi ñuu. Ta yuvehe cuan nuña ri maa. Ta quitá coyo ra. Ta cha yahá yaha ra noo ityi cahnu, ta sandoq ángel cuan chi ra. ¹¹Tyicuan ta nacotoq ra Pedro vatyí ndicha ta quichaha catyi ra:

—Ndicha, ñima visión cuví. Soco maa Sutu Mañi yo tachí ra noo ángel vatyí sacacú ra chii ndaha ra Herodes ta ndaha ra Israel —catyí ra Pedro.

¹²Chicá xiñi ra tuhun ihya ityi cuahan ra. Ta chaá ra vehe cu María sihi ra Juan Marcos. Ta cuaha xaan ñu canyicú cuan chicán tahvi ñu chi Nyoo. ¹³Ta cuhva cha sacachan ra Pedro yuvehe nuquehe, quitá noo ñaha tyivaa cha nañi Rode chinyehe ña yóo cha sacachan cuan. ¹⁴Soco cuhva cha nichon soho ña ndusu ra Pedro, ña nuña ña yuvehe. Vatyí sii xaan cuñi ña, ta chino ña cua nacatyí ña. Ta catyí ña vatyí ra Pedro nanyaá ra yuvehe. ¹⁵Tyicuan ta quichaha catyí ñu chi ña:

—Loco yoho —catyí ñu chi ña.

Soco ña cuan catyí ña vatyí ndicha cha cahán ña. Soco ñu cuan catyí ñu tyi ñima ra Pedro cuví ra, soco ángel cuenda ra cuví, catyí ñu.

¹⁶Ta ra Pedro sañihí ca ra sacachan ra yuvehe. Ta cuhva cha nuña ñu ta nanyehé ñu chi ra, iyo xaan cuñi ñu ta yuhvi ñu cuví.

¹⁷Soco savahá ra seña chihin ndaha ra nacutaxin ñu. Ta nacatyí ra chi ñu yoso caa tavá Sutu Mañi yo chi ra vehe caa. Ta catyí ra chi ñu:

—Nacatyí ndo chi ra Jacobo ta chi inga yañi yo —catyí ra.

Ta quitá ra ta cuahan ra inga ityi. ¹⁸Cuhva cha cundichin, iyo cacuvi sindaro cha sahá cumi chichi vehe caa cuan, vatyí ña cachitó ra yoso caa quitá ra Pedro. ¹⁹Tyicuan ta tachí ra Herodes cunanducu chi ra. Ta vatyí ña nañihí ra chi ra, tyicuan ta tachí ra na cacahñi ra chi ra sahá cumi vehe caa cuan. Yahá cuan ta quitá ra Herodes ityi Judea cuan ta cuahan ra ñuu Cesarea cuacoo ra.

Nu chihí ra Herodes

²⁰Ta ra Herodes cuxaan xaan ra chihin ñáyivi ñuu Tiro ta ñáyivi ñuu Sidón. Soco cuñi ñu cuan nduvaha coo ñu chihin ra vatyí ñuu cha nyacá ñaha ra yucuan quitá cha cachi ñu. Tyicuan ta ndu iñ ri ñu ta cuahan coyo ñu cuacutahan ñu chihin noo ra cha nañi Blasto. Ican ra sahá cuenda chi ra Herodes. Ta chicán ñu cha nduvaha coo ra Herodes chihin ñu. ²¹Tyicuan ta catyí ra Herodes vatyí cuhun ñu nu nyaá ra noo quivi. Ta chaá quivi cuan ta ndihvi noo ra sahma tyiño ra. Ta chicunyaa ra nu tyayu

cahnu ra. Ta cahān noo ra nuu ñu.

²²Tyicuan ta quichaha canachaa ñáyivi, ta catyí ñu:

—Ra cha cahán ihya ñima noo rayii ri cuví ra. Nyoo cuví ra — catyí ñu.

²³Ta caa cuhva ri cuan noo ángel Sutu Mañi yo chaha ra noo cuehe chi ra Herodes vatyí chaha ra cha catyí ñáyivi tyi Nyoo cuví ra. Ta quihvi tīndacu chi ra, ta chihí ra.

²⁴Soco tuhun Nyoo cuahan chitya ca. Ta cahān ñu tuhun Nyoo tandihi ri ityi. ²⁵Quivi cha ndihí tyiño saha ra Bernabé ta ra Saulo nya Jerusalén, cuanuhu coyo ra ñuu Antioquía. Ta cuahan tucu ra Juan Marcos chihin ra.

Nu quichaha cachicá ra Saulo ta ra Bernabé tyiño Nyoo

13 Vehe ñuhu Antioquía cuan iyó ra cacuví profeta Nyoo. Ta iyó tucu ra cha sañahá tuhun Nyoo chi ñáyivi. Ta sivi ra cuan ican cuvi ihya: Ra Bernabé, ra Simón Toon, ra Lucio ra ñuu Cirene, ra Manaén cha chahnū iin ri chihin ra Herodes cha cuví rey ityi Galilea, ta ra Saulo. ²Ta noo quivi nyicú tandihi ra ta casacahnú ra chi Sutu Mañi yo. Ta casahá ra ayunar: ña cachachi ra ta cananducu ra chi Nyoo cuví cuan. Tyicuan ta catyí Tatyí Ii chi ra:

—Tava siin ndo chi ra Bernabé ta ra Saulo cha cuenda tyiño cha cané chi ra —catyí Tatyí Ii chi ra.

³Tyicuan ta cha ndihi saha ra ayunar, ta catyiso ra ndaha ra siqui ra, ta cachican tahvi ra chi Nyoo cha cuenda ra. Ta cacahan ra chihin ra tahan ra ta cuahan coyo ra.

Nu cahán ra apóstol tuhun Nyoo ñuhu Chipre

⁴Yaha cuan tachí Tatyí Ii chi ra Bernabé ta chi ra Saulo noo ñuu cha nañí Seleucia. Tyicuan ta cuahan coyo ra. Ta yucuan caquihvi ra chichi noo barcu ta cuahan ra nya ñuhú Chipre cha nyaa mahñu tyañuhu. ⁵Yucuan ta cachaa coyo ra noo ñuu yuhu tyañuhu cha nañí Salamina. Ta quichaha cahan ra tuhun Nyoo vehe ñuhu ra Israel. Cuahan tucu ra Juan chihin ra vatyí tyinyee ra chi ra. ⁶Tyicuan ta cuahan coyo ra cahán ra tuhun Nyoo noo noo ñuu cha nyaa Chipre cuan nyacua nya chaa coyo ra ñuu cha nañí Pafos. Ta yucuan nañihi ra chi noo ra Israel cha nañí Barjesús. Ta chitó ra tuhun tasí. Cuví ra noo ra cuendu vatyí catyí ra vatyí cuenda Nyoo cahán ra. ⁷Ta ra tasi cuan nyaá ra chihin gobernador Sergio Paulo. Ta ra Sergio cuví ra noo ra cachi iñi. Ta cana ra chi ra Bernabé ta chi ra Saulo, vatyí cuñí ra cuiñi ra tuhun Nyoo. ⁸Ta ra tasi cuan nañí tucu ra Elimas, ta chasí ra nu chino iñi gobernador cuan chi ra Cristo. ⁹Tyicuan ta ra Saulo cha nañí tucu Pablo, tyitú ra chihin Tatyí Ii. Ta nyehe vavaha ra chi ra Elimas cuan. ¹⁰Ta catyí ra chi ra: —Yoho ra sandaví ñaha, cuendu xaun. Sehe cuihna cuví chuun. Ta cuñún sativun tandihi cha vaha. Ta tyicuan ri chasún ityi vaha Sutu Mañi yo. ¹¹Ta vityin Sutu Mañi yo cutachi tuñi ra chuun, vatyí cunducuaun. Ta ma cuvi nyehun ñuhū ñanyii suhva quivi —catyí ra Pablo chi ra Elimas.

Tyicuan ta caa cuhva ri cuan ta nducuaa ra. Ta ndoo ra nu ñaa iñi. Ta nducu ra noo ra tiin ndaha ra vatyí ña ndichin ca nyehé ra. ¹²Cuhva cha nyehé gobernador cuan cha cuví chi ra Elimas, chino iñi ra chi ra Jesucristo. Vatyí iyo cuñi ra nyehé ra cha sañahá Sutu Mañi yo.

Cuahan ra Pablo ta ra Bernabé nya ñuu Antioquía ityi Pisidia

¹³Ra Pablo ta ra tahan ra quihví ra chichi noo barcu ñuu Pafos. Ta cuahan coyo ra nya ñuu Perge ityi Panfilia. Soco ra Juan Marcos sandoq ra chi ra ta cuanuhu ra nya Jerusalén. ¹⁴Yahá cuan ta caquita ra Perge cuan, ta cuahan coyo ra ñuu Antioquía cha nyaá ityi Pisidia. Yucuan quihví coyo ra chichi vehe ñuhu ñu Israel ta cuví chi noo quiví nyitatu ñu. Ta chicunycu ra. ¹⁵Tyicuan ta quichahá sacuahá ñáyivi nu libru ley cha tyaá ra Moisés. Ta sacuahá tucu ñu libru cha tyaá ra cacuví profeta Nyoo ta cha naha. Yahá cuan ta ra cacuví nuu vehe ñuhu catyí ra chi ra hermano nyicú cuan, vatyí tatu iyó noo tuhun cuñí ra cahan ra chihin ñáyivi, cuví cahan ra. ¹⁶Tyicuan ta ndicuitá ra Pablo ta sacuví ra noo seña chihin ndaha ra vatyí na cutaxin ñu. Ta catyí ra:

—Cuñi ndo nyoho ra Israel, ta nyoho cha quichahá ndo chi Nyoo. ¹⁷Nyoo cuenda yo, ñu Israel, nacachi vaha ra chi sutu chahnu yo. Ta quiví cha iyó ca ñu ityi Egipto sacuví ra noo ñuu cahnu chi ñu. Vasi ñima ñáyivi ñuu cuan cuví ñu, soco sanducuaaha ra chi ñu. Yahá

cuan ta tava ra chi ñu ityi cuan chihin tunyee iñi chi ra. ¹⁸Ta cunyeé iñi Nyoo tandihi cuhva chiyo ñu nu chicá noo ñu ñuhú ityi chichi cha uvi xico cuiya. ¹⁹Ta sanaa ra ucha tahan ñuu nahnu cha chiyo ñicahnu Canaán, vatyí chahá ra ñuhú cuan chi sutu chahnu yo. ²⁰Yahá cuan ta sacuví Nyoo vatyí cunyaca ñaha maa maa ri juez chi ñáyivi cuan. Tari noo cumi ciento sisava cuiya chinyaca ñaha juez chi ñu nyacua nya quiví chinyaca ñaha ra profeta Samuel chi ñu. ²¹Tyicuan ta maa ñu chican ñu noo rey cha cunyaca ñaha chi ñu. Ta Nyoo chahá ra chi ra Saúl sehe ra Cis chi ñu, vatyí cunyaca ñaha ra chi ñu. Ta ra Saúl vachi ra tata ra Benjamín. Ta uvi xico cuiya chinyaca ñaha ra chi ñu. ²²Yahá cuan ta Nyoo tava ra chi ra Saúl cha cuví ra rey. Ta chahá ra vatyí cuví ra David rey. Ta catyí ra: “Nyehí vatyí ra David sehe ra Isaí cuví ra noo rayii cha tahan iñi cuhva iyó. Ta cusacuví ra tandihi cha cuñí yuhu”, catyí Nyoo tuhun ra David. ²³Ta minoo ra vachi tata ra David cuan ican cuví ra Jesús. Ta maa Nyoo tachí chi ra vatyí sacacu ra chi yo ñu Israel, tari catyí ra chi sutu chahnu yo. ²⁴Ta cumañi ca quichi ra Jesús, ra Juan ra sacondutya chi ñáyivi cahan ra nuu tandihi ñáyivi Israel. Ta catyí ra chi ñu vatyí cuñí chi cha ndu uvi iñi ñu cuatyí ñu, ta condutya ñu. ²⁵Ta cha cuandihí tyiño saha ra Juan ta catyí ra: “¿Atu cuñí maa ndo vatyí yuhu cuví noo ra cahnu cha saquichí Nyoo? Soco ñima yuhu cuví ra cahnu cuan. Vatyí chata cha yahá yuhu ta vachi nonga ra. Ta ni

ndichan nyaá chaha ra ta ña nañé cha ndachi. Vatyí cahnu xaan ra cuví ra”, catyí ra Juan.

²⁶Hermano —catyí ra Pablo— nyoho ñu vachi tata ra Abraham, ta nyoho cha quichahá ndo chi Nyoo. Cha cuenda nyoho cuví tuhun ihya tyi sañahá Nyoo chi yo yoso caa cacu añima yo. ²⁷Ñáyivi ñuu Jerusalén ta ra cuví nuu chi ñu cuan, ña chitó ñu vatyí ra Jesús cuví ra cha sacacú chi yo. Ta ni ña cutuñí iñi ñu tuhun cha catyaa ra profeta Nyoo ta cha naha, vasi sacuahá vavaha ñu tuhun cuan tandihí quívi cha nyitatu ñu, soco ña cutuñí iñi ñu. Ta quívi chahñi ñu chi ra Jesús chinó cava tari cuhva catyí ra profeta Nyoo cuan. ²⁸Vatyí vasi ñahri cuatyí ra nañihí ñu, soco chicān ñu chi ra Pilato na tyihí ra tyiño cucahñi chi ra. ²⁹Ta cha yahā sacuví ñu chi ra tari cuhva catyí maa tuhun ra nu libru Nyoo ta chihí ra. Tyicuan ta sanoq ñu chi ra nu cruzi. Ta tyihí ñu chi ra chichi ñuhú. ³⁰Soco Nyoo sanandoto ra chi ra. ³¹Ta chichi cha cuaha quívi tuví ra nuu ra cha quichi coyo chihin ra quívi quitā ra ityi Galilea, ta quichi ra Jerusalén. Ta ican ra cuan cacahán tuhun ra chihin ñáyivi vityin. ³²Ta yucuan chaha nyuhu cahán ndi tuhun vaha cha catyí Nyoo chi sutu chahnu yo vatyí cuhva ra chi yo. ³³Vatyí cha cuenda cha vaha chi maa yo cha cuví yo ñáyivi vachi tata ñu cuan, sacuví maa Nyoo cha catyí ra. Vatyí sanandoto ra chi ra Jesús tari cuhva nyaá nu cu uvi salmo nu catyí Nyoo tyehe caa: “Sehi cuví chuun, ta yuhu chahí ñáyivi coun

vityin”, catyí Nyoo. ³⁴Nyoo tyaa ra cuhva vatyí sanandoto ra chi ra, tacuhva cha ma tyahyu coño ñuhu ra. Vatyí catyí nu tutu Nyoo: “Cuhve chi nyoho cha vaha cha catyí chi ra David.” ³⁵Yucuan chaha catyí tucu nu inga salmo tyehe caa. “Ma cuhvon cha tyahyu coño ñuhu Sehe iun”, catyí chi. ³⁶Ra David sacuví ra tyiño nuu ñu cha chiyó quívi chiyó ra, yoso cuhva cha catyí Nyoo chi ra tyi sacuví ra. Yahā cuan ta chihí ra ta chicuchí ñu chi ra tari chicuchí ñu chi sutu ra. Ta tyahyu coño ñuhu ra. ³⁷Soco ra cha sanandoto Nyoo chi, ña tyahyu coño ñuhu ra. ³⁸Yañi, cuñí chi coto ndo vatyí cha cuenda cha chihí ra Jesús tyiño nuu yo, Nyoo sahá ra ticahnu iñi cuatyí yo. ³⁹Ta cha cuenda ra Jesús sahá Nyoo ticahnu iñi chi tandihí ñu cha chinó iñi chi ra, tyi ley ra Moisés ña cuví sacuvaha chi yo nuu Nyoo. ⁴⁰Saha ndo cuenda coto ndoo siquí ndo cha catyaa ra profeta Nyoo nu catyí ra tyehe caa:

⁴¹Nyehe nyoho, ra chacú nyaa, tahán chi cha iyo cuñi ndo ta cunaa ndo. Vatyí yuhu cuví Nyoo, ta sacuví minoo cha cahnu quívi cha iyó ndo vityin.

Soco ma chino iñi ndo tandihí cha sacuví yuhu vasi nacatyí ñáyivi chi ndo, catyí Nyoo.

⁴²Ndihí cahan ra Pablo ta cuaquita ra chata vehe ñuhu cuan chihin ra tahan ra. Tyicuan ta ñu cha ñima ñu Israel cuví quichaha catyí ñu chi ra, vatyí na cahan tucu ra tuhun ihya chihin ñu inga vitya quívi cha nyitatu ñu. ⁴³Cuhva cha ndihí ndu iin ri ñu, cuaha xaan

ñu Israel ta ñu cha yihí cuenda ñu Israel, cachinyicon ñu chi ra Pablo ta chi ra Bernabé. Ta chaha ra tuhun chi ñu vatyí na cuhun ca ñu ityi nuu ca chihin Nyoo. Ta naquehen vaha ñu tumañi iñi cha chahá Nyoo chi ñu. ⁴⁴Cha inga vitya quiví nyitatu ñu, ndu ñin ri ñu. Ta cha yatyin cha tandihí ñáyivi ñuu cuan ndu ñin ri ñu vatyí cuiñi ñu tuhun Nyoo. ⁴⁵Soco cuhva cha canyehe ra Israel, cuxaan ra vatyí nyehe ra vatyí cuaha ñáyivi nyicón chi ra cuan. Ta quichaha cacuvi yuhu ra chihin ra Pablo, ta cacahan ra chi ra. ⁴⁶Soco ña yuhví ra Pablo ta ra Bernabé. Ta quichaha cacatyí ra chi ra:

—Cuñi chi cha cahan xihna ndi tuhun Nyoo chihin nyoho cha cuví ndo ñu Israel. Soco ña cuñi ndo naquehen ndo. Ta cuñi maa ndo vatyí ña naña ndo cha ñihi ndo ñáyivi chaa cha ma naa ca maa. Yucuan chaha cuhun ndi cucahan ndi chihin ñu cha ñima ñu Israel cuví. ⁴⁷Vatyí tyicuan caa tachí Sutu Mañi yo chi ndi ta catyí ra tyehe caa:

Tyai chuun tari ñuhú chi ñáyivi nicahnu ñuhu ñáyivi.

Tacuhva vatyí cusañahun ityi chi ñu yoso caa cacu añima ñu, catyí Nyoo.

⁴⁸Cuhva cha cachini ra cha ñima ra Israel cuví, ndusiñi cuñi ra. Ta quichaha catyí ra vatyí tuhun Nyoo vaha xaan. Ta nachino iñi tandihí ñu cha nacachi maa Nyoo chii, vatyí coo ñu ñáyivi chaa cha ma naa ca maa. ⁴⁹Ta tyicuan caa chitya tuhun Nyoo tandihí ityi ñuu cuan. ⁵⁰Soco ra Israel cacahan ra chihin

suhva ñusihí tyayii cha nyicón ley ra Moisés. Catyí ra chi ñu vatyí ña vaha tuhun cahán ra Pablo. Ta cahán tucu ra chihin ra cuví nuu chi ñuu cuan. Ta yucuan cuvi nu quichaha chica nyicon ñu chi ra Pablo ta chi ra Bernabé, nyacua nya cha tava ñehe ñu chi ra ñuu cuan. ⁵¹Tyicuan ta canaquisi ra ñiyaca chaha ra tari noo seña vatyí ndoo cuatyí ñáyivi cuan siqui maa ñu. Ta cuahan coyo ra ñuu Iconio. ⁵²Soco ñu yihí cuenda Nyoo ñuu Antioquía cuan sii xaan cacuví chi ñu. Ta tyitu ñu chihin Tatyí Ii.

Nu ñohó ra Pablo ta ra Bernabé ñuu Iconio

14 Ñohó ra Pablo ta ra Bernabé ñuu Iconio. Ta caquiñvi ra chichi vehe ñuhu ñu Israel. Ta vaha xaan cacahan ra tuhun Nyoo chihin ñáyivi. Ta cuaha xaan ñu nachino iñi ñu chi ra Cristo, ñu Israel ta ñu cha ñima ñu Israel cuví ñandihí. ²Soco ra Israel cha ña chinó iñi chi ra Cristo catyiyuhú ra chi ñu cha ñima ñu Israel cuví vatyí caca ña vaha iñi ñu nyehe ñu chi ra yihí cuenda ra Cristo. ³Yucuan chaha ra Pablo ta ra Bernabé candoo ra yucuan cuaha quivi. Ta chihin cha ñi iñi ra cacahan ra tuhun ra Cristo. Ta chinó xaan iñi ra chi Sutu Mañi yo. Ta Sutu Mañi yo tyinyee ra chi ra cha cacahan ra tuhun ra yoso caa cuñi ra chi yo. Ta chaha Sutu Mañi yo cha cacuvi ra seña ta milagru tacuhva coto ñáyivi tyi ndicha cha cahan ra. ⁴Soco ñáyivi ñuu, ña ñin ri cuví ñu. Yihí ñu cuahan ñu tumañi iñi chi ra Israel. Ta inga tucu ñu cuahan ñu tumañi

iñi chi ra apóstol. ⁵Tyicuan ta ra Israel ta ra cha ñima ra Israel cuví, catyihí tahan ra tuhun chihin ra cuví tyiño, vatyí cahan ña vaha ra siqui ra, ta catuchí ra yuu chi ra. ⁶Soco ra Pablo ta ra Bernabé ñihí ra tuhun vatyí cusacuvi ra tyicuan caa, ta cuahan coyo ra nya ñuu Listra, ta nya ñuu Derbe ityi Licaonia. Ta cachica noo ra ityi cuan. ⁷Ta cacahan tucu ra tuhun Nyoo yoso caa sacacu ra añima yo.

**Nu cañi ñáyivi yuu chi ra
Pablo nya ñuu Listra**

⁸Nya Listra iyó noo rayii cha pehe chaha. Ta nya ndaha cacu ra ta ña cuví caca ra. Vatyí pehe ninduvi chaha ra. ⁹Ta suri maa ra pehe chaha cuan tyasohó vavaha ra nu cahán ra Pablo. Ta ra Pablo, tuví iñi ra vatyí chinó iñi ra cuan vatyí cuví nduvaha ra. ¹⁰Tyicuan ta ra Pablo cahan ra chihin cha chaa ndusu ra, ta catyí ra:

—Ñicuinyaa ndoo —catyí ra Pablo chi ra.

Ta ra cuan, noo ri caña ndava ra, ta nicuinyaa ra. Ta quichaha chica ra. ¹¹Cha nyehé ñáyivi cha sacuvi ra Pablo, quichaha cana chaa ñu chihin sahan Licaonia, ta catyí ñu:

—Nyoo cha tari caá rayii chaá coyo nu nyicú yo —catyí ñu.

¹²Ta catyí ñu tyi ra Bernabé cuví ra noo nyoo cha nañí Júpiter, ta ra Pablo cuví nyoo cha nañí Mercurio, vatyí ican ra cuví ra cahán. ¹³Ta iyó noo tata sutu cuenda Júpiter cuan, saha cumí ra vehe ñuhu cha nyaá yuhu ñuu ri cuan. Ta quichí nyaca ra toro ta ita vatyí maa ra ta ñáyivi

cuñí ñu sacahnu ñu chi ra Pablo ta chi ra Bernabé. Ta cuacahñi ñu toro tyi cuacuhva cuenda ñu chi ra, vatyí cuñí ñu tyi nyoo cacuví ra. ¹⁴Soco cuhva cha catuvi iñi ra apóstol, ra Bernabé ta ra Pablo, cha chicá xiñi ñu, quichaha chahnya ra sahma ra. Ta casacuví ra tyicuan caa tari noo seña vatyí ña ndoo ra vaha. Ta quihvi coyo ra mahñu nu tuvi ñáyivi, ta cacana chaa ra, ¹⁵ta catyí ra:

—Nyoho tata, ¿ñáá tuhun cha nyacuví ndo tyehe caa? Nyuhu rayii ri cuví ndi tari maa ndo. Ta vachi ndi vatyí catyí ndi chi ndo vatyí na saña ndo cha sacuvi ndo tyehe caa. Vatyí ña chiñuhu maa cha tyehe caa. Ta na cunyicon ndo chi Nyoo nyitó. Vatyí ican ra savaha andivi ta ñuhu ñáyivi. Ta savaha ra tyañuhu ta tandihi cha iyó chichi tyañuhu cuan. ¹⁶Ta tyiembu chahnu ta nya vityin, Nyoo saña ndaha ra chi ñáyivi na sacuvi maa ñu yoso cuhva cuñí ñu, ¹⁷vasi tyicuan ri sañahá ra chi ñu yóo ra cuví ra, chihin cha vaha cha sacuví ra. Maa ra sacoón ra savi nu canyicú yo. Chahá ra cha vaha coo tyiño saha yo quivi tahan chi. Ta chahá ra cachi yo. Ta chahá ra cha cusii cuñí añima yo —catyí ra Pablo chi ñu.

¹⁸Soco vasi catyí ra tyicuan caa, yii xaan ta chasi ra cha cahñi ñu toro cuan, vatyí cuñí ñu sacahnu ñu chi ra chihin cuan.

¹⁹Tyicuan ta chaá coyo suhva ra Israel, ra ña chinó iñi chi ra Cristo, ra ñuu Antioquia, ta ra ñuu Iconio. Ta tyiyuhu ra chi ñáyivi, ta catyí ra vatyí na tuchi ñu yuu chi ra Pablo. Ta tyicuan caa sacuvi ñu. Ta

cuñi maa ñu vatyí cha chihí ra. Ta xita quiñocho ñu chi ra ityi chata ñuu. ²⁰Soco candu iin ri ra cayihí cuenda Nyoo nu catuví ra Pablo. Ta ndicuita ri ra. Ta quihvi ra inga chaha chichi ñuu. Ta cha inga quivi cuahan ra ñuu cha nañí Derbe ta cuahan ra Bernabé chihin ra.

²¹Ta cahan tucu ra tuhun Nyoo nya ñuu Derbe yoso caa sacacu Nyoo añima yo. Ta cuaha ñáyivi nacuhva ñu chi ñu chi Nyoo. Yaha cuan ta cuanuhu coyo ra ityi quichi ra. Ta yaha ra ñuu Litra ta ñuu Iconio inga chaha, ta nachaa ra nya Antioquía. ²²Ta tandihí ñuu cuan sanduní ca ra iñi ñu yihí cuenda Nyoo. Ta catyí ra chi ñu na cuhun ñu ityi nuu ca chihin cha chino iñi ñu Nyoo. Ta catyí tucu ra chi ñu vatyí tatu cuñi yo cha cunyacá ñaha Nyoo chi yo, cuñi chi cha nyehe yo tindoho. ²³Ta canatyiso ra chi ra ca quihí ndaha chi ñu yihí cuenda Nyoo noo noo vehe ñuhu. Ta cananducu ra Nyoo chihin cha ña chachí ra xita ta cachican tahvi ra chi Nyoo cha cuenda ra. Yaha cuan ta catyí ra chi ra:

—Chino iñi ndo chi Sutu Mañi yo. Maa ra na cocumi ra chi ndo — catyi ra chi ra.

Nu cuanuhu coyo ra Pablo ta ra Bernabé Antioquía ityi Siria

²⁴Yaha cuan ta yaha coyo ra Pablo ta ra Bernabé ityi Pisidia, ta chaa coyo ra ityi Panfilia. ²⁵Cacahan ra tuhun Nyoo ñuu Perge. Yaha cuan ta chahan ra ñuu Atalia. ²⁶Yucuan quihvi coyo ra chichi noo barcu ta cuanuhu coyo ra Antioquía. Yucuan cuví ñuu nu

natyaa ñu chi ra ndaha Nyoo tyi cusacuvi ra tyiño nuu ra, ta vityin cha nachaa coyo ra. ²⁷Cuhva cha nachaa coyo ra Antioquía sandu iin ri ra chi ñu yihí cuenda Nyoo. Ta nacatyí ra chi ñu tandihí cha sacuvi Nyoo chihin ra. Ta yoso caa nuña Sutu Mañi yo ityi vatyí chinó tucu iñi ñu cha ñima ñu Israel cuví. ²⁸Ta naha xaan ndoo ra Pablo ta ra Bernabé chihin ñu yihí cuenda Nyoo ñuu cuan.

Nu casandaa ra apóstol tyiño nya Jerusalén

15 Nyaá ca ra Pablo ta ra Bernabé Antioquía, ta chaa coyo ra quita coyo ityi Judea. Ta quichaha sañahá ra chi ra yihí cuenda Nyoo. Ta catyí ra vatyí cuñi chi sacuvi ra costumbre circuncisión tari cuhva catyí ra Moisés, tyicuan ta cacu ra. ²⁻³Ta ñihi xaan cahan ra Pablo ta ra Bernabé chihin ra cuan cha cuenda cuan. Tyicuan ta catyiso ñu hermano Antioquía cuan chi ra Pablo ta ra Bernabé chihin suhva ca ra vatyí cuhun coyo ra Jerusalén. Vatyí cusandaa ra tyiño ihya chihin ra apóstol ta ra yihí ndaha ñu nyicu vehe ñuhu ñuu Jerusalén cuan. Tyicuan ta cuahan coyo ra. Ta ityi cuahan ra, yaha ra ityi Fenicia ta Samaria. Ta canacatyí ra chi ñu yihí cuenda Nyoo yoso caa saña ñu cha ñima ñu Israel cuví tuhun chahnu cha chino iñi ñu. Vatyí nacuhvá cuenda ñu chi ñu chi Nyoo. Ta tandihí ñu hermano cusii xaan cuñi ñu cha chitó ñu tuhun cuan. ⁴Quivi chaa coyo ra Pablo ta ra Bernabé Jerusalén, cuahan ra nu

ndu iin ri ñu yihí cuenda Nyoo. Ta tandihi ñu chihin ra apóstol, ta ra yihí ndaha chi ñu, chahā ñu lugar chi ra. Ta canacatyī ra tandihi cha sacuví Nyoo chihin ra. ⁵Soco suhva ra fariseo cha cachinó iñi chi ra Cristo, nicuinanyaa ra ta catyí ra:

—Tandihi ra cha ñima ra Israel cuví ta chinó iñi ra chi ra Jesús, niñi cuñí chi cha sacuvi ra costumbre circuncisión. Ta cuñí tucu chi cha sacuví ra cuhva catyi ley cha tyaa ra Moisés —catyí ra.

⁶Tyicuan ta candu iin ri apóstol ta ra yihí ndaha chi ñu vehe ñuhu vatyí candatuhun vaha ra tuhun cuan. ⁷Cha yahā cha cuviyuhu vavaha ra ta ndicuita ra Pedro, ta catyí ra:

—Yañi, chitó ndo vatyí chichi cha tandihi yo cachī Nyoo chi yuhu ra ndahvi quivi cuan, vatyí cahin tuhun yoso caa cacu añima yo chihin ñu cha ñima ñu Israel cuví, vatyí nachino iñi ñu chi Sutu Mañi yo. ⁸Ta Nyoo, ra chitó añima tandihi ñáyivi, sañahā ra chi yo vatyí cuñí ra chi ñu cuan. Ican tuhun chahā ra Tatyí li ra chi ñu, tari chahā ra chi yo. ⁹Nyoo ña sahá ra tyi vaha ca yoó cha nuu ñu cuan. Soco sanduvií tucu ra añima maa ñu cha cuenda cha chinó iñi ñu chi ra. ¹⁰Vityin ñacaca xiñi yo cuhva cuñí Nyoo. Vatyí ña vaha cha tyisó yo ley ra Moisés siqui ñu. Vatyí niri maa sutu chahnu yo ta niri maa yo ta ña cuvī naquehen vaha yo ley cuan. ¹¹Ñima tyicuan caa cacú yo. Yoó chitó yo vatyí cacú yo chihin tumañi iñi cha sacuví Sutu Mañi yo Jesús chihin yo. Ta tyicuan caa tucu ñu cuan —catyí ra Pedro chi ra.

¹²Tyicuan ta taxi ri cacuvi tandihi ra. Ta tyasohō ra tuhun cahan ra Bernabé ta ra Pablo. Vatyí canacatyī ra seña ta milagru cha sacuvi Nyoo nu cacahan ra tuhun Nyoo nu nyicú ñu cha ñima ñu Israel cuví. ¹³Cuhva cha ndihi cahan ra, quichaha cahan ra Jacobo, ta catyí ra:

—Nyoho yañi, cuiñi ndo tuhun cahín. ¹⁴Cha nacatyī ra Simón Pedro chi yo yoso caa quichaha chahā Nyoo tumañi iñi chi ñu cha ñima ñu Israel cuví. Vatyí cachī tucu ra chi suhva ñu vatyí cuvī ñu noo ñáyivi cuenda ra. ¹⁵Ta iin ri nanduvi tuhun ihya chihin tuhun cha cahan ra profeta cuenda Nyoo ta cha naha, tari cuhva nyaa nu tutu Nyoo tyehē caa:

¹⁶Yaha tandihi tuhun ihya cuquichi tiqui nu nyaá ndo. Quivi chiyo ra David, vaha sacahnu ñáyivi chii. Soco yahā cuan sandihi ñu tuhun cha sacahnu ñu chii. Soco cuquichi tiqui ta tari cha cunacoñehi vehe ñuhu ra David inga chaha. Vatyí cusacahnu tucu ñáyivi chii.

¹⁷Tacuhva cuví nanducu tandihi ca ñáyivi chii, tandihi ñu cha ñima ñu Israel cuví cha chicán tahvi chihin sivi.

¹⁸Tyicuan caa catyī Sutu Mañi yo ta sañahā ra tuhun ihya chi ñáyivi chiyo ta cha naha ta chi ñáyivi cha iyó vityin.

¹⁹Yucuan chaha catyí yuhu vatyí ña vaha sayanga yo chi ñáyivi cha ñima ñu Israel cuví cha sandoo ñu tuhun cha chiyo ñu ta quihvi ñu cuenda ra Cristo. Ña vaha catyí yo

tyi cuñí chi cha quichaha ñu ley chahnu. ²⁰Vaha ri maa chihin cha sacuhun yo tutu chi ñu. Ta catyi yo chi ñu vatyí ma cachi ñu coño cha chaha cuenda ñáyivi chi xitohyo. Ta ni noo ñu ta ma coo ri maa ñusihi o rayii chi ñu, tatu ñima ñasihi o yii ñu cuví. Ta ma cachi ñu coño quití chihí cha cava ñu sucun ta ña chatí niñi. Ta ma cachi ñu niñi. ²¹Vatyí nyata tyembu ta chiyo ra cha sañahá ley ra Moisés vehe ñuhu ñu Israel ta sañaha ra tuhun cuan tahan tahan ñuu. Ta tahan uña quivi quivi nyitatu ñu, sacuaha ra tuhun cha tyaq ra Moisés —catyi ra Jacobo chi ra.

²²Tyicuan ta ra apóstol ta ra cayihi ndaha chi ñu nyicú vehe ñuhu chihin tandíhi ñu yihí cuenda Nyoo nacachi ñu chi suhva ra. Ta yaha cuan ta tachí ñu chi ra vatyí cuhun ra Antioquía chihin ra Pablo ta ra Bernabé. Ta ra cha canatyiso ñu ican cuví ra Judas cha nañí Barsabás, ta ra Silas. Ican ra cacuvi ra ra cananyisó tyiño vehe ñuhu ñuu Jerusalén cuan. ²³Ta chihin ra tachi ñu noo carta. Ta catyi carta cuan tyehé caa:

“Nyuhu ra apóstol, ta ra yihi ndaha chi ñu nyicú vehe ñuhu ta yañi ndo cuenda Nyoo, tandíhi ri ndi chahá ndi nocumi chi nyoho cha ñima ra Israel cuví ndo vatyí yañi ndi cuví chi ndo vasi ñima ñu Israel cuví ndo. Tandíhi ri ndo cha iyó ndo Antioquía ta nyoho ñu Siria, ta ñu Cilicia ñandíhi, sacuhún ndi carta ihya chi tandíhi ri ndo. ²⁴Chitó ndi vatyí quitá suhva ra ityi nu nyicú ndi ihya. Ta cuahan ra nu nyicu ndo. Soco ña catyi nyuhu

chi ra tyi cuhun ra cusayanga ra chi ndo chihin tuhun cahan ra. Satondo ra cuan xiñi ndo vatyí catyi ra chi ndo tyi cuñí chi cha sacuvi ndo costumbre circuncisión ta naquehen vaha ndo ley ra Moisés. Soco ñima nyuhu catyi tyi cuhun ra cucatyí ra chi ndo tyicuan caa. ²⁵Yucuan chaha ndu iin ri ndi ta nacachi tahan tuhun cahan ndi ta vaha cuñi ndi cha tachi ndi chi ra hermano ihya chihin ra Pablo ta ra Bernabé nu nyicu ndo. ²⁶Nduvi tahan ra ihya nyehé xaan ra tindoho cha cuenda Sutu Mañi yo. Ta vasi cuñí ñáyivi cahñi ñu chi ra soco ña sandíhi ra tuhun cha sacoto ra tuhun Sutu Mañi yo Jesucristo. ²⁷Ta yucuan chaha tachí ndi chi ra Judas ta chi ra Silas. Ta maa ra cucahan ra chihin yuhu ra chihin ndo, vatyí nacatyí ra tandíhi cha tyaq ndi nu tutu ihya. ²⁸Vatyí niri Tatyí li ta niri nyuhu ta ña cuñi ndi tyiso ca ndi carga siqui ndo, soco ihya ri cha niñi ca tahán chi cha naquehen vaha ndo. ²⁹Ma cachi ndo coño cha chaha cuenda ñu chi xitohyo. Ta suri ma cachi ndo niñi, ni coño quití cha chihí ta ña chatí niñi ti. Ta ma coo ñusihi o rayii chi ndo tatu ñima ñasihi ndo o yii ndo cuví. Tatu ma sacuvi ndo tyicuan caa, vaha xaan cuaco ndo. Ta Nyoo na cocumi ra chi ndo”, catyi ra nu carta cuan.

³⁰Ta cuahan coyo ra cha catachi ra chi cuan. Ta chaq coyo ra Antioquía. Ta sandu iin ri ra chi tandíhi ñu, ta nacuhva cuenda ra carta cuan. ³¹Cuhva cha sacuaha ñu carta cuan ndusi xaan cuñi ñu vatyí vaha xaan cahan chi. ³²Ta ra

Judas ta ra Silas cuví tucu ra cuan profeta cuenda Nyoo. Ta sanduniꝝ ra iñi ra hermano chihin tuhun cahān ra. ³³Ta cha yahā chinyicu ra cuan suhva quivi ta cuanuhu coyo ra nya nu nyicú ñu catachi chi ra. Ta tandihi ñu yihí cuenda ra Cristo catyí ñu vatyí na cuhun vaha ra. ³⁴Soco ra Silas natyaā ra cuhva vatyí cundoo ra. ³⁵Ta ra Pablo ta ra Bernabé candoꝝ tucu ra Antioquía yucuan. Ta maa ra chihin cuaha ca ra casañaha ca ra chi ñáyivi. Ta cacahan ca ra tuhun Sutu Mañi yo chihin ñu.

Nu cu uvi chaha cuahan ra Pablo tuhun Nyoo ta nu cusiin ra chihin ra Bernabé

³⁶Ta cha yahā suhva quivi ta catyí ra Pablo chi ra Bernabé: —Coho inga chaha cunyehe yo nu nyicú ñu yihí cuenda ra Cristo tandihi ri ñuu nu cahān yo tuhun Sutu Mañi yo. Vatyí nyehe yo yoso caa canyicu ñu —catyí ra chi ra.

³⁷Ta ra Bernabé cuñí ra cha cuhun tucu ra Juan Marcos chihin ra. ³⁸Soco ra Pablo ña tahán iñi ra cha cuhun ra Juan chihin ra, vatyí sandoꝝ ra chi ra nya Panfilia quivi cuan. Ta ña chahan ca ra chisaha tyiño ra chihin ra. ³⁹Ta ña chitahan iñi ni noo ra, ta cacusiin ra. Ra Bernabé cuahan ra chihin ra Juan Marcos. Ta quihvi ra chichi noo barcu ta cuahan coyo ra Chipre. ⁴⁰Ta ra Pablo cachí ra chi ra Silas. Ta cha yahā chican tahvi ra hermano chi Nyoo na tyinyee ra chi ra, ta cuahan coyo ra. ⁴¹Ta yahā ra ityi Siria, ta ityi Cilicia, ta sanduniꝝ ca ra iñi ñu yihí cuenda Nyoo noo noo ñuu.

Nu cuahan ra Timoteo chihin ra Pablo ta ra Silas

16 Ra Pablo ta ra Silas chaꝝ coyo ra ñuu Derbe, ta ñuu Listra. Ta yucuan nañihí ra chi noo ra yihí cuenda Cristo. Nañí ra Timoteo. Ta sihi ra cuví ña noo ñaha Israel. Ta suri yihí tucu ña cuenda ra Cristo. Soco sutu ra ra Grecia cuvi ra. ²Vaha xaan chicá ra Timoteo chihin Nyoo catyí ñu yihí cuenda Cristo ñuu Listra ta ñuu Iconio. ³Ta ra Pablo cuñí ra cha cuhun ra Timoteo chihin ra. Ta saha ra circuncidar chi ra Timoteo. Vatyí coto ma cuiñi ñu Israel cha iyó ityi cuan tuhun ra Cristo cha cahān ra. Vatyí tandihi ñu chitó ñu vatyí sutu ra cuví ra ra ñuu Grecia. ⁴Tyicuan ta cuahan coyo ra noo noo ñuu. Ta nacatyí ra chi ñu yihí cuenda ra Cristo tuhun cha chahā ra apóstol ta ra yihí ndaha chi ñu nyicu vehe ñuhu Jerusalén chi ra. ⁵Ta tyicuan caa ta nduniꝝ ca iñi ñu yihí cuenda ra Cristo ta chino ca iñi ñu chi Nyoo. Ta tahan quivi ta cuahan nducuaha ca ñu.

Nu nyehé ra Pablo noo visión chi noo ra Macedonia

⁶Ña chahā Tatyí Ii cha cahan ra tuhun Nyoo ityi Asia. Yucuan chaha yahā sava ra ityi Frigia nu iyó xahñi ñuhu chihin ityi Galacia. ⁷Ta chaꝝ coyo tucu ra ityi Misia. Ta cuñí tucu ra cuhun coyo ra ityi Bitinia, soco Tatyí Ii ra Jesucristo ña chahā cuhun coyo ra. ⁸Tyicuan ta nya sava ri yahā ra ñuu Misia ta canoꝝ coyo ra ñuu Troas cha nyaá yuhu tyañuhu. ⁹Cañohó ra ñuu

Troas cuan, ta noo cha cuaa nyehe ra Pablo noo visión. Nyehe ra chi noo rayii ityi Macedonia. Nanyaá ra ta chacú ndahvi ra nuu ra, ta catyí ra chi ra: “Ñaha, vatyí tyinyeun chi ndi”, catyí ra. ¹⁰Ta cha nyehe ra Pablo visión cuan, yuhu ra Lucas chihin ra Pablo ta inga ra sanduvaha ndi chi ndi ta cuahan ndi nya Macedonia cuan. Vatyí chitó vaha ndi vatyí Nyoo cana chi ndi, vatyí cahan ndi tuhun ra yoso caa sacacú ra añima yo chihin ñáyivi ityi cuan.

**Nu ñohó ra Pablo ta ra
Silas ñuu Filipos**

¹¹Quihví ndi noo barcu ñuu Troas. Ta chahan ndoo ityi ri ndi nya Samotracia noo ñuhú luhlu iyó mahñu tyañuhu. Ta cha inga quívi chaá ndi ñuu Neápolis. ¹²Ta yucuan quita ri ndi ta cuahan ndi ñuu Filipos cha cuví noo ñuu cuenda ñu Roma. Ta cuví chi noo ñuu cahnu ca cha nuu tandíhi ñuu ityi Macedonia cuan. Ta yucuan chinyicu ndi suhva quívi. ¹³Noo quívi cha nyitatu ñáyivi ta quita ndi ityi chata ñuu, yatyin noo yutya nu tuhvá ñu chican tahvi ñu chi Nyoo. Chicunyaá ndi yucuan ta cahan ndi tuhun Nyoo chihin ñusihí cha candu in ri yucuan. ¹⁴Noo ñaha nañí ña Lidia. Ta ñuu ña cuví Tiatira. Ta tuhvá ña xico ña sahna finu, tyacu nyaa. Yucuan cuví tyiño sahá ña. Ta sacahnú ña chi Nyoo tari ñu Israel. Ta chiñí ña cha cahán ra Pablo. Ta Nyoo nuña ra añima ña na quichaha ña cha cahan ra. ¹⁵Ta condutyá ña chihin ñáyivi chi ña. Ta yaha cuan ta chacu ndahvi ña nuu ndi, ta catyí ña:

—Tatu nyehé ndo vatyí ndicha cha chinó iñi chi Sutu Mañi yo, ñaha ndo, coo ndo vehi —catyí ña chi ndi.

Ta saniñí ña chi ndi cha ndoo ndi vehe ña.

¹⁶Ta cuví noo chaha cha cuahan ndi nu chicán tahvi ndi. Ta cha niri ca cha cuahan ndi, tahan ndi chi noo ñaha tyivaa. Yihí noo tatyí ña vaha chi ña. Yucuan chaha cuví nacoto ña ñáá ndíhi cha cucuvi ityi nuu. Ta cuví ña noo ñaha iyó chitoho. Ta cuaha xaan xuhun sahá ganaa ña cuenda chitoho ña, vatyí cuví nacotó ña. ¹⁷Ta ñaha tyivaa cuan quichaha nyicon ña chi ndi, ta chi ra Pablo ñandíhi. Ta cana chaa ña ta catyí ña:

—Rayii ihya ra casacuví tyiño nuu Nyoo cahnu cuví ra. Ta cahán ra tuhun yoso caa cuví cacu añima yo —catyí ña.

¹⁸Cuaha quívi sacuví ñaha tyivaa cuan tyicuan caa. Tyicuan ta ra Pablo ña cunyeé ca iñi ra, ta nanyocavá ra ta catyí ra chi tatyí ña vaha cha yihí chi ña:

—Chihin sívi ra Jesucristo catyí chuun vatyí quíton chi ñaha tyivaa ihya —catyí ra.

Ta tatyí ña vaha cuan quita chi chi ña caa cuhva ri cuan.

¹⁹Soco cuhva cha canyehe chitoho ña vatyí ma cuví ca saha ganaa ra xuhun chihin ña, catiñ ra chi ra Pablo ta ra Silas chinyaca ra chi ra nya vehe tyiño. ²⁰Ta cachican ra cuatyí chaha ra nuu ra cacuví tyiño. Ta catyí ra:

—Ra Israel ihya sanaquiquí ra chi ñáyivi ñuu yo. ²¹Ta sañahá ra costumbre cha ña cuví naquehen

yo, niri ña cuví sacuvi yo vatyí ñu cuenda ñuu Roma cuví yo —catyí ra.

²²Tyicuan ta nduxaan ñáyivi chi ra Pablo ta ra Silas. Ta ra cacuví tyiño cuan chahnya ra sahma ra Pablo ta ra Silas ta tachí ra tyiño nacañi ra chi ra chihin yutun.

²³Cha yahā cha cañi vavaha ra chi ra, ta catyihí ra chi ra vehe caa. Ta tachí ra chi ra sahá cumi chi ra na saha vaha ra cuenda chi ra. ²⁴Cuhva cha quehen ra sahá cumi cuan tuhun, tyihí ra chi ra nya chichi cuii vehe caa. Ta tyihí vaha ra chaha ra ticu vitu. ²⁵Soco ñáá cuhva hora ñuu cuan cachitá vavaha ra Pablo ta ra Silas. Ta cachicán tahvi ra chi Nyoo. Ta ra cañohó vehe caa cuan catyasohó ra. ²⁶Ta saná iñi ra ta quichí noo cha taan ñihi vavaha. Ta naquisi chi cimientu vehe caa cuan, ta caa cuhva ri cuan nuñā tandihí yuvehe, ta ndachi cadena tandihí ra ñohó vehe caa cuan. ²⁷Ta cha ndoyo ra sahá cumi cuan, nyehe ra vatyí tacoho yuvehe. Tyicuan ta tava ra mityí ra vatyí cahñi maa ra chi ra. Vatyí chicá xiñi ra vatyí ndihí ra ñohó vehe caa cuan cachino.

²⁸Soco ra Pablo canā chaa ra chi ra, ta catyí ra:

—Ma cahñun chuun, vatyí tandihí ndi nyicú ndi ihya —catyí ra chi ra.

²⁹Tyicuan ta ra sahá cumi cuan chican ra noo ñuhu. Ta quicono ra quihví ra nu cañohó ra. Ta nihí ra chihin cha yuhví ra. Ta chicuñi chiti ra nuu ra Pablo ta ra Silas.

³⁰Numi ri tava ra chi ra nu ñoho ra yucuan. Ta ndacá tuhun ra chi ra ta catyí ra:

—¿Nyoho Tata, yoso caa sacuvi ta cacu añime? —catyí ra chi ra.

³¹Ta ra cuan canacahan ra ta cacatyí ra:

—Chino iñi chi Sutu Mañi yo Jesucristo ta cacun, maun ta ñáyivi chuun ñandihí —catyí ra.

³²Ta cacahan ra tuhun Sutu Mañi yo chihin ra ta chihin tandihí ñu nyicu vehe ra. ³³Ta suri maa cha cuaa cuan ra sahá cumi vehe caa cuan nacatya ra nu cahvi chi nduvi tahan ra nu cañi ra chi ra. Yahā cuan ta maa ra ta tandihí ñáyivi chi ra condutya ñu suri cha cuaa cuan.

³⁴Tyicuan ta chinyaca ra chi ra nya vehe ra. Ta chaha ra cha cachi ra. Ta maa ra chihin ñáyivi chi ra sii xaan cuñi ñu vatyí chinó iñi ñu chi Nyoo. [Tyicuan ta cuanuhu coyo ra nya vehe caa cuan coto cuxaan ra cuví tyiño chihin ra saha cumi chi ra.]

³⁵Tuvi inga quivi ta catachi ra cacuví tyiño chi policia nu nyaá ra sahá cumi cuan, ta catyí ra vatyí na saña ra chi ra Pablo. ³⁶Tyicuan ta ra sahá cumi vehe caa cuan catyí ra chi ra Pablo:

—Chaa tyiño chii saha ra cuví tyiño, vatyí sañe chi ndo. Ican tuhun cha cuví quita ndo vityin —catyí ra chi ra.

³⁷Soco ra Pablo catyí ra:

—Chi nyuhu cha cuví ndi ra cuenda ñuu Roma ican cañi ra nu tuvi. Ta ni ña cutuñi chi ndi tari cuhva tahán chi. Ta tyihí ra chi ndi vehe caa. Ta vityin cuñi ra saña xehe ra chi ndi. Soco ma cuví. Naquichi tava maa ra chi ndi —catyí ra Pablo chi ra sahá cumi cuan.

³⁸Ta ra policia nacatyí ra chi ra cacuví tyiño. Ta ra cuan cayuhvi ra cuví cha cachitó ra vatyí ra cuenda ñuu Roma cuví ra Pablo.

³⁹Ta chahan coyo ra chinandacan ra ticahnu iñi chi ra Pablo ta chi ra Silas. Tyicuan ta catava ra chi ra ta cachacu ndahvi ra nuu ra na quita ra ñuu cuan. ⁴⁰Ta cha quitā coyo ra vehe caa, chahan coyo ra vehe cu Lidia. Ta yaha cuan ta chinyehē ra chi ra hermano ta sanduni ra iñi ra ta cuahan coyo ra.

Nu naquiqui ñáyivi ñuu Tesalónica

17 Nu cuahan coyo ra Pablo ta ra Silas, cayaha coyo ra ñuu Anfípolis, ta ñuu Apolonia. Yaha cuan ta cha coyo ra ñuu Tesalónica nu nyaá noo vehe ñuhu ñu Israel. ²Ta chahan ra Pablo vehe ñuhu cuan tari cuhva tuhva maa ra chahán noo noo ñuu. Ta cahān ra tuhun Nyoo chihin ñáyivi chichi vehe ñuhu cuan uñi tahan quivi nyitátú ñu. ³Quehen ra libru tuhun Nyoo ta sañaha ra tuhun ra Cristo chi ñu yoso caa catyí chi vatyí cunyehe ra tindoho ta cucúvi ra. Yaha cuan cunandoto ra. Ta catyí ra chi ñu vatyí suri maa ra Jesús cha cahán ra tuhun chihin ñu cuví ra Cristo.

⁴Ta suhva ñáyivi Israel cuan nachino iñi ñu. Ta candu iin ri ñu chihin ra Pablo ta ra Silas. Ta cachino tucu iñi cuaha ñu Grecia cha sacahnú chi Nyoo. Ta cuaha ñusihí tyayii ñuu cuan ñandihí. ⁵Soco ra Israel cha ña chinó iñi, quiñi cacuñi ra cha nyehé ra vatyí nyicón ñáyivi chi ra Pablo. Ta sandu iin ri ra chi noo ityi ra quiñi

iyó cha cachicá noo yanga ri maa. Ta sanaquiqui ra ñuu cuan. Ta quihvi ra vehe ra Jasón, nanducú ra chi ra Pablo ta chi ra Silas, vatyí tava ra chi ra, ta nacuhva cuenda ra chi ra chi ñáyivi. ⁶Soco cha cuenda cha ña nañihí ra chi ra Pablo ta ra Silas yucuan, ta quehen ra chi ra Jasón. Ta xitā quiñoho ra chi ra ta chi suhva ca ra hermano ta cuahan coyo ra nuu ra cuví tyiño ñuu cuan. Ta canā chaa ra ta catyí ra:

—Ra ihya cuví ra cachicá noo satondó chi tandihí ñáyivi nicahnu ñuhu ñáyivi. Ta vityin cha coyo tucu ra ihya. ⁷Ta ra Jasón chiña chaha ra vehe ra cunyicu ra. Ta tandihí maa ra ña sahá ra ñáyivi chi ra cuví rey cahnu nya Roma. Vatyí catyí ra vatyí iyó nonga rey ta nañí ra Jesús.

⁸Cha cachiñi ñu tuhun cuan, ñáyivi ta ra cacuví tyiño canaquiqui ñu. ⁹Soco ra Jasón ta inga ra cachaha ra xuhun ta caquita yica ra.

Nu cuahan coyo ra Pablo ta ra Silas ñuu Berea

¹⁰Ta suri cha cuaa cuan quiyi cuii ri casacuhun ra hermano chi ra Pablo ta ra Silas ityi ñuu Berea. Ta cha cha coyo ra yucuan ta chahan coyo ra vehe ñuhu ñu Israel. ¹¹Ta ra Israel cha iyó ñuu Berea cuan vaha ca ñáyivi cacuví ra ta ñima ca ra Tesalónica. Vatyí chihin cha ñi iñi ra naquehen ra tuhun Nyoo. Ta ndiquivi nanducú ra nuu tutu Nyoo, nyehé ra tatu ndicha cha cacatyí ra Pablo ta ra Silas ta ra Timoteo chi ra. ¹²Yucuan chaha cuaha vavaha ñu nachino iñi ñu chi ra Cristo. Ta

ñu Grecia nachino tucu iñi ñu cuan, tari ñusihi tyayii ta rayii ñandihí. ¹³Soco cha cachitō ra Israel cha ca iyó ñuu Tesalónica vatyi ra Pablo ñohó ra Berea cahán ra tuhun Nyoo, ta chahan coyo ra ta sanaquiqui ra chi ñáyivi yucuan. ¹⁴Soco ra hermano numi cuii ri tachí ra chi ra Pablo nya ityi yuhu tyañuhu. Soco ra Silas ta ra Timoteo candog ra Berea. ¹⁵Ta ra cha cuahan coyo chihin ra Pablo chinyaca ra chi ra nya ñuu Atenas. Tyicuan ta cuanuhu coyo ra nya Berea cuanacuhva ra tyiño cha tachí ra Pablo chi ra Silas ta chi ra Timoteo, na sanumi ra ta cuhun ra nu nyaá ra.

Nu ñohó ra Pablo ñuu Atenas

¹⁶Cha niri ca cha nyatú ra Pablo chi ra Silas ta ra Timoteo ñuu Atenas cuan quiñi cuñi añima ra cha nyehé ra vatyi cuaha xaan xitohyo iyó ñuu cuan. ¹⁷Yucuan chaha cahán ra chihin ra Israel, ta chihin inga ra cha tuhvá sacahnú chi Nyoo chichi vehe ñuhu cuan. Ta ndi quivi cahán ra chihin ñu cha nyicu nuyahvi ñandihí. ¹⁸Ta ñihí tahan ra chihin ñu cha sacuaha tuhun sañahá noo ityi ñáyivi cha nañí ñu epicúreo. Ta ñihí tahan tucu ra chihin ñu cha sacuaha tuhun sañahá ñáyivi estoico. Ta cacahan ñu chihin ra. Ta yihí ra catyí ra:

—¿Ñáá tuhun cahan xaan ra ihya? —catyí ra.

Ta inga ra catyí ra:

—Tuhun inga nyoo cahán ra ihya —catyí ra.

Tyehe caa catyí ra vatyi ra Pablo cahán ra tuhun ra Jesús, ta cahán

tucu ra tuhun cha nandoto ñáyivi chihí. ¹⁹Tyicuan ta chinyaca ra chi ra Pablo noo nu nañí Areópago, nu tuhva ra cacuvi tyiño ndu iin ri ra. Ta cacatyí ra chi ra:

—Cuñí ndi coto ndi tuhun chaa cha vachi sañahún. ²⁰Vatyi sacotón tuhun cha ña chitó ndi. Ta cuñí ndi coto ndi ñáá cha cuñí chi catyí tandihí tuhun ihya —cacatyí ra chi ra.

²¹Vatyi tandihí ñu Atenas ta ñu inga ñuu cha iyó yucuan tahán xaan iñi ñu tyasoho ñu ta nacatyí ñu ñáá ndihí tuhun chaa.

²²Tyicuan ta ra Pablo nicuinanyaa ra mahñu nu nyicu ñu yucu Areópago, ta catyí ra:

—Nyoho Tata ñuu Atenas, yuhu nyehí vatyi chinó xaan iñi ndo chi cuaha nyoo. ²³Vatyi chahin chinyehi nu tuhvá ndo savaha ndo culto. Ta nañihí noo arta nu nyaá letra cha catyí: “Cuenda Nyoo cha ña ñohó nuu yo”, catyí letra cuan. Nyoho sacahnú ndo chi Nyoo cuan vasi ña ñohó nuu ndo chi ra. Ican Nyoo cuan cuví cha cahín tuhun chihin ndo. ²⁴Nyoo cha savaha ñuhu ñayiví ta tandihí cha iyó siqui ñuhu ñayiví. Chi maa ra cuví andiví ta ñuhu ñayiví. Ta ña iyó ra chichi vehe ñuhu cha savahá ñáyivi. ²⁵Ta ña itá iñi ra cha tyinyeé ñáyivi chi ra. Vatyi suri maa ra chaha ra ñayiví coo tandihí yo. Ta chahá ra vatyi cha xitá yo. Maa ra chaha tandihí chi yo. ²⁶Cha xihna ri savaha Nyoo chi noo tuhun ri rayii. Ta maa ra cuví sutu tandihí yo. Yucuan chaha noo ri niñi nyisó tandihí yo. Ta chaha Nyoo cha coo yo nicahnu ñuhu ñayiví. Cha ni cumañi ca

savaha ra chi yo ta catyí ra ñáá cuiya coo noo noo yo siqui ñuhu ñayivi ihya. Ta catyí tucu ra nya cucoo noo noo yo. ²⁷Tyicuan caa sacuvi ra vatyí tacuhva quichaha nanducu yo chi ra. Tari nanducú minoo ra cuaa noo cha nanducú ra chihin ndaha ra, vasi tyicuan caa ta cuvi ñañihi yo chi ra. Soco cha ndicha, Nyoo ña cañi nyaá ra chihin noo noo yo. ²⁸Vatyí cha cuenda Nyoo iyó yo ta candá yo. Tari catyí tucu noo ra ñuu ndo, vatyí catyí ra: “Ñáyivi chi Nyoo cuví chi yo”, catyí ra. ²⁹Tatu ñáyivi chi Nyoo cuví yo, ña tahán chi caca xiñi yo vatyí Nyoo cuví ra noo xitohyo cha chino chihin xuhun cuaan, o xuhun cuichin, o chihin yuu vaha cha savahá ñáyivi cuhva chicá xiñi maa ñu. ³⁰Nyoo sahá ra ticahnu iñi chi ñu chiyo ta cha naha, vatyí ña chitó ñu. Soco vityin catyí ra chi tandíhi ñáyivi tandíhi ri ityi vatyí na ndu uvi iñi ñu cuatyí ñu. ³¹Vatyí Nyoo tyaq ra cuhva vatyí coo noo quivi cha cucutuñi chi ñáyivi iyó siqui ñuhu ñáyivi nuu noo ra cha nacachi vaha maa ra chi. Ta sañaha ra chi tandíhi yo vatyí tyicuan caa cuvi vatyí sanandoto ra chi ra cuan cha yaha chihí ra — catyí ra Pablo.

³²Cuhva cha chiñí ñu tuhun cha nandotó ñu chihí, yihí ñu chacu nyaá ñu, ta inga ñu catyí:

—Quichun inga quivi ta cahun tuhun ihya chihin ndi —catyí ñu.

³³Tyicuan ta cuahan ra Pablo.

³⁴Soco yihí ñu chinyicōn ñu chi ra, ta nachino iñi ñu chi Nyoo. Ta noo ra ñañi ra Dionisio, ta cuví ra noo ra cuví tyiño ñuu cha tuhvá ndu iin

nya Areópago cuan. Ta noo ñaha sihi cha ñañi Dámaris chino tucu iñi ña, ta inga tucu ñu ñándihi.

Nu ñohó ra Pablo ñuu Corinto

18 Yaha cuan ta quitā ra Pablo ñuu Atenas ta cuahan ra ñuu Corinto. ²Ta yucuan ñañihí ra chi noo ra Israel tari maa ra. Ñañi ra Aquila. Ta ñuu Ponto cacū ra. Ta maa ra chihin ñasihi ra, cu Priscila quitā ñu Italia. vatyí ra Claudio, ra cuví rey cahnu yucuan, tava ra tandíhi ra Israel. Catyí ra na quita ra ñuu Roma. Ta ra Pablo cuahan ra nu nyaá ñu ñuu Corinto cuan.

³Ta iin ri tyiño sacuví ra chihin ñu. Savahá ñu vehe sahma. Ta ndoo ra chihin ñu vatyí sahá tyiño ñu iin ri. ⁴Ta quivi nyitatu ñu Israel tahan vitya, ra Pablo chahan ra vehe ñuhu ñu. Ta ndatuhun tahan ra chihin ñu Israel ta chihin ñu cha ñima ñu Israel cuví. Vatyí nducú ra cuhva cha chino iñi ñu chi ra Jesucristo.

⁵Ta quivi chaq coyo ra Silas ta ra Timoteo cha quitā ra Macedonia, ra Pablo sandoq ra tyiño sahá ra ta iin ri ca tyiño cha cahán ra tuhun Nyoo nicunyaq ra. Ta catyí cachi ra chi ñu Israel vatyí ra Jesús cuví Cristo ra cha nyatú xaan ñu. ⁶Soco ñu cuan xaan cuñi ñu. Ta quichaha cahan ña vaha ñu siqui Sutu Mañi yo. Tyicuan ta ra Pablo naquisi ra sahma ra tari noo seña vatyí cuandoo cuatyí ñu siqui ñu. Ta catyí ra chi ñu:

—Cuatyí maa ndo cuví tatu cuhun ndo anyaya. Ñahri ca nyaá siqui. Vityin ta ityi nuu ca cuhin cucahin chihin ñu cha ñima ñu Israel cuví —catyí ra chi ñu.

⁷Ta quitá ra vehe ñuhu cuan. Ta cuahan ra vehe noo ra cha nañí Justo. Noo ra cha sacahnú chi Nyoo. Ta nyaá vehe ra ityi xiin vehe ñuhu cuan. ⁸Ta noo ra cha nañí Crispo, ra cuví nuu vehe ñuhu cuan nachino iñi ra chi Sutu Mañi yo, ta ñáyivi chi ra ñandihí. Ta cuaha ca ñáyivi iyó Corinto cuan, cha yahá cha chiñi ñu tuhun cahán ra Pablo, nachino tucu iñi ñu chi ra Jesús, ta condutyá ñu. ⁹Tyicuan ta noo cha cuaa nyehe ra Pablo noo visión. Ta cahán Sutu Mañi yo chihin ra, ta catyí ra:

—Ma yuhvun. Cahán ca tuhín ta ma sandihun cha cahun. ¹⁰Vatyí yuhu nyaí chuhun. Ta yori cuví sataxi iñi chuun. Vatyí cuaha xaan ñáyivi nyaá sacaqui ñuu ihya — catyí Sutu Mañi yo chi ra Pablo.

¹¹Yucuan chaha ra Pablo ndoo ra noo cuiya sisava ñuu Corinto cuan. Sañahá ra tuhun Nyoo chi ñáyivi.

¹²Soco quívi cha cuví ra Galión gobernador nicahnu ityi Acaya cuan, candu iñ ri ra Israel siqui ra Pablo. Ta cachicán ra cuatyí chaha ra nuu ra gobernador. ¹³Ta cacatyí ra chi gobernador cuan:

—Ra ihya tyiyuhú ra chi ñáyivi na sacahnu ñu chi Nyoo noo cuhva cha ñahri nyaá nu ley ndi —cacatyí ra.

¹⁴Tyicuan ta cuhva cha cuanacahan ra Pablo, nacahan ri ra Galión, ta catyí ra chi ra Israel cuan:

—Nyoho ra Israel, tatu cuenda noo cuatyí cahnu o cuatyí ndiyi cuví sandai yoso cuhva tahán chi. ¹⁵Soco maa maa ri tuhun cahán ri cuví ihya. Ta yuhu ña cuñí sandai tyiño ihya, ta siin ri cuenda ley maa ndo cuví. Nyehe maa ndo.

Sandaa ndo tyiño vatyí yuhu ña cuñí cuví juez cuenda ihya —catyí gobernador cuan.

¹⁶Ta tava ra chi ra nu cuví vehe tyiño ra. ¹⁷Tyicuan ta tandihí ra Grecia catiñ ra chi ra Sóstenes, ra cuví nuu vehe ñuhu ñu Israel. Ta cacañi ra chi ra suri maa nuu ra Galión, ra cuví gobernador cuan. Soco ra Galión cuan ña cahán ri ra.

**Nu cuanuhu ra Pablo ñuu Antioquía.
Yahá cuan ta cuahan tucu ra
tuhun Nyoo, cha cu uñi chaha**

¹⁸Ta ra Pablo ndoo ca ra ñuu Corinto cuaha quivi. Yahá cuan ta catyí ra chi ra hermano vatyí cuhun ra. Ta cuahan ra Aquila chihin cu Priscila chihin ra Pablo. Tyicuan ta chaá coyo ñu Cencrea. Ta ra Pablo satya ndii ra xiñi ra vatyí sacuví ra noo cha tyaá ra cuhva tyi sacuvi ra nuu Nyoo. Tyicuan ta caquihvi ñu chichi noo barcu cha cuahan ityi Siria. ¹⁹Ta cha chaá barcu cuan nya ñuu Éfeso, ta caquita ñu. Ta ra Aquila chihin cu Priscila ndoo ñu yucuan. Ta ra Pablo cuahan ra vehe ñuhu ñu Israel. Ta cahán ra chihin ñu Israel cha ndu iñ ri yucuan. ²⁰Ta chacu ndahvi ñu nuu ra na ndoo ra cuaha ca quivi. Soco ña cuñí ra. ²¹Ta catyí ra chi ñu vatyí cha cuahan ra, ta catyí tucu ra tyehe caa:

—Cuñí chi cha cuhin ñuu Jerusalén vatyí sanducahni vico cha vachi cutahan. Soco cuquichi inga chaha nu nyicu ndo tatu Nyoo ta cuñí ra —catyí ra chi ñu.

Tyicuan ta cuahan ra quihvi ra chichi noo barcu cha cuahan ityi Siria. ²²Quívi nachaa ra ñuu

Cesarea ityi Siria cuan, chahan ra chicuhva ra nocumi chi ñu yihí cuenda Nyoo Jerusalén. Yaha cuan ta cuahan ra Antioquía. ²³Ta cha yaha chinyaa ra suhva quivi yucuan, quita ra ta cuahan ra tahan tahan ñuu ityi Galacia ta Frigia. Ta sanduniñi ra iñi tandihi ñu yihí cuenda Nyoo.

**Nu cahán ra Apolos tuhun
Nyoo ñuu Éfeso**

²⁴Quivi cuan chaá noo ra Israel ñuu Éfeso. Nañi ra Apolos. Ta ñuu ra cuvi Alejandría. Ta cuvi ra minoo ra vaha cahán tuhun Nyoo. Ta chitó xaan ra tuhun Nyoo tuhun chahnu cha nyaá nu libru. ²⁵Ta vaha xaan cutuhva ra tuhun Sutu Mañi yo. Ta cahán ra chihin cha nii iñi ra. Ta vaha xaan nyicón ra chi Nyoo. Ta cachi xaan sañahá ra tuhun ra Jesús. Vasi cuhva cha sacondutyá ra Juan ri chitó ra. ²⁶Ta quichahá cahan ra chichi vehe ñuhu chihin cha nii iñi ra. Ta cuhva cha chiñi ra Aquila ta cu Priscila, tavá siin ñu chi ra ta nacatyí cachi ca ñu tuhun ityi Nyoo chi ra. ²⁷Tyicuan ta quichaha cuñi ra Apolos cahun ra ityi Acaya. Ta ra hermano catyinyee ra chi ra. Ta catyaa ra noo carta chi ñu yihí cuenda Nyoo ityi cuan, ta catyí ra chi ñu vatyí na vaha cahan ñu chihin ra tatu chaa ra. Tyicuan ta cuahan ra. Ta cuhva cha chaá ra Acaya cuan tyinyee xaan ra chi ñu chinó iñi chi Nyoo cha cuenda tumañi iñi cha chahá ra chi ñu. ²⁸Vatyí nu tuvi sañahá cachi xaan ra yoso caa cuhva ña vaha cha sacuví ñu Israel. Ta sañahá ra cha

catyí nu tutu Nyoo vatyí ra Jesús cuvi Cristo, ra cha nyatú xaan ñu chi.

Nu cuahan tucu ra Pablo ñuu Éfeso

19 Cha ni ri ca cha ñohó ra Apolos ñuu Corinto, ra Pablo yaha ra ityi yucu ta chaá ra nya ñuu Éfeso. Ta yucuan nañihi ra chi cuaha ri ra yihí cuenda Nyoo.

²Ta ndaca tuhun ra chi ra:

—¿Atu naquehen ndo Tatyí Ii quivi nachino iñi ndo? —catyí ra Pablo chi ra.

Ta canacahan ra cuan ta catyí ra:

—Ni chiiñ ña chitó ndi cha iyó Tatyí Ii.

³Tyicuan ta ra Pablo ndaca tuhun ra chi ra:

—¿Ñáá chihin condutyá nyoho? —catyí ra.

Ta nacahan ra ta catyí ra:

—Chihin cuhva sacondutyá ra Juan yucuan cuhva condutyá ndi —catyí ra.

⁴Tyicuan ta catyí ra Pablo chi ra:

—Ra Juan sacondutyá ra chi ñáyivi cha ndu uvi iñi cuatyí. Soco catyí tucu ra chi ñu vatyí cuñi chi cha chino iñi ñu chi ra cha cuaquichi ta ican ra cuan cuvi ra Cristo Jesús —catyí ra Pablo chi ra.

⁵Cuhva cha cachiñi ra cha catyí ra Pablo tuhun ihya, tyicuan ta nacondutyá ra inga chaha chihin sivi Sutu Mañi yo Jesús. ⁶Ta cuhva cha tyiso ra Pablo ndaha ra siqui ra, quichi Tatyí Ii siqui ra. Ta quichaha cahan ra inga sahan. Ta saha ra profetizar, o chahá cuenda ra tuhun chahá Tatyí Ii Nyoo chi ra cuvi cuan. ⁷Ta uchi uvi tahan ra cha tandihi ra.

⁸Tyicuan ri chica ra Pablo vehe ñuhu ñuu cuan chichi cha uñi yoo. Ta cahān ra tuhun Nyoo chihin cha ñii iñi ra. Ta ñihi cahān ra chihin ñu yoso caa nyacá ñaha Nyoo añaima yo. ⁹Soco yihí ñu sandava ñu añaima ñu. Ta ña cuñí ñu chino iñi ñu. Ta cahān ña vaha ñu siqui tuhun ra Cristo nuu ñáyivi, ta catyí ñu vatyí ña vaha ityi Sutu Mañi yo. Tyicuan ta ra Pablo canyahā ra nu nyicú ñu. Ta chinyaca ra chi ñu chinó iñi chi ra Cristo noo sicuela ra cha nañí Tiranno. Ta yucuan cahān ra tuhun ra Cristo chihin ñáyivi ndiquivi ri. ¹⁰Ta tyicuan caa chinyacuví ra chichi cha uvi cuiya. Ta tandihi ñáyivi nicahnu ityi Asia cuan chiñi ñu tuhun Sutu Mañi yo Jesús, tari ñu Israel ta ñu cha ñima ñu Israel cuvi ñándihi. ¹¹Ta nahnu milagru sacuví Nyoo chihin ndaha ra Pablo. ¹²Vatyí nyacua nya pañitu ta sahma cha tiin ra Pablo, ta chinyaca ñu chi ñu cuhvi ta nduvahā ñu. Ta ñu yihí tatyí ña vaha chi, quitā chi chi ñu.

¹³Ta iyó suhva ra Israel cha cachica noo tahan tahan ñuu. Catava ra tatyí ña vaha chi ñáyivi. Ta cacuñí ra cotyiño ra sivi Sutu Mañi yo Jesús vatyí tava ra chi tatyí ña vaha. Ta catyí ra chi tatyí ña vaha cuan:

—Chihin sivi ra Jesús cha cahān ra Pablo tuhun catyí chi ndo vatyí quita ndo —catyí ra.

¹⁴Tyehe caa chinyacuví ndi ucha tahan sehe noo ra Israel cha nañí Esceva. Ta ra Esceva cuan cuví ra noo ra cuví nuu chi tata sutu. ¹⁵Ta cha cacahan ra cuan chihin tatyí ña vaha cuan, nacañan tatyí ña vaha

cuan chihin ra ta catyí chi tyehe caa:

—Ñohó nui chi ra Jesús. Ta chité yóo ra cuví ra Pablo. Soco nyoho ñyóo ra cuví nyoho? —catyí tatyí ña vaha cuan chi ra.

¹⁶Tyicuan ta ra cha yihí tatyí ña vaha cuan chii, ndava ra siqui ra cuan. Ta chihin cha cuaha fuerza ra cuví chasaha ra chi tandihi ra. Ta chahnya cuatyí ra sahma ra. Ta sanduvityaa ra chi ra. Ta sañicuehe ra chi ra. Yucuan ta chihin cha cayuhvi ra ta cachino ra ta cuahan coyo ra. ¹⁷Tyicuan ta tandihi ñu Éfeso, ñu Israel, ta ñu cha ñima ñu Israel cuví ñandihi, chito ñu tuhun cuan. Ta yuhvi xaan ñu cuví. Ta sacahnú ñu sivi Sutu Mañi yo Jesús.

¹⁸Ta cuaha xaan ñu chinó iñi ñu chi ra. Ta cha coyo ñu ta nahma ñu cuatyí ñu, tandihi cha ña vaha cha chinyacuví ñu ta ityi chata ca. ¹⁹Ta cuaha ñu cha sacuahā tuhun tasi, quichí nyaca ñu libru ñu. Ta chahmi ñu libru cuan nuu tandihi ñáyivi. Ta natava ñu cuenda yoso yahvi libru cuan. Cha tandihi quitā ta cha uvi xico uchi mil xuhun cuichin. ²⁰Ta tyicuan ri ta cuahan chitya ca tuhun Sutu Mañi yo. Ta nducuahā ca ñu yihí cuenda ra. Ta tyicuan caa nyehé ñáyivi yoso cha cahnu tunyee iñi iyó chi ra. ²¹Ta cha yaha tuhun ihya, ra Pablo natyaā ra cuhva cha cuhun ra ityi Macedonia, ta ityi Acaya. Yaha cuan ta cunuhu ra nya Jerusalén tyaá ra cuhva. Ta catyí ra vatyí yaha cuan ta cuñi chi cha cuhun ra nya ñuu Roma. ²²Tyicuan ta tachi ra chi uvi tahan ra tyinyeé chi ra nya Macedonia, ra Timoteo ta ra Erasto.

Soco ndoo maa ra suhva ca quivi ityi Asia cuan.

**Nu naquiqui ñáyivi Éfeso
siqui tuhun Nyoo**

²³Ta suri quivi cuan naquiqui ñáyivi ñuu Éfeso siqui tuhun Nyoo, ²⁴vatyí noo ra cha nañí Demetrio sanaquiquí. Vatyí maa ra tuhvá ra saha tyiño chihin xuhun cuichin. Savahá ra vehe ñuhu nyihi nyoo Diana chihin xuhun cuichin cuan. Ta cuaha sahá ganaa ra chihin ra casahá tyiño chihin ra. ²⁵Ta caná ra Demetrio cuan chi ra cha sahá tyiño chihin ra. Ta caná tucu ra chi ra cha casahá tyiño iin ri tyiño cuan. Ta catyí ra chi ra:

—Nyoho ra tahan yo, chitó ndo vatyí chihin tyiño ihya iyó cha tyayii yo. ²⁶Soco nyoho nyehé ndo ta chiñí ndo yoso caa sacuví ra Pablo ñuu yo Éfeso ihya, ta nicahnu ityi Asia. Vatyí catyí ra tyi nyoo cha savahá ñáyivi ñima Nyoo cuví. Ta cuaha xaan ñáyivi nachino iñi sahá ra. ²⁷Ta ña vaha cha sacuví ra vatyí ma quiyahvi ca xitohyo cha savahá yo. Ta siin ri ma sacahnu ca ñáyivi chi nyoo Diana ta ma saha ca ñu ñáyivi vehe ñuhu ña, ta ña vaha tyicuan caa, vatyí ñaha cuan cahnu xaan cuví ña. Ta tandihi ñáyivi ityi Asia chihin ñu nicahnu ñayivi sacahnú ñu chi ña. Ta nu cuahan ca chi quivi ma sacahnu ca ñáyivi chi ña tatu chino iñi ñu cha cahán ra Pablo —catyí ra Demetrio.

²⁸Ta cuhva cha cachiñi ra cha catyí ra, Xaan xaan cacuñí ra. Ta quichaha cacana chaa ra ta cacatyí ra:

—Cahnu xaan cuví cu Diana, nyoo cuenda ñáyivi Éfeso ihya —catyí ra.

²⁹Ta cutondo xiñi tandihi ñu ñuu cuan. Ta catiñ ñu chi ra Gayo, ta chi ra Aristarco, uvi ra Macedonia cha chicá noo chihin ra Pablo. Ta caxita quiño ho ra chi ra nyacua nya nu tuhva ñu candu iin ri ñu.

³⁰Ta ra Pablo cuñí ra quihvi ra nu nataca ñáyivi vatyí cahan ra chihin ñu. Soco ra hermano, ña chahá ra.

³¹Ta tyicuan caa tucu suhva ra cuví tyiño ityi Asia, ra cuví amigo ra Pablo, tachí ra tyiño vatyí ña tahán chi tyihi ra chi ra yucuan.

³²Ta nu ndu iin ri ñu yucuan, suhva ñu caná chaa noo tuhun. Ta inga ñu caná chaa ñu inga tuhun. Vatyí naquiquí ñu. Ta cuaha xaan ñu cha ni ña chitó ñu ñáá tuhun cha natacá ñu. ³³Tyicuan ta ñu Israel, tyatyiño ñu chi noo ra cha nañí Alejandro na quita ra ityi nuu. Ta suhva ñu tayucú yucuan nacatyí ñu chi ra yoso caa cucahan ra. Tyicuan ta sacuví ra seña chihin ndaha ra vatyí na taxi ri cuví ñu vatyí cuñí ra catyí ra vatyí ñahri cuatyí ñu Israel. ³⁴Soco cuhva cha chitó ñu vatyí ra Israel cuví ra, tandihi maa ñu caná chaa ñu. Ta chichi cha uvi hora caná chaa ñu, ta catyí ñu:

—Cahnu xaan cuví cu Diana nyoo cuenda ñu Éfeso —catyí ñu, caná chaa ñu.

³⁵Tyicuan ta secretario ñuu cuan cuhva cha cuví sacutaxin ra ñáyivi, ta catyí ra:

—Nyoho tata ñuu Éfeso ihya. Tandihi ñáyivi chitó ñu vatyí nyaá siqui yo ñu Éfeso cha saha cumi yo vehe ñuhu cu Diana tyi cahnu xaan cuví ña. Ta cumí yo xitohyo ña cha caná cava ityi andivi. ³⁶Ta yori cuví catyí tyi ña ndicha. Taxi

ri ndo, ta ma cunyacuvi ri maa ndo tatu ña chitó ndo ñáá cha cuacunyacuvi ndo. ³⁷Vatyí ra cha quichí nyaca ndo ihya ñahri cha suhú ra vehe ñuhu ndo. Ta ni ña cahán ña vaha ra siquí nyoo cuenda ndo. ³⁸Tatu ra Demetrio ta ra cha sahá tyiño chihin ra chicán ra cuatyí chaha noo ra, na cahun ra nu nyaá juez. Cuví cacan ra cuatyí nuu ra cuan, ta maa ra cusandaa ra cuatyí cuan. ³⁹Ta tatu inga tuhun chicán ndo, cuñí chi sacuví ndo nu nyicu ra cuví tyiño, tari cuhva catyí ley. ⁴⁰Vatyí tatu coto gobiernu ta cana ra chi yo cha cuenda cha cuví ihya, ta ma ñihi yo tuhun cahan yo tatu ndacá tuhun ra chi yo ñáá cuenda naquiquí yo —catyí ra cuví secretario cuan.

⁴¹Ta cha yahá catyí ra tuhun cuan catyí ra vatyí na cunuhu ñu nya vehe ñu.

Nu yahá ra Pablo ityi Macedonia ta cuahān ra Grecia

20 Cha yahá tuhun cha naquiquí ñáyivi ñuu Éfeso cuan, canā ra Pablo chi tandihí ñu yihí cuenda Nyoo, vatyí cahan ra suhva nuu ñu ta cuhva ca ra tunyee ñni chi ñu. Vatyí maa ra chaā chi quívi cha cahun ra inga ityi. Ta cahān ra chihin ñu. Tyicuan ta cuahān ra Macedonia. ²Ta cahān ra tandihí ityi cuan ta sandunií ca ra ñni tandihí ñu yihí cuenda ra Cristo cha iyó ityi cuan chihin tuhun cahán ra. Tyicuan ta chaā ra ityi Grecia. ³Ta yucuan ndoō ra uñi yoo. Ta cha nyaá ra cha cuaquehen ra barcu ta cahun ra Siria, ta chito ra vatyí nducú ñáyivi Israel chi

ra vatyí cahñi ñu chi ra. Yucuan chaha natyaa ra ñni ra cha cahun ra chihin chaha ra ityi nu ñuhu ri. Ta nayahā ra inga chaha ityi Macedonia. ⁴Ta cuahān ra Sópater, ra ñuu Berea chihin ra. Ta cuahān ra Aristarco ta ra Segundo, ta uvi tahan ra ihya, Tesalónica cuví ñuu ra. Ta cuahān ra Gayo, noo ra ñuu Derbe, ta ra Timoteo, ta uvi tahan ra ityi Asia, ra Tíquico ta ra Trófimo. ⁵Ra hermano ihya cayahā ra ityi nuu ta canyatú ra chi ndi ñuu Troas. ⁶Ta nyuhu nyatú ndi na yaha vico pascua nu tuhvá ñu Israel chachí ñu pan cha ñahri yuchan iya yihí. Tyicuan ta quita ndi ñuu Filipo chihin barcu. Ta nu cu ohon quívi ta natahān ndi chi ra cha cuahān ityi nuu nya ñuu Troas. Ta yucuan ndoō ndi ucha quívi.

Nu cahán ra Pablo tuhun Nyoo ñuu Troas

⁷Ta cha timingu cuan ndu ífn ri ndi chihin ñu yihí cuenda Nyoo ñuu Troas cuan. Ta quívi cuan cuacachi ndi pan ta coho ndi vinu vatyí nicohon ñni ndi tyi chihí ra Cristo cha cuenda cuatyí yo. Ta ra Pablo cahán ra nuu ñu ta cuvi ora ñuu, vatyí cha nyaá cha cahun ndi inga quívi cuan. ⁸Canyicú ndi noo cuarto nu cu uñi piso. Ta ndichin xaan nu canyicú ndi chichi vehe cuan vatyí cuaha xaan ñuhú candil cayú. ⁹Ta noo ra tyivaa cha nañí Eutico nyaá ra ventana tyasohó ra, soco ña cunyeē ra ñumahna vatyí ra Pablo, cha vehe xaan cahan ra. Quixí ra Eutico, ta ña chito ra canacavā ra nya nu ñuhu. Ta nacoñehé ra chi ra soco cha chihí

ra. ¹⁰Tyicuan ta ra Pablo noꝝ ra ta chaꝝ ra nu catuví ra tyivaa cuan. Ta natyihi nundaha ra chi ra tyivaa cuan, ta catyí ra chi ndi hermano: —Ma yuhvi ndo. Nyitó ra —catyí ra.

¹¹Tyicuan ta nandaꝝ tucu ra Pablo ta chachi ndi pan ta chihí ndi vinu cha cuenda Sutu Mañi yo. Tyicuan ta cahan ca ra Pablo tuhun Nyoo nyacua nya cundichin. Tyicuan ta cuahan ra. ¹²Ta ra tyivaa cuan nandoto ra ta cuanuhu ra nya vehe ra. Ta sii xaan nanduví cuñi ñu.

Nu quitꝝ ra Pablo ñuu Troas ta cuahan ra nya ñuu Mileto

¹³Nyuhu yaha ndi ityi nuu ta cuahan ndi chihin barcu nya ñuu Asón. Vatyí yucuan cuñihi tahan ndi chihin ra Pablo, vatyí tyicuan caa sandaꝝ maa ndi tyiño chihin ra. Vatyí maa ra cuñí ra cuhun ra ityi nu ñuhú ri chihin chaha ra. ¹⁴Ta cuhva cha nañihí tahan ndi chihin ra nya ñuu Asón cuan, quihví ra chichi barcu chihin ndi ta cuahan ndi nya ñuu Mitilene. ¹⁵Quitꝝ ndi yucuan ta yaha ndi ityi nuu noo ñuhú luhlu cha nañí Quío nyaá mahñu tyañuhu. Ta cha inga quiví cuan chaꝝ ndi inga ñuhú luhlu cha nañí Samos. Yaha ndi yucuan ta nyitatu ndi ñuu Trogilio. Ta cha inga quiví chaꝝ ndi nya ñuu Mileto. ¹⁶Tyicuan caa cuví vatyí ra Pablo ña cuñí ra cunyaꝝ ca ra cuaha quiví ityi Asia. Ña cuñí ra cuhun ra Éfeso vatyí numi ri cuñí ra chaa ra ñuu Jerusalén, vatyí tatu cuhva chi cuhva cunyaa ra quiví vico Pentecostés cha sanducahnú ñu Israel.

Nu cahán ra Pablo chihin ra ñuu Éfeso vatyí cuhun ra ta ma quichi ca ra

¹⁷Ta cuhva cha nyicu ndi ñuu Mileto, canꝝ ra Pablo chi ra yihí ndaha chi ñu yihí cuenda Nyoo Éfeso. ¹⁸Ta cuhva cha chaꝝ coyo ra, catyí ra tyehe caa chi ra:

—Maa ndo chitó ndo yoso caa cuhva chica noi nyata quiví xihna ri cha chají Asia ihya. ¹⁹Tandihí quiví cha chinyají chihin ndo ta sacuví tyiño nuu Sutu Mañi yo chihin cha nduquí cuhva cha ma cahnu sahi chii, vasi cuaha tindoho chihin cha cuaha tucuihya iñi. Ta cuaha tindoho quichi siqui sacuví ñáyivi Israel. ²⁰Soco ña sandihí cha cahán noi tuhun Nyoo nuu ndo. Vatyí ihya cuví tandihí cha chiñuhú chi ndo tacuhva coo vaha ndo. Ta sañahí tuhun Nyoo chi ndo nu ndu iin ri ndo ta nya vehe ndo ñandihí. ²¹Ta sañahí tuhun ihya chi ñu Israel ta chi ñu cha ñima ñu Israel cuví. Sañahí chi ñu na nasama ñu cuhva iyó ñu nuu Nyoo ta nachino iñi ñu chi Sutu Mañi yo Jesucristo. ²²Ta vityin cuhin nya ñuu Jerusalén vatyí maa Tatyí Ii catyí. Ta ña chité ñáá cha cucuvi chii yucuan. ²³Soco noo ri cha chité vatyí tandihí ri nu cuahín Tatyí Ii catyí chii vatyí nyatú vehe caa chii, ta cuaha tindoho ñandihí. ²⁴Soco ni noo ihya ta ña chicá xiñi. Ta ni ñayiví ta ña vale cha cuenda mai, tacuhva vatyí chihin tusii iñi ta cuví sañihi sahatyiñe tyiño cha chaha Sutu Mañi yo Jesús chii, cha sañahi tuhun vaha yoso cuhva cuñí Nyoo chi yo.

²⁵Ta vityin chitó vahi vatyí tandihí nyoho cha cahin tuhun Nyoo chihin ndo, ma nyehe ca maa ndo chii. ²⁶Yucuan chaha cuñí catyí chi ndo vityin vatyí ñahri ca cuatyí yuhu cha cuenda ni noo nyoho. ²⁷Vatyí chihin cha niñi cuñí ta cahin tuhun Nyoo chihin ndo ta ñahri cha tixehí. ²⁸Yucuan chaha saha ndo cuenda chi ndo. Ta saha tucu ndo cuenda chi tandihí ñu yihí cuenda Nyoo. Vatyí maa Tatyí li tyatyíño chi ndo vatyí saha cuenda ndo chi ñáyivi iyó vehe ñuhu Sutu Mañi yo. Maa ra satá ra chi ñu chihin niñi ra. ²⁹Vatyí chité vatyí quivi cuhin, cuquichi inga ra. Ta cuñi ra satívi ra chi ñu yihí cuenda Sutu Mañi yo. Tari lobo xaan cha chahñí chi mbee, tyicuan caa cuquichi ra cuan satívi ra añima ndo. ³⁰Ta suri nu nyicu ndo, cundicuita suhva ra. Ta cusañaha ra cha ña ndicha tacuhva cunyicon ndo chi ra. ³¹Yucuan chaha saha vaha ndo cuenda. Nícohon iñi ndo vatyí chichi cha uñi cuiya ña sandihí cha cahín tuhun Nyoo nuu ndo. Cha ñicahñu ta cha cuaa cahin chihin noo noo nyoho, ta chihin cha cuihya iñi coto sandihí ndo tuhun Nyoo.

³²Ta vityin nyoho yañi, natyáí chi ndo ndaha Nyoo. Saha ndo cuenda ndii tuhun cahan ra chihin yo. Sacotó ra chi yo tyi cuñí xaan ra chi yo. Ta yucuan sandunyeé xaan chi iñi yo tacuhva cuvi yo ñáyivi yihí vaha cuenda ra chihin tandihí inga ñu cha nacuhva cuenda ñu chi ñu chi ra. ³³Yuhu ña nyiyó iñi ni minoo cha iyó chi ndo. Ni ri xuhun ndo, ni ri sahma ndo. ³⁴Nyoho

chitó vaha ndo vatyí sahá tyiño xain chihin ndahi tacuhva ñihí cha chiñuhú chii chihin ra chicá noo chihin. ³⁵Tyicuan ri sañahí chi ndo vatyí cuñí chi cha saha tyiño ndo ta tyínyee ndo chi ñu iyó cha chiñuhu chi. Ta nícohon iñi ndo tuhun cahan Sutu Mañi yo Jesús nu catyí ra tyehe caa: “Sií ca cuñi noo ñáyivi ñu chahá, ta ñima ca ñu ita iñi”, catyí Sutu Mañi yo.

³⁶Cha yaha cha catyí ra Pablo tuhun ihya, chicuñi chiti ra. Ta chican tahvi ra chihin tandihí ñu. ³⁷Ta tandihí ñu cuihya xaan nduvi iñi ñu ta chacu xaan ñu. Ta nanumi ñu chi ra. ³⁸Vatyí ra Pablo catyí ra tyi cuhun ra inga ñuu ta ma cuhun ca ra nu nyicu ñu. Tyicuan ta chinyaca ñu chi ra nyacua nya nu quihvi ra chichi barcu.

Nu cuahan ra Pablo ñuu Jerusalén

21 Tyicuan ta sandoo ndi chi ra hermano ta quihvi ndi chichi barcu. Ta cuahan ndi iñi ndoo ityi ri nya Cos noo ñuhú luhlu mahñu tyañuhu. Ta cha inga quivi chaq ndi nya Rodas inga ñuhú luhlu ri. Yucuan ta cuahan ndi nya Pátara. ²Ta ñuu Pátara cuan nañihí ndi nonga barcu cha cuahan nya Fenicia. Ta quihvi ndi chichi inga barcu cuan ta cuahan ndi. ³Ta cha cuahan ndi nyehe ndi ñuhú Chipre chiyo satyin ndi. Ta yaha ri ndi cuahan ndi ityi nu ca, ityi Siria. Ta chaq ndi nya ñuu Tiro vatyí yucuan cuatava ra carga cha nyisó barcu cuan. ⁴Ta cha nañihí ndi chi ñu yihí cuenda Nyoo ñuu cuan, ndoo ndi chihin ñu ucha quivi. Ta catyí ñu chi ra Pablo vatyí ña tahán chi cha

cuhun ra Jerusalén vatyí tyicuan caa sañahā Tatyí Ii chí ñu. ⁵Soco cha ndihí ucha quívi cuan quita ndi ñuu cuan. Ta nu cuaquita ndi tandihí ra hermano chihin ñasihi ra ta sehe ra chinyacā ñu chí ndi nyacua nya ityí chata ñuu. Ta nu ñiti yuhu tyañuhu cuan nicuiñi chiti ndi, ta chicán tahvi ndi chí Nyoo. ⁶Tyicuan ta nanumi ndi chí tahan ndi. Tyicuan ta quihvi ndi chichi barcu. Ta maa ñu cuanuhu coyo ñu vehe ñu.

⁷Ta quita ndi ñuu Tiro cuan ta cuahan ndi nya ñuu Tolemada. Ta yucuan chahā ndi nocumi chí ñu hermano. Ta ndoo ndi chihin ñu noo quívi. ⁸Ta cha inga quívi quita ndi ta cuahan ndi ñuu Cesarea. Ta yucuan chahā ndi vehe ra Felipe ra cha sacotó xaan chí ñáyivi yoso caa sacacu Nyoo añima ñu. Cuví ra noo ra chichi cha ucha tahan ra nyisó tyiño vehe ñuhu. Ta yucuan ndoo ndi chihin ra. ⁹Ra Felipe, iyó cumi tahan ñu tyivaa sehe ra cha ta tandaha ca. Ta tuhvá ñu chahá cuenda ñu tuhun cahán Nyoo. O cuví chí cuan sahá ñu profetizar. ¹⁰Ta cha cuaha ri quívi cha chaā ndi yucuan, tyicuan ta chaā noo profeta Nyoo cha nañí Agabo. Quichí ra ityí Judea. ¹¹Quichí nyehe ra nu nyicu ndi. Ta quehen ra sincho ra Pablo, ta cháhñi ra chaha ra ta ndaha ra, ta catyí ra:

—Tatyí Ii Nyoo catyí chí vatyí tyehé caa cunuhñi chitoho sincho ihya nya Jerusalén. Ta cucuhva cuenda ñáyivi Israel chí ra chí ra inga ñuu —catyí ra Agabo.

¹²Cha chíñi ndi tuhun ihya, nyuhu ta ra ñuu Cesarea chacú

ndahvi ndi nuu ra Pablo vatyí ma cuhun ra Jerusalén. ¹³Soco ra Pablo catyí ra:

—¿Ñáá tuhun chacú ndo ta sanducuihyá ndo iñi? Yuhu ñahri cuende. Ñima cha cunuhñi ri, vasi cahñi ra chíi soco cha cuenda Sutu Mañi yo Jesús —catyí ra chí ndi.

¹⁴Ta cha nyehe ndi tyi ña cuví chasaha ndi chí ra, sañā ndi. Ta catyí ndi:

—Na cuví maa cuhva cuñí maa Sutu Mañi yo.

¹⁵Cha yahā tuhun ihya sanduvaha ndi chí ndi ta cuahan ndi nya Jerusalén. ¹⁶Ta cuahan suhva ra Cesarea ra yihí cuenda ra Cristo chihin ndi. Ta cuahan tucu noo ra ñuhú Chipre. Mnasón nañí ra. Cuaha xaan cuiya chinó iñi ra chí ra Cristo. Maa ra chinyacā ra chí ndi nya vehe ra cha nyaá Jerusalén vatyí yucuan cunyaa ndi.

Nu cuanyehe ra Pablo nu nyaá ra Jacobo

¹⁷Cuhva cha chaā ndi Jerusalén, ñu yihí cuenda ra Cristo chihin cha sií cuñí ñu cahán ñu chihin ndi.

¹⁸Ta inga quívi cuan cuahan ndi chihin ra Pablo cuanyehe ndi nu nyaá ra Jacobo. Ta yucuan nyicú tucu tandihí ra yihí ndaha vehe ñuhu. ¹⁹Chahā ra Pablo nocumi chí ra. Yahā cuan ta nacatyí ra tahan tahan ri tuhun yoso caa chotyíño Nyoo chí ra nu cahan ra tuhun Nyoo chihin ñu cha ñima ñu Israel cuví. ²⁰Cuhva cha cachíñi ñu tuhun ihya, casacahnu ñu chí Nyoo, ta catyí ñu chí ra Pablo:

—Vaha yañi yo, soco cha nyehun vatyí cuaha xaan mil ñu Israel

chinó iñi ñu chi ra Cristo. Ta tandihí ñu catyí ñu vatyí niñi cha cunyicon yo ley ra Moisés. ²¹Ta ñihí ñu tuhun vatyí yoho sañahún chi tandihí ñu Israel cha iyó inga ñuu vatyí ma quichaha ca ñu ley cha sañahá ra Moisés, ta catyún chi ñu vatyí ña tahán chi sacuví ñu costumbre circuncisión chihin cha lee sehe ñu, ta ni ma sacuvi ca ñu costumbre chahnu yo. ²²¿Yoso caa sacuvi yo vityin? Vatyí ñáyivi cuañihi ñu tuhun tyi chaun ihya. ²³Vaha taxin ca cha sacuvun tyehe caa. Ihya iyó cumi tahan rayii cha nyaá sacuvi ra noo cha tyaá ra cuhva tyi sacuvi ra nuu Nyoo. ²⁴Cuahan chihin ra na ndundiun nuu Nyoo chihin ra. Ta yoho tyiyahvun cha tahán chi tyiyahvi ra. Tyicuan ta maa ra cuvi satya ndii xiñi ra cuhva catyí ley. Ta cha sacuvun tyicuan caa ta coto tandihí ñáyivi vatyí ña ndicha cha cahán ñu sicun, soco cunyehe ñu vatyí quichahá tucu yoho ley ra Moisés. ²⁵Ta cha cuenda ñu cha ñima ñu Israel cuví, ta nachinó iñi ñu tuhun Nyoo, cha sacuhun ndi tutu chi ñu, ta catyí ndi chi ñu vatyí ña tahán chi caca xiñi ñu tuhun ihya. Soco noo cha ma cachi ñu coño cha chahá ñáyivi chi xitohyo. Ni ma cachi ñu niñi ni coño quiti cha cava ñu sucun ta ña chati niñi. Ta ni noo ñu ta ma coo ñusihi o rayii chi ñu tatu ñima ñasihi o yii ñu cuví —catyí ra chahnu vehe ñuhu chi ra Pablo.

Nu nacandá ñu Israel siqui ra Pablo

²⁶Tyicuan ta tuví inga quivi ta cuahan ra Pablo chihin ndi cumi

tahan ra cuan. Ta sandundií ra chi ra nuu Nyoo iin ri chihin ra cuan. Tyicuan ta quihvi ra chichi vehe ñuhu cahnu vatyí sacoto ra chi tata sutu ama cundihi cha ucha quivi cha ndundií ndi cumi tahan ra cuan, ta cuacuhva ra ofrenda cha cuenda noo noo ra. ²⁷Soco cha cuñi cuii ri ndihi ucha quivi cuan, ta suhva ra Israel cha quichi nya Asia canyehe ra chi ra Pablo chichi vehe ñuhu. Ta casanaquiquí ra chi tandihí ñáyivi, ta catiin ra chi ra Pablo. ²⁸Ta cacanachaá ra ta cacatyí ra:

—Nyoho ñáyivi Israel, tyinyee ndo chi ndi. Ican ra ihya cuví ra cha chicá noo tandihí ri ityi. Ta sañahá ra chi tandihí ñáyivi. Catyí ra vatyí cha ñima ri tuhun cuví yo ñu Israel. Ta catyí ra tyi ña vaha ley cha tyaá ra Moisés, ta ña vaha vehe ñuhu ihya. Ta siin ri vityin tyihí ra chi suhva ra Grecia chichi vehe ñuhu sativí ra nu ii ihya —catyí ra canachaá ra.

²⁹Tyehe caa cacatyí ra vatyí ta ityi chata ca canyehe ra chi ra Pablo chichi ñuu, chicá noo ra chihin ra Trófimo, noo ra ñuu Éfeso. Ta cacuñi maa ra vatyí ra Pablo chinyaca chi ra chichi vehe ñuhu. ³⁰Ta tandihí ri ñáyivi ñuu naquiquí ñu. Ta ñáyivi chinó vavaha ñu vachi coyo ñu. Tyicuan ta catiin ñu chi ra Pablo. Ta caxita quiñocho ñu chi ra nya ityi chata vehe ñuhu, ta numi ri nacasi ñu yuvehe. ³¹Cha cuñi ñu cahni ñu chi ra, ta chaá tyiño chi comandante cuenda sindaro vatyí tandihí ñu Jerusalén iyó xaan naquiquí. ³²Tyicuan ta comandante cuan

sandu iin ri ra capitán ta sindaro. Ta cachino ra cuahan coyo ra nu nyicú ñáyivi. Cuhva cha nanyehe ñu chi comandante chihin sindaro, sandihí ñu cha cañi ñu chi ra Pablo. ³³Tyicuan ta tuhva comandante nu nyaá ra Pablo. Ta tachí ra tyiño natiin sindaro chi ra, ta cháhñi ra chi ra chihin uvi tahan cadena. Yahá cuan ta ndaca tuhun ra chi ra yóo ra cuví ra, ta ñáa cha sacuví ra. ³⁴Soco ñáyivi siin siin tuhun canachaá ñu. Ta comandante cuan ña cutuñi maa iñi ra cha cuenda cha quiñi cuvaa ñu. Ta tachí ra cha cunyaca sindaro chi ra Pablo nya cuartel. ³⁵Cuhva cha cachaá ra nu cuayi yuvehe cuartel cuan, quiñi xaan nanduví ñáyivi ta ña chahá ca ñu caca ra Pablo. Yucuan chaha catyaa soco sindaro cuan chi ra. ³⁶Vatyí tandihí ñu nyicón ñu chi ra, ta canachaá ñu ta catyí ñu: —iCahñi ndo chi ra! —cacatyí ñu.

Nu sacacú ra Pablo chi ra nuu ñáyivi

³⁷Cuhva cha cuatyihí ra chi ra Pablo chichi cuartel, ta quichaha catyí ra chi comandante: —¿Atu cuhvon cha catyí noo tuhun chuun? —catyí ra chi ra. Ta comandante cuan catyí ra: —¿Atu cuví cahún griego? ³⁸Tu tyicuan caa, ñima yoho cuví ra nuu Egipto cha quichí quívi cuan ta sacañi tahan ra chi ñáyivi siqui gobiernu ta chinyaca ra chi cumi mil tahan ñáyivi ityi ñuhu ityi —catyí comandante cuan chi ra Pablo. ³⁹Tyicuan ta ra Pablo catyí ra chi ra: —Yuhu noo ra Israel cuví ta caqui noo ñuu cha nañi Tarso cha cuví

minoo ñuu cahnu ityi Cilicia. Soco saha noo tumañi iñi chii vatyí cuhvon nacahin chiin chihin ñáyivi —catyí ra Pablo chi comandante cuan.

⁴⁰Tyicuan ta chaha comandante cuan permiso chi ra. Tyicuan ta nicuinanyaa ra nu cuayi ta chaha ra noo seña chi ñu na cutaxin ñu. Ta cahán ra chihin sahan hebreo, ta catyí ra:

22 —Nyoho tata, ta nyoho yañi, cuiñi ndo cha catyí chi ndo tyi coto ndo vatyí yuhu ñahri cuatyí —catyí ra Pablo chi ñáyivi cuan.

²Cha cachiñi ñu vatyí cahán ra chihin ñu chihin sahan hebreo, taxi ri cacuví ñu. Ta ra Pablo catyí ra:

³—Yuhu ra Israel cuví tari maa ndo. Ta caqui ñuu Tarso ityi Cilicia. Soco Jerusalén ihya chahni. Ta ra Gamaliel sañaha chii tandihí maa cuhva yoso caa quichahi ley sutu chahnu yo. Ta tyicuan ri nduquí cuhva sacuví tyiño nuu Nyoo chihin cha tandihí añime, tari maa cuhva nyacuví nyoho quívi vityin. ⁴Yuhu, nu quichi chi chica nyiquen ta satasi iñi chi ñu yihí cuenda ra Cristo. Ta nacuhva cuende chi ñu na cacahñi ra chi ñu. Ta tyihí chi ñu chichi vehe caa, rayi ta ñusihi. ⁵Ra cuví nuu chi tata sutu chihin ra cacuví mandoñi, cacuví ra cha ndaa vatyí ican ra chaha tutu vatyí cuvi tiin chi yañi yo, ra yihí cuenda ra Cristo nuu Damasco. Chahin nyicuan chinanduqui chi ñu chinó iñi chi ra Cristo, vatyí tacuhva cunuhñi ñu chihin cadena, ta quichi nyaque chi ñu nya Jerusalén ihya vatyí cutachi tuñi ra chahnu chi ñu.

**Nu nacatyí ra Pablo yoso caa nanduví
ra cuenda ra Cristo**

(Hch. 9.1-19; 26.12-18)

⁶Soco cuhva cha cuahin ityi cha cuachaa ndi Damasco, ñáá cuhva ora cuví cuan. Ta sana iñi ta ndundichin nicachico nu cuahin chihin noo nduva ñuhu cha quichi ityi andivi. ⁷Tyicuan ta nduve nu ñuhú. Yaha cuan ta chiñi noo ndusu cha catyí chii: “Saulo, Saulo, ¿ñáá tuhun cha chicá nyicon chii tyehe caa?” catyí ndusu cuan chii. ⁸Tyicuan ta ndacá tuhun chi ra ta catyí: “¿Yóó yoho tata?” Ta catyí ra chii: “Yuhu cuví ra Jesús, ra ñuu Nazaret, ra chicá nyicon chi”, catyí ra. ⁹Ndii ra cha cuahan coyo chihin canyehe ra ñuhu cuan, ta nayuhvi ra. Soco ña cachiñi ra ndusu ra cha cahán chihin. ¹⁰Tyicuan ta quichahá catyí yuhu chi ra: “Sutu Mañi yuhu, ¿ñáá cha tahán chi sacuvi?” Ta catyí ra chii: “Ndicuita ta cuahan nya Damasco. Ta yucuan cucatyí noo ra chuun tandihi cha tahán chi sacuvun”, catyí Sutu Mañi yo chii. ¹¹Ta vatyí nducuai saha ñuhu cuan, ra tahn cayindaha ndahi ta cachinyaca ra chii nya Damasco.

¹²Ta yucuan iyó noo ra cha nañi Ananías. Ta sacahnú xaan ra chi Nyoo cuhva catyí ley cha tyaa ra Moisés. Ta tandihi ñu Israel cha iyó Damasco catyí ñu vatyí vaha xaan ñáyivi cuví ra Ananías. ¹³Quichi nyehé ra cuan chii. Ta cuhva cha chaá ra, catyí ra chii: “Yañi Saulo, ñanyehe inga chaha”, catyí ra chii. Ta caa cuhva ri cuan nanyehi. Ta cuví nyehi chi ra Ananías cuan.

¹⁴Ta catyí ra chii: “Nyoo cuenda sutu yo nacachi ra chuun nyata ityi chata ca, vatyí coton cuhva cuñi ra, ta nyehun chi ra Jesucristo vatyí vaha ra, ta cuiñun ndusu ra.

¹⁵Vatyí yoho cuacahun tuhun ra nuu tandihi ñáyivi. Cuanacatyun cha nyehun ta cha chiñun. ¹⁶Ta vityin, ma cuatu con. Ndicuita ta condutyon. Ta cacan tahvun chi Sutu Mañi yo tyi cuasandachi ra cuatyun”, catyí ra Ananías chii.

Nu nacatyí ra Pablo yoso caa chaha

**Nyoo tyiño chi ra vatyí cuhun ra
inga ñuu cucahan ra tuhun ra Cristo**

¹⁷Yaha cuan ta cuanuhin Jerusalén ta cuhva cha nachaj, chahin vehe ñuhu cahnu chicacan tahvi. Ta nyehi noo visión. ¹⁸Nyehi chi Sutu Mañi yo. Ta catyí ra chii: “Sanumi. Quita cha numi ri Jerusalén vatyí ma chino iñi ñu tuhun cha cucahun”, catyí ra chii. ¹⁹Tyicuan ta quichaha catyí yuhu chi ra: “Sutu Mañi yuhu, maa ñu chitó ñu vatyí yuhu chahin tandihi vehe ñuhu. Ta tijn chi ñu chinó iñi chuun, ta tyihí chi ñu vehe caa ta cañi chi ñu. ²⁰Ta quivi chati ñiñi ra Esteban ra cha cahán cuendon, yuhu ñandihí nyaí yucuan. Ta ndoi vaha cha chahñi ñu chi ra. Ta sahadumí sahma ra cha cachahñi chi ra”, catyí yuhu chi Sutu Mañi yo. ²¹Tyicuan ta catyí ra chii: “Cuahan, vatyí tachí chuun nu cañi, nu nyicu ñu cha ñima ñu Israel cuví”, catyí Sutu Mañi yo chii.

**Nu nyaá ra Pablo ndaha ra
comandante cuenda ñuu Roma**

²²Ihya ri tyasohó ñu tuhun cahán ra Pablo. Tyicuan ta quichahá canachaá ñu ta catyí ñu:

—iCahñi ndo chi ra chiña! Ña tahán chi coo ra ñayivi —catyí ñu.

²³Ta canachaá ca ñu. Ta sacaá ñu sahma ñu. Ta sacaá ñu ñiyaca nu tatyí cha cuenda cha xaan xaan cuñí ñu. ²⁴Yucuan chaha comandante cuan catyí ra na cutyihí sindaro chi ra chichi cuartel. Ta tachí ra tyiño na cañi ra chi ra, vatyí cuñí ra cha quita cha ndaa ñáá tuhun cha canachaá ñáyivi siqui ra cha tyicuan caa. ²⁵Soco cha yahá cacháhñi ra chi ra ta cuacañi ra chi ra, tyicuan ta ra Pablo nacatyí ra chi capitán cha nanyaá yucuan:

—¿Atu iyó ityi chi nyoho cha cañi ndo chii? Vatyí yuhu ra cuenda ñuu Roma cuví ta siin ri ta cutuñi ca chii nu juez —catyí ra Pablo chi ra.

²⁶Cuhva cha chiñi capitán cha cahan ra Pablo, chahán ra chisacoto ra chi comandante. Ta catyí ra chi ra:

—Saha cuenda chuun chihin cha nyacuvún. Vatyí ra cuan, ra cuenda ñuu Roma cuví ra —catyí ra chi ra.

²⁷Tyicuan ta comandante cuan cuahán ra nu nyaá ra Pablo. Ta ndacá tuhun ra chi ra tatu ndicha vatyí ra cuenda ñuu Roma cuví ra. Ta ra Pablo catyí ra vatyí ican.

²⁸Tyicuan ta catyí comandante cuan chi ra:

—Yuhu cuaha xaan xuhun tyiyahvi ta nanduvi noo ra cuenda Roma.

Ta ra Pablo catyí ra:

—Soco yuhu ra cuenda Roma cuví nyata caqui —catyí ra.

²⁹Ta tyicuan caa ta sindaro cha cuacañi chi ra canyahá ra ta cuahán coyo ra. Ta nyacua nya comandante ta nayuhvi ra cha

cuenda cha cháhñi ra chi ra chihin cadena. [Vatyí cuatyí cuví cha sacuví ra cha tyicuan caa chihin noo ra cuenda ñuu Roma.]

Nu nanyaá ra Pablo nu candu iin ri ra Israel

³⁰Tuvi inga quivi ta comandante cuan cuñí ra coto ra ñáá cuatyí tyaá ñu Israel chaha ra Pablo. Ta ndachí ra cadena cha nuhñi ra. Ta tachí ra tyiño na ndu iin ri ra cuví nuu chi tata sutu, ta tandihí ra cuenda junta. Tyicuan ta tava ra chi ra Pablo vehe caa ta chinyaca ra chi ra nu iyó junta cuan.

23 Ta ra Pablo nyehe ra chi tandihí ra chihin cha ña cahan nuu ra, ta catyí ra chi ra:

—Nyoho ra yañi yo, nyacua nya quivi ihya iyó vahi nuu Nyoo ta ñahri cha ña vaha sacuví nuu ra —catyí ra Pablo.

²Tyicuan ta ra Ananías ra cuví nuu chi tata sutu tachí ra chi ra nyicú yatyin ri nu nyaá ra Pablo, na nacañi ra ndaha yuhu ra. ³Soco ra Pablo nacahán ra nu cahán ra ta catyí ra:

—iXihna ca chi maun cuacañi Nyoo, vatyí sahá xaun tyi ra vaha cuvún nyaún chiña! ¿atu cutuñi chii nuun tari cuhva catyí ley? ¿Ñáá tuhun cha tachun nacañi ra chii? ta ñima tyicuan caa catyí ley —catyí ra Pablo.

⁴Tyicuan ta ra canyicu yucuan catyí ra chi ra:

—Ña vaha cha cahún chi ra cuví nuu chi tata sutu cuenda Nyoo —catyí ra chi ra Pablo.

⁵Tyicuan ta ra Pablo catyí ra:

—Yañi yuhu, ña chite tatu ra cuví nuu chi tata sutu cuví ra. Vatyí

catyí tuhun Nyoo tyi ma cahan ña vaha yo siquí ra cuví tyiño ñuu yo —catyí ra.

⁶Tyicuan ta tuví iñi ra Pablo vatyí suhva ra cuenda junta cuan, yihí ra cuenda ityi ra cuví saduceo. Ta inga ra yihí ra cuenda ra cuví fariseo. Tyicuan ta cahan ra chihin cha ñihi ndusu ra ta catyí ra:

—Nyoho yañi, yuhu ra fariseo cuví tari suti. Ta cutuñí chi nuu ndo vatyí chinó iñi tyi nandotó ñu chihí —catyí ra Pablo.

⁷Cuhva cha catyí ra tuhun ihya, ra fariseo ta ra saduceo, quichaha candatuhun tahan ra suri chihin tahan maa ra, ta cacusiñ ra.

⁸Vatyí ra saduceo catyí ra vatyí ña nandotó ndiyi. Ta ni yori ángel ta ni yori tatyí ña vaha iyó catyí ra. Soco ra fariseo chinó iñi ra tandihí ihya.

⁹Tandihí ra vaa ri ca cananduví ra. Ta ndicuita ra fariseo, ra sacuahá cuenda ley ra Moisés, ta catyí ra:

—Nyehé xihna ndo, ñahri cha ña vaha sacuví ra ihya. Soco tatu noo ángel cahan chihin ra, saha yo cuenda coto vaha siquí Nyoo cahan ña vaha yo —catyí ra.

¹⁰Cha chiñí ra tuhun ihya, vaa ri ca cananduví ra. Nyacua nayuhví comandante cuan coto cahnya cuatyí ra chi ra Pablo. Yucuan chaha tachí ra tyiño na tava sindaro chi ra Pablo nu nyicú ra, ta cunanyaca ra chi ra nya cuartel.

¹¹Ta cha cuaa cuan tuví Sutu Mañi yo nuu ra Pablo ta catyí ra chi ra:

—Sanduní iñun, Pablo. Vatyí tari cahun tuhun Jerusalén ihya, tyicuan caa tucu cucahan tucun nya ñuu Roma —catyí Sutu Mañi yo chi ra Pablo.

Nu tyaá ra Israel cuhva cahñi ra chi ra Pablo

¹²Cha inga quivi, suhva ra Israel catyihí tahan ra tuhun. Catyí ra vatyí ni ma cacachi ra, ni ma coho ra nyacua nya cahñi ra chi ra Pablo. Ta nya noo ra ma sacuvi tyicuan caa na sanaa Nyoo chi ra siquí ñuhu ñáyivi, cacatyí ra. ¹³Yaha ca uvi xico ra catyihí tahan tuhun ihya nuu Nyoo. ¹⁴Chahan coyo ra nu nyicu ra cuví nuu chi tata sutu ta ra cacuví mandoñi cuenda ñu Israel. Ta catyí ra chi ra:

—Nyuhu iin ri tuhun cahan ndi nuu Nyoo vatyí ma cachi ndi ta ni ma coho ndi cha ni ri ca cha ma cahñi ndi chi ra Pablo. Ta na sanaa Nyoo chi ndi tatu ma sacuvi ndi tari cuhva catyí ndi. ¹⁵Ta vityin nyoho sacuhun ndo tuhun chi comandante. Catyí ndo chi ra na quichi nyaca ra chi ra Pablo nuu ndo ityaan. Saha ndo tuhun vatyí cuasandaa vaha ndo tyiño, ta nyuhu cuatu tuhva ri ndi nu yahá ra ta cucahñi ndi chi ra —catyí ra chi ra.

¹⁶Soco sehe cuhva ra Pablo chiñí cue cha cahan ra. Ta chahan cue chisacoto cue chi ra Pablo nya cuartel. ¹⁷Tyicuan ta ra Pablo cana ra chi minoo capitán. Ta catyí ra chi ra:

—Cuanyaca chi ra cuehe luhlu ihya nuu comandante vatyí iyó noo tuhun cuñí cue sacoto cue chi ra —catyí ra Pablo chi ra.

¹⁸Tyicuan ta chinyaca capitán cuan chi cue nuu comandante. Ta catyí ra chi ra:

—Ra Pablo cha ñohó vehe caa cana ra chii ta catyí ra chii vatyí quichi

nyaque chi ra cuehe luhlu ihya vatyí cuñí cue cahan cue chuhun — catyí ra chi ra.

¹⁹Tyicuan ta tiñ comandante ndaha ra cuehe luhlu cuan ta tava siin ra chi cue ta catyí ra chi cue: —¿Ñáá túhun cuñún catyún chii?

²⁰Ta ra cuehe luhlu cuan catyí cue chi ra:

—Ra Israel catyihí tahan vaha ra tuhun vatyí catyí ra chuun na sacuhun chi ra Pablo nu iyó junta tyaan. Vatyí casaha ri maa ra cha cuñí ra cha cutuñi vaha ca chi ra.

²¹Soco ma chino iñun chi ra vatyí yaha ca uvi xico tahan ra nyatú xehe chi ra ityi. Ta tyanaha ra chihin nuu Nyoo vatyí ma cachi ra ta ma coho ra nyacua nya cahñi ra chi ra Pablo. Ta tatu ña cuví cahñi ra chi ra, vaha taxín ca nacúvi noo noo maa ra na. Ta vityin nyatú tuhva ra coto ra ñáá cucatyí maun —catyí cue.

²²Tyicuan ta catyí comandante chi ra cuehe luhlu cuan vatyí yori chihin cahán cue tuhun cha catyí cue chi ra. Yaha cuan ta natachí ra chi cue.

Nu cacu ra Pablo ndaha ra Israel ta cuahan ra nuu ra gobernador cha nañi Félix

²³Tyicuan ta comandante cana ra chi uvi capitán, ta catyí ra chi ra: —Sanduvaha ndo chi ndo vatyí cuhun ndo Cesarea cuhva caa iñ cha cha cuaa. Cuacuhun uvi ciento sindaro chihin chaha ra, ta uñi xico uchi ra chihin caballo, ta uvi ciento ra cuiso ra lanza. ²⁴Sanduvaha ndo caballo coso ra Pablo. Ta saha cuenda vaha ndo chi ra ityi

cuahan ndo na chaa vaha ra nu nyaa ra Félix gobernador —catyí comandante chi capitán cuan.

²⁵Tyicuan ta tyaa ra noo tutu quindaha ra cuhun ra. Ta tuhun cha tyaa ra nu carta, ican cuví ihya:

²⁶“Yuhu ra Claudio Lisias sacuhin noo carta ihya chi yoho, tata gobernador Félix, vatyí vaha ñáyivi cuvun. Ihya vachi nocumi chuun.

²⁷’Ra Pablo ihya, catiñ ra Israel chi ra. Ta cacuñí ra cacahñi ra chi ra. Soco cuhva cha chite vatyí ra cuenda ñuu Roma cuví ra, chahin chihin sindaro ta sacaquí chi ra.

²⁸Ta vatyí cuñí cote ñáá cuatyí tyaá ñu siqui ra, chinyaque chi ra nu iyó junta ra cacuví mandoñi ñu Israel. ²⁹Soco cuenda ley ri maa ñu cuví. Ta cha cuenda ley yoó, ñahri cuatyí ra ta cahñi yo chi ra. Ta ni ri ña tahán chi cohon ra vehe caa. ³⁰Soco vatyí ñihí tuhun vatyí ra Israel canducu cahñi ra chi ra, yucuan chaha tachí chi ra nuu yoho. Ta catyí tiquí chi ra cha tyaá cuatyí siqui ra, na cuhun ra nu nyaun na cacan ra cuatyí ra nuu maun”, catyí ra Claudio chi ra Félix nu tutu cha tyaa ra.

³¹Tyicuan ta quehen sindaro chi ra Pablo tari cuhva catyí ra Claudio chi ra, ta chinyaca ra chi ra nya Antípatris suri maa cha cuaa cuan. ³²Cha inga quivi sindaro cha cuahan chihin chaha, canandichí coyo ra nya cuartel. Ta ra cha cayosó caballo cuahan coyo ca ra chihin ra Pablo. ³³Ta cuhva cha cha coyo ra ñuu Cesarea, cachaha ra carta cuan chi ra Félix, gobernador, ta cachaha cuenda ra chi ra Pablo chi ra ñandihí. ³⁴Cha

yahā cha sacuahā ra Félix carta cuan, quichaha ndacá tuhun ra chi ra Pablo nya ñuu ra. Ta cha chito ra vatyí ra Cilicia cuví ra ³⁵ta catyí ra chi ra:

—Na quichi xihna ra tyaá cuatyí chahun. Tyicuan ta cusandai tyiñon —catyí ra chi ra.

Tyicuan ta tachí ra tyiño na casaha cumi sindaro chi ra nya vehe tyiño cha savahā ra Herodes ta cha naha.

Nu cutuñí chi ra Pablo nuu ra Félix

24 Yahā ohon quivi ta ra Ananías, ra cuví nuu chi tata sutu, chaā ra ñuu Cesarea cuan chihin suhva ra cacuví mandoñi, ta chihin noo ra cahan chaha ñáyivi cha nañí Tértulo. Chaá coyo ra nuu ra gobernador Félix vatyí cacan ra cuatyí chaha ra Pablo. ²Tyicuan ta tachí ra Félix na quichi nyaca sindaro chi ra Pablo. Tyicuan ta quichahā chican ra Tértulo cuatyí chaha ra Pablo. Ta catyí ra chi ra Félix:

—Tyahvi nyoo chuun, tata gobernador. Vatyí taxi ri iyó ñuu ndí, ta vaha iyó ndí vatyí yindaha vahun ñuu ndí. ³Nacuhvá xaan ndí tyahvi nyoo chi yoho tata Félix, vatyí yoho, vaha ñáyivi cuvún. ⁴Soco ña cuñí sayangue chuun chihin cha cuaha tuhun cahin, yucuan chaha chiquén noo tumañi iñi chuun na cuiñun suhva tuhun cuacahan ndí. ⁵Vatyí chitó ndí tyi rayii ihya ñima ra vaha cuví ra, noo cuehe cuví ra. Ta tandihí ri ityi sanaquiquí ra chi ñu Israel. Ta ican ra cuví xiñi noo ityi ñáyivi nyicón chi ra Jesús ra ñuu Nazaret.

⁶Nyacua cuñí ra sacuvi ra noo cha ña tahán chi vatyí ña sahá ra ñáyivi vehe ñuhu cahnu. Ta nyuhu tiñi ndí chi ra, tacuhva tachi tuñi ndí chi ra tari cuhva ley maa ndí. ⁷Soco comandante Licias chasi ri ra ta chihin cuaha fuerza ta tinyaa ra chi ra chi ndí. ⁸Ta catyí ra vatyí tatu cuñí ndí cacan ndí cuatyí chaha ra, cuñí chi cha cacan ndí nuu maun. Nyēhe maun. Sannahmon chi ra ta cotton tyi ndicha cha catyí ndí —catyí ra Tértulo.

⁹Tyicuan caa tucu ra Israel cha canyicu yucuan, catyí ra vatyí ndicha tandihí tuhun cahan ra Tértulo. ¹⁰Tyicuan ta ra Félix savahā ra seña chi ra Pablo vatyí nacahan ra. Ta ra Pablo quichaha catyí ra: —Chité tyi cha cuaha xaan cuiya nyacá ñahun ñuu ihya. Ta yucuan chaha sii vavaha cuñí vatyí nuu maun cuacutuñi chi yuhu vityin. ¹¹Tatu ndaca tuhun cuacotton tyi cha iyó ri noo uchi uvi quivi cha chahin Jerusalén. Chahin yucuan vatyí sacahni chi Nyoo. ¹²Ta yori chihin cuví yuhi. Ni ña sanaquiquí chi ñáyivi chichi vehe ñuhu cahnu. Ñahri maa sacuvi, ni ri chichi vehe ñuhu, ni ri chichi ñuu. ¹³Ta cuatyí cha tyaá ra ihya siqui, ña ndicha maa. ¹⁴Soco noo cha catyí chi ndo vityin vatyí yuhu sacahni chi Nyoo cha sacahnū sutu chahni. Sacahni chi ra cuhva sañahá ra Jesucristo. Ta catyí maa ra ihya tyi ña vaha. Soco yuhu chinó iñi ndí maa tuhun cha nyaá nu libru ley cha tyaā ra Moisés. Ta chinó iñi tandihí tuhun catyāā ra profeta cuenda Nyoo ñandihí. ¹⁵Ta suri chinó iñi vatyí Nyoo cusanandoto ra ñáyivi chihí,

ñu vaha ta ñu quiñi iyó, tari chinó iñi tucu maa ra ihya. ¹⁶Ta yucuan chaha tyicuan ri nduquí cuhva cha cachi cói nuu Nyoo, ta nuu ñáyivi ñandihí.

¹⁷Cuaha cuiya chica noi inga ityi. Yahá cuan ta cuanuhí nya Jerusalén ñui vatyí nacuhva cuende xuhun chi ñu ndahvi ñu yihí cuenda Nyoo, ta vatyí cuhve noo cha cuhve chi Nyoo. ¹⁸Yuhu tyicuan caa sacuví chichi vehe ñuhu cahnu, ta suhva ra Israel ityi Asia, nyehe ra chii yucuan cha yahá cha sandundií chii nuu Nyoo cuhva catyí maa nu ley ndi. Soco ña cuaha ñáyivi nyicu, ta ni ña naquiquí ñu. ¹⁹Ican ra cha nyehe chii cuan, cuñí chi cha quichi ra ta cuhva ra cuenda tatu iyó cha sacuvi. ²⁰O ñacatyí maa ra cha canyicu ihya tatu nañihí ra cuatyí yuhu quívi cutuñí chii nuu ra nu chiyo junta ra cacuví nuu chi ñu Israel. ²¹O vasi cuví chi cha cuenda noo ri tuhun cahín chihin nuu ra nyicú junta cuan tyehe caa: “Nyoho nducú ndo cuatyí chahi cha cuenda tyi chinó iñi cha nandotó ñáyivi chihí” —catyí ra Pablo.

²²Ta ra Félix chitó vaha ra yoso caa cuahan tuhun ñu nyicón chi ra Cristo. Ta catyí ra chi ra canyicu cuan:

—Vaha ri vityin. Na quichi xihna comandante Lisias. Tyicuan ta cusandai tuhun ndo —catyí ra.

²³Tyicuan ta tachí ra Félix chi capitán na cunatyihí ra chi ra Pablo vehe caa. Soco ma ñihí xaan saha cumi ra chi ra. Ta na cuhva ra cuhun ra tahan ra nu ñohó ra, ta cahan ra chihin ra.

²⁴Yahá suhva quívi ta nachaa ra Félix inga chaha chihin cu Drusila

ñasihi ra. Ta cuví ña ñaha Israel. Ta tachí ra na quichi ra Pablo vatyí cuñí ñu tyasoho ñu yoso caa tuhun cha chinó iñi ra chi ra Jesucristo. ²⁵Ta ra Pablo cahan ra tuhun yoso caa tahán chi sacuvi yo cha vaha, yoso caa cunyaca ñaha maa yo chi yo ta ma sacuvi yo cha quiñi caa. Ta cahan tucu ra yoso caa cucutuñi chi yo nuu Nyoo quívi tahan chi. Ta ra Félix yuhví xaan ra cuví, ta catyí ra chi ra:

—Cuahan vityin. Ta na nanuña xihne, ta cana mai chuun inga chaha —catyí ra chi ra.

²⁶Ta ra Félix cuñí maa ra tyi ra Pablo cucuhva ra xuhun chi ra, tacuhva vatyí numi ri saña ra chi ra. Yucuan chaha vatyí tyito tyito ri caná ra chi ra, vatyí ndatuhun ra chihin ra. ²⁷Uvi cuiya yahá, tyicuan ta ñicunyaa ra Porcio Festo cuví ra gobernador tyiño nuu ra Felix. Ta ra Felix cuñí ra cuvaha ra nuu ra Israel ta sandoo ra chi ra Pablo vehe caa.

Nu cutuñí chi ra Pablo nuu ra Festo

25 Tyicuan ta cha cu uñi quívi cha cuví ra Festo tyiño, quita ra ñuu Cesarea cuan ta cuahan ra nya ñuu Jerusalén. ²Chaa ra Jerusalén, tyicuan ta chaa coyo ra cuví nuu chi tata sutu ta ra cuví tyiño ñu Israel ta cachican ra cuatyí chaha ra Pablo. ³Ta chican ra noo tumañi iñi cahnu chi ra Festo. Cuñí ra vatyí tachi ra Festo tyiño na quichi nyaca sindaro chi ra Pablo nya Jerusalén. Vatyí maa ra cuñí ra cahñi ra chi ra ityi vachi ri ra. ⁴Soco ra Festo nachaan ra, ta catyí ra:

—Ra Pablo ñohó ra vehe caa nya Cesarea. Ta yuhu tyái cuhva cha cunuhi yucuan cha numi ri. ⁵Yucuan chaha, nyoho cha cuví ndo tyiño ñuu ihya, cuhun maa ndo chihin. Tyicuan ta cuvi cacán ndo cuatyí chaha ra tatu iyó cha sacuví ra —catyí ra Festo chi ra.

⁶Uña o uchi ri quívi chi nyaa ra Festo Jerusalén, ta cuanuhú ra Cesarea. Ta cha inga quívi chaá ra chichi vehe tyiño ra vatyí cutuñi chi ra ca iyó cuatyí nuu ra. Tyicuan ta caná ra chi ra Pablo. ⁷Cuhva cha quihví ra Pablo, catuhvá ra Israel cha quichí coyo nya Jerusalén, ta quichahá catyaa ra cuatyí cahnu síqui ra. Soco ñahri maa cha ndaa catavá ra. ⁸Tyicuan ta cahán ra Pablo ta catyí ra:

—Yuhu ni noo cuatyí ta sacuví que, ni síqui ley ñu Israel, ni síqui vehe ñuhu cahnu Jerusalén, ni síqui rey cahnu Roma —catyí ra.

⁹Soco vatyí cuñí ra Festo ndoo vaha ra chihin ra Israel, ndacá tuhun ra chi ra Pablo:

—¿Atu cuñún cuhun Jerusalén vatyí sandaí tyiñon nyicuan? —catyí ra chi ra.

¹⁰Ta ra Pablo catyí ra:

—Cha nyaí nu maun. Ta maun cuví ra cuví tyiño cuenda rey cahnu Roma. Ihya cuví nu tahán chi cutuñi chíí, vatyí ra cuenda ñuu Roma cuví. Ta chitó vahun tyí ñahri maa sacuví chi ñu Israel. ¹¹Tatu sacuví noo cuatyí cahnu cha tahán chí cahñi ndo chii, ma nduqui cuhva caquí. Soco tatu ña ndicha tuhun cha cahán ra Israel ihya, yori cha iyó ityi chii cha cuhva cuenda chii chi ra cuñí cahñi

chii. Chiquén vatyí cuhin nuu rey cahnu vatyí cutuñi chii nuu maa ra —catyí ra Pablo chi ra Festo.

¹²Tyicuan ta ra Festo cha yaha cha cahan tahan ra chihin ra tyinyeé chi ra chihin tyiño, ta catyí ra chi ra Pablo:

—Chicón cha cutuñi chuun nuu rey cahnu. Vaha. Cua cuhun nuu maa ra —catyí ra chi ra.

Nu nacatyí ra Festo tuhun ra Pablo chi ra Agripa

¹³Yahá suhva quívi, tyicuan ta chaá rey Agripa chihin cu Berenice nya Cesarea, vatyí cuacuhva ñu nocumi chi ra Festo. ¹⁴Quita suhva quívi chinyicu ñu yucuan, ta nacatyí ra Festo tuhun ra Pablo chi rey. Ta catyí ra:

—Iyó noo rayii ihya cha sandoo ra Félix vehe caa. ¹⁵Ta cha chahin Jerusalén, ra cuví nuu chi tata sutu, ta ra cacuví mandoñi ñu Israel chahá cuenda ra noo tutu cuatyí ra, ta chicán ñu na cúvi ra. ¹⁶Ta catyí yuhu chi tandíhi ra vatyí ña tuhvá ra cuví tyiño cuenda Roma chahñi chi noo ñáyivi tatu ta cahan tahan ca ñu ta nducu ñu cuhva sacacu ñu chi ñu. ¹⁷Yucuan chaha, quívi quichi coyo ra cacuví nuu chí ñu Israel cuan, ña sacunaí cuhva. Ta cha inga quívi chahin vehe tyiño vatyí cutuñi chi ra cha cacahán ra tuhun. Ta tachí tyiño na quichi ra cuan. ¹⁸Soco ra catyaa cuatyí síqui ra, ña cuaha maa tuhun cacahán ra. Ta cuñí maa yuhu vatyí cahnu cuatyí cuatyaa ra síqui ra. ¹⁹Cuñí ra cuan cuatyí chihin ra cha cuenda tuhun costumbre, cuhva chinó iñi ñu Israel. Cahán

ra tuhun noo ra cha nañí Jesús cha chihí. Ta ra Pablo catyí ra vatyí iyó ra. ²⁰Ta ña chité yoso caa sacuvi chihin tuhun cha tyicuan caa, ta ndaca tuhun chi ra Pablo tatu cuñí ra cahun ra Jerusalén, vatyí cutuñí chi ra cuenda tuhun ihya. ²¹Soco maa ra chicán ra cha cutuñí chi ra nuu rey cahnu Augusto nya Roma. Yucuan chaha ñohó ca ra vehe caa nyacua nya cuví tachi chi ra nuu ra Augusto —catyí ra Festo chi rey Agripa.

²²Tyicuan ta ra Agripa catyí ra chi ra Festo:

—Cuñí tucu yuhu cuiñi cha cahán ra cuan —catyí ra.

Ta ra Festo catyí ra chi ra:

—Tyaan cuiñun cha cahán ra —catyí ra chi ra.

²³Tuvi inga quivi ta chaa ra Agripa chihin cu Berenice. Iyo xaan caa ñu quihvi coyo ñu chichi vehe vatyí rey cuví ñu. Quihvi tucu comandante ta ra cacuví tyiño ñuu cuan. Tyicuan ta ra Festo catyí ra na quichi ra Pablo. ²⁴Tyicuan ta quichaha catyí ra Festo:

—Yoho Rey Agripa, ta nyoho tata, cha nyicu ndo ihya. Nyehé ndo chi ra ihya. Tandihí ñu Israel ñuu Jerusalén ta ñu Cesarea cahan ñu siqui ra. Ta ña sandihí ñu cha catyí ñu chii vatyí tahán chi cúvi ra. ²⁵Soco cha cuenda yuhu ñahri cuatyí ra cha tahán chi cúvi ra. Ta suri maa ra chicán cha cutuñí chi ra nuu ra Augusto. Yucuan chaha cutachi chi ra. ²⁶Soco vatyí ñahri cuatyí ra ñihí, yucuan chaha ña ñihí tuhun tyai nu tutu cha cusacuhin chi ra nyacá ñaha chi yo. Yucuan chaha cané chi ra Pablo nuu ndo,

ta nuu yoho Rey Agripa, tacuhva tyi ndaca tuhun chi ra ta cote ñáa cha tahán chi sacote chi rey cahnu. ²⁷Vatyí ña vaha cha sacuhín chi ra tatu ñahri tuhun cahín ñáa cuatyí ra.

Nu quichaha cahán ra Pablo nuu rey Agripa

26 Tyicuan ta ra Agripa catyí ra chi ra Pablo:

—Cuví cahun vityin —catyí ra chi ra.

Ta ra Pablo sandaa ra ndaha ra ta catyí ra tyehe caa:

²—Sií xaan cuñí vatyí cuví cahun nuu yoho, rey Agripa, ta cuví catyí mai chuun yoso caa tandihí cuatyí cha tyaá ra Israel siqui. ³Vatyí, yoho chitón tandihí costumbre cha iyó chi yo ñu Israel. Ta chitón tuhun tuhva yo cuvi yuhu. Yucuan chaha chiquén chuun nacuiñi vahun cha cahín.

Nu catyí ra Pablo chi ra Agripa yoso caa ñayivi ra cha ni cumañi ca quihvi ra cuenda ra Cristo

⁴Tandihí ñu Israel chitó ñu yoso caa chiye nyata ni luhli nya ñui. Ta chitó ñu cuhva chiye nya Jerusalén. ⁵Ta suri chitó ñu vatyí nyata luhli cuví noo fariseo. Ta ra fariseo vaha xaan caquichahá ra costumbre yo. Ta na catyí maa ñu tatu ña ndicha cha cahín. ⁶Ta vityin nanyaí ihya ta cutuñí chii cha cuenda vatyí chinó ñi cha sanandotó Nyoo chi ñáyivi chihí, tari cuhva catyí ra chi sutu chahnu yo ta cha naha. ⁷Ndi uchi uvi tahan ityi ñáyivi Israel ñu vachi tata sutu chahnu yo nyatú tucu ñu nyehé ñu tyi ndicha cusanandoto

Nyoo chi ñáyivi chihí. Ta yucuan chaha nyita ri sacuví ñu tyiño nuu Nyoo sacahnu ñu chi ra ñicahñu ta cha cuaa. Vatyí suri cha cuenda tuhun ihya tyaá ra Israel cuatyí siqui vityin, yoho rey Agripa. ⁸¿O ña chinó iñi nyoho vatyí Nyoo sanandotó ra chi ñu chihí?

⁹Ta quívi cuan suri mai chica xiñi vatyí vaha cha tachi tuñi chi ñáyivi chinó iñi chi ra Jesús ra ñuu Nazaret. ¹⁰Ta tyicuan caa chinyacuví nya Jerusalén chihin ndusu yuhu ra cacuví nuu chi tata sutu. Ta cuaha ñu cha chinó iñi chi ra Cristo tyihí vehe caa. Ta tatu cachahñi ra chi ñu, vaha xaan cuñi. ¹¹Cuaha chaha sanyehí tindoho chi ñu ta sahi fuerza chi ñu nacahan ña vaha ñu siqui ra Jesús. Tyehe caa chinyacuví tandíhi ri vehe ñuhu ñu Israel. Ta xaan xaan cuñi nyehi chi ñu. Ta chica nyiquen chi ñu nyacua nya inga ñuu.

Nu nacatyí tucu ra Pablo yoso caa nanduví ra, ra cuenda ra Cristo

(Hch. 9.1-19; 22.6-16)

¹²Ta yucuan chaha cuahin quívi cuan nya ñuu Damasco chihin ndusu yuhu ra cuví nuu chi tata sutu. ¹³Soco yoho Rey, ityi cuahin ñáá cuhva ora, nyehí noo nduva ñuhu quichí andívi, ñihi ca ican saha ñuhu ñanyii. Sandundichin chi nicachico nu cuahin ta ra cuahan coyo chihin. ¹⁴Tyicuan ta tandíhi ndí nduva ndí nu ñuhú. Ta chiñi noo ndusu cha cahán chihin, chihin sahan yo hebreo, ta catyí chi chii: “Saulo, Saulo, ¿ñáá tuhun cha chicá nyicon chii? Tari noo quiti chañi nyaa ti chata cha

xaan cha saquehén ityi ra chi ti, tyicuan caa cuñún sañicuehun suri chi maun”, catyí ndusu cuan chii. ¹⁵Tyicuan ta catyí yuhu: “¿Yóó yoho tata?” Ta Sutú Mañi yo catyí ra chii: “Yuhu cuví ra Jesús, ra cha chicá nyicon chi. ¹⁶Ndicuita ta cuñanyaun, vatyí yuhu tuví nuun tacuhva vatyí cuasacuvun tyiño nui, vatyí cuacuvun cha ndaa cha nyehun vityin. Ta cucuvun cha ndaa cha nyehun chii nu cuahan ca chi. ¹⁷Cusacaqui chuun ndaha ra Israel, ta ndaha ra cha ñima ra Israel cuví. Nu nyicú ñu tachí chuun vityin. ¹⁸Vatyí na nuñon nuu ñu, ta sañahun chi ñu cha ndicha, ta ma sacuvi ca ñu cha ña vaha. Soco sacuvi ñu cha vaha nu ndichin Nyoo vatyí quita ñu chichi ndaha ra ña vaha ta ndíhvi ñu ndaha Nyoo tacuhva vatyí tyicuan caa cusahi ticahnu iñi cuatyí ñu ta cunaquehen ñu cha vaha cha chahá Nyoo chi ñáyivi yihí cuenda ra”, catyí Sutú Mañi yo chii.

¹⁹Yucuan chaha rey Agripa, sacuví cha catyí Sutú Mañi yo ra Jesucristo chii nu sañaha ra chi ra chii. ²⁰Ta cahin tuhun ra xihna ca chihin ñu nyicu ñuu Damasco. Yaha cuan ta cahin chihin ñu ñuu Jerusalén ta tandíhi ityi Judea. Ta cahin chihin ñu cha ñima ñu Israel cuví ñandíhi. Sacote chi ñu nanduví iñi ñu cuatyí ñu, ta nandíhvi ñu chichi ndaha Nyoo cha ndicha cuii. Na nasama ñu cuhva iyó ñu chihin cha sacuvi ñu cha vaha. ²¹Cha cuenda ihya catiñ ra Israel chii chichi vehe ñuhu cahnu. Ta cacuñi ra cahni ra chii. ²²Soco maa Nyoo tyinyeé chii. Ta iyó que

nya vityin. Ta cahín tuhun Nyoo chihin tandíhi ñáyivi, ñu ndahvi ta ñu tyayii. Ta ña cahín inga tuhun cha ña catyí ra Moisés ta ra profeta, vatyí cucuvi nu cuahan ca chi.

²³Vatyí catyí ra vatyí tahán chi cha cunyehe ra Cristo tindoho. Ta cha yahá cha cúvi ra, cunandoto ra. Ta ican ra cuví ra cunandoto xihna ca. Ta cusacata ra tari noo ñuhú ityi cuahan ñáyivi vatyí sacotó ra yoso caa cacu añima ñu, ñu Israel ta ñu cha ñima ñu Israel cuví —catyí ra Pablo.

Ra Pablo cuñí ra cha nachino iñi rey Agripa ta cunyicon ra chi ra Cristo

²⁴Cuhva cha catyí ra Pablo tuhun ihya, ra Festo canachaá ra, ta catyí ra:

—iLoco yoho Pablo! cha cuenda cha cuaha xaan sacuahún ta ndulocon —catyí ra Festo chi ra.

²⁵Soco ra Pablo catyí ra chi ra:

—Ña loco yuhu, yoho tata Festo. Soco cha cahín, maa maa ri tuhun ndicha cuví. ²⁶Ihya nyaá rey Agripa. Ta chitó vaha ra tuhun ihya. Yucuan chaha cahín chihin cha ña cahán nui. Vatyí chité tyi chitó tucu maa ra tuhun ihya, vatyí ñima tuhun xehe cuví. ²⁷Yoho rey Agripa, ¿atu chinó iñun tuhun cha catyaa ra profeta cuenda Nyoo ta cha naha? Yuhu chité vatyí chinó iñun —catyí ra Pablo chi ra Agripa.

²⁸Tyicuan ta ra Agripa catyí ra chi ra:

—Suhva cuui ri ca ta nachino iñi tuhun cahun ta quihvi cuenda ra Jesús —catyí rey Agripa chi ra Pablo.

²⁹Tyicuan ta ra Pablo catyí ra:

—Cuví ri suhva, o cuví ri cuaha soco chi Nyoo chiquén vatyí na nduvi ndihun ñáyivi cuenda ra Jesús tari mai. Ta ñima yoho ri, soco tandíhi ri ñáyivi, ñu chiñí tuhun cahín. Noo ri cha ña cuñí, cha quíhi cadena ndaha ndo tari mai vityin —catyí ra Pablo.

³⁰Cha yahá cha catyí ra Pablo tuhun ihya, ndicuita rey ta gobernador ta cu Berenice, ta tandíhi ra canycú yucuan. ³¹Ta cha yahá quita coyo ñu, ta cacatyí ñu chi tahan ñu:

—Ñahri cuatyí ra ihya cha ñihi xaan. Ña tahán chi cúvi ra. Ta ni ña tahán chi cohon ra vehe caa —catyí ñu.

³²Ta ra Agripa catyí ra chi ra Festo:

—Cuví saña yo chi ra, tyehe ta ñima maa ra chicán cha cutuñi chi ra nuu ra cuví rey cahnu —catyí ra.

Nu tachí ra Festo chi ra Pablo nya ñuu Roma

27 Quivi cha catyaa ra Festo ta ra Agripa cuhva tyi tachí ra chi ndi nya ñuu Roma ityi Italia, nacuhva cuenda ra chi ra Pablo ta suhva ca ra chi noo capitán cha nañi Julio. Yihí ra noo batallón sindaro, cha nañi Cuenda Ra Augusto. ²Ta cuahan tucu ra Aristarco chihin ndi ñandíhi. Ra ñuu Tesalónica cha nyaá ityi Macedonia cuví ra. Tyicuan ta quihvi ndi chichi noo barcu cha quichi ityi ñuu Adramitio ta cuhun chi ñuu cha nyicú yuhu tyañuhu ityi Asia. ³Cha inga quivi chaá ndi puerto Sidón. Ta ra Julio vaha ñáyivi cuví ra chihin ra Pablo. Ta

chaha ra cha cunyehe ra chi ra tahan ra ñuu cuan. ⁴Yaha cuan ta quita ndi Sidón ta casanda ra sahma barcu cuan ta chihin fuerza tatyí ri cuahan ndi. Ta vatyí caa tatyí siquí ndi yaha ndi chiyo xehe ca ñuhú Chipre. Vatyí ña ñihi xaan caa tatyí chiyo cuan. ⁵Yaha sava ndi tyañuhu ityi nuu Cilicia ta Panfilia, ta cha ndi noo ñuu cha nañi Mira ityi Licia. Ta noo ndi barcu cuan.

⁶Yucuan nañihí capitán cuenda sindaro nonga barcu cha quichi nya ñuu Alejandría ta cuahan chi Italia. Ta catyí capitán na quihvi ndi barcu cuan vatyí cuhun ca ndi nu cuahan ndi. ⁷Cuaha quivi chica ndi cuee ri. Ta chihin cha cuaha tindoho ta cha ndi yatyin ri ñuu Gnido. Ta cha cuenda cha ñihi xaan caá tatyí, ña chaha chi cha cuhun ndi ityi nuu, ta yaha ndi yatyin ri ñuu Salmón. Ta nacuíco ndi ityi yuhu ñuhú Creta. ⁸Nducú ndi cuhva cha cuhun ndi yuhu tyañuhu cuan ta cha ndi nu nañi Buenos Puertos yatyin ri ñuu Lasea.

⁹Cha cuaha xaan quivi yaha ta cha yica xaan nanduví cha caca noo ndi ityi nu tyañuhu. Vatyí cha yaha quivi vico ayuno nu ña chachi ñu Israel. Ta cha cuyatyin yoo vichin. Yucuan chaha ra Pablo chaha ra tuhun chi ra sacaca barcu cuan, ¹⁰ta catyí ra:

—Nyoho ra canyicú ihya, cuiñi ndo tuhun cahín. Nye hí vatyí yica xaan cuhva cuahan yo. Ta tuví iñi vatyí cuaha xaan cusacunaa yo. Cunaa barcu ta cha nyisó chi ta nyacua nya maa yo ñandihí. Vaha taxin ca nandoo yo ihya —catyí ra chi ra.

¹¹Soco capitán cuenda sindaro cuan quichaha ca ra chi ra sacacá barcu chihin chitoho barcu ta ñima ca chi ra Pablo. ¹²Ña cuví yaha ndi yoo vichin yucuan tyi ñihi xaan tuhvá caa tatyí, ta yica xaan cuenda barcu. Yucuan chaha tandihí ra ta catyí ra:

—Vaha ca cha quita yo ihya ta nducu yo cuhva cha yo nya ñuu Fenice suri ñuhú Creta ihya. Yucuan cuví noo nu vaha cunyaa barcu vatyí nyaa ñuu cuan chiyo caña ñanyii —catyí ra.

Nu ñihi xaan caá tatyí nu tyañuhu

¹³Tyicuan ta quichahá caa chiin tatyí cha quichi ityi sur. Ta cuiñí maa ra vatyí vaha xaan vatyí ñima tatyí ñihi cuví, ta cuví cuhun ra chihin barcu ra nicañi ri yuhu tyañuhu ñuhú Creta cuan. ¹⁴Ña cuaha ri chicá ra ta quichaha caa noo tatyí xaan cha quichi ityi norte. Ta tyandahá chi barcu inga ityi. ¹⁵Ta ña cuví ca cuhun ndi ityi nuu ca cha cuenda tatyí cuan. Ta saña ndaha ndi nacuhun maa barcu chihin tatyí nya ityi cuiñí maa chi. ¹⁶Ta tyandahá tatyí chi ndi ityi chiyo satyin noo ñuhú luhlu cha nañi Claudia. Ta chihin cha yíi xaan naquehen ndi lancha luhlu cha xitá quiñocho barcu, ta natyihí ndi ityi chichi barcu coto nyee chi. ¹⁷Ta cha yaha natyihí ra lancha cuan, yucuan ta chahñí vaha ra yoho nicachico barcu vatyí coo fuerza chi. Ta yuhví ra coto tahan ra nu yaxin ndutya ta quihvi barcu cuan chichi ñiti vita iyó yuhu tyañuhu nu nañi chi Sirte, yucuan chaha sanoo ra sahma barcu ta chaha

ra cha cuhun barcu yoso cuhva tyandahá tatyí. ¹⁸Ta cha inga quívi suri ñihi xaan caá tatyí. Yucuan chaha quichaha catuchi ra carga nu tyañuhu. ¹⁹Ta cha cu uñi quívi quehen ndi ndaha tyiño barcu ta tyihí ndi nu tyañuhu. ²⁰Ta cuaha quívi ña nyehe ndi ni ñanyii ta ni tiño. Ta ñihi tatyí nañi chi ndi. Yucuan chaha ña tya ca ndi cuhva cha cacu ndi.

²¹Cuaha quívi yaha ta ña chachí ndi. Tyicuan ta catyí ra Pablo chi tandihi ra:

—Nyehe ndo, vaha ca tyehe ta quichaha ndo chii quívi cuan, ta ndoo taxin yo Creta cuan. Ta vityin nyehé xaan yo tindoho ihya ta cuaha ndaha tyiño sacunaá yo. ²²Soco vityin ma caca xaan iñi ndo vatyí ni noo yo ta ma cúvi yo. Barcu ihya cuví cha cunaa. ²³Vatyí Nyoo nyacá ñaha ra chii, ta sacuví tyiño nuu ra, sanyehé ra noo visión chii cuñi. Ta tuví noo ángel nui.

²⁴Ta catyí ángel cuan chii: “Ma yuhvun, Pablo. Vatyí cuñi chi cha cahun tuhun Nyoo nuu rey cahnu Augusto nya Roma. Ta cha cuendon cusacacu Nyoo tandihi ra canyicu chuhun chichi barcu”, catyí ángel cuan chii. ²⁵Yucuan chaha nyoho cha ñohó ndo chichi barcu, sanii ndo iñi ndo. Vatyí yuhu chinó iñi chi Nyoo. Ta chitó vahi vatyí cuvi tari cuhva catyí ángel cuan chii.

²⁶Vasi cuanyee barcu soco cuachaa yo noo ñuhú luhlu —catyí ra Pablo chi tandihi ndi.

²⁷Noo cha cuaa quívi ndihi chahun quívi chica ityi ndi nu tyañuhu, ñohó ndi nu tyañuhu Adria. Ta chata cuan chata ihya

tyandahá tatyí chi barcu ndi nu tyañuhu. Ta vasi ora ñuu cuví cuhva cuan ta tuví iñi ra sacacá barcu cuan tyi cuachaa ndi noo ñuhú. ²⁸Tyicuan ta tyicuhva ra cha cono ndutya. Ta nyehe ra tyi oco chahun iñi tahan metro iyó. Cuahan ndi chiin ca ityi nuu ca. Ta tyicuhva tucu ra inga chaha. Ta iyó oco ucha metro. ²⁹Ta cayuhví ra coto nañi barcu cuan chata yuu. Yucuan chaha casanoo ra cumi tahan caa vee cha nyaa gancho nuu, ityi chata barcu. Ta ña iñi ca ra cha cundichin. ³⁰Ta ra sacacá barcu cuan catyaa ra cuhva cacono xehe ra. Ta yucuan chaha quichaha casanoo ra lancha cuan nu ndutya ityi nuu barcu cuan. Ta sahá ri maa ra tyi inga caa casanoo ra. ³¹Soco ra Pablo sacoto ra chi capitán ta chi sindaro ta catyí ra:

—Tatu ma ndoo ra cuan chichi barcu. Nyoho ma cuvi cacu ndo —catyí ra chi ra.

³²Tyicuan ta sindaro cachahnya ra yoho lancha. Ta casanacava ra nu ndutya. ³³Ta cha ñaa ca cuan ra Pablo catyí ra chi tandihi ra:

—Cha iyó uchi cumi quívi cha ta cachi ca yo. ³⁴Catyí chi ndo, na cachi yo vityin. Niñi xaan cuñi chi cha cachi yo ta ndunye coño ñuhu yo. Vatyí cucacu yo ta ni noo ixi xiñi yo ta ma cunaa.

³⁵Ta cha catyí ra tuhun ihya, ra Pablo quehen ra noo pan ta nacuhva ra tyahvi nyoo chi Nyoo nuu tandihi ra. Tyicuan ta tahví ra ta quichaha chachi ra. ³⁶Tyicuan ta tandihi ca ra candunii ca iñi ra ta cachachi ra ñandihí. ³⁷Ta cha tandihi ndi cha ñohó ndi chichi barcu cuan, quita

uvi ciento uñi xico chahun ífn tahan ñáyivi. ³⁸Cuhva cha ndihi ca chachi ra ta tuchi ra yitin cha yihí trigu nu tyañuhu na nduñahma ca barcu.

Nu nyeé barcu

³⁹Yaha cuan ta cundichin. Ta canyehe ra cha sacacá barcu noo ñuhú, soco ña canicohon nuu ra nya cuví cuan. Nyehe ra noo nu iyó ñiti. Ta catyaa ra cuhva nyehe ra tatu cuví sacuhun ra barcu yucuan. ⁴⁰Cachahnya ra yoho cha nuñí caa vee cuan. Ta sandoo ra chichi tyañuhu. Ta casandutaya ra vitu cha sanacuico barcu. Tyicuan ta casandaq ra sahma cha tuhvá chitacaá ityi nuu barcu. Ta quichaha quehen tatyí sahma cuan, ta sacuhún chi barcu nya nu iyó ñiti cuan. ⁴¹Ta chaq barcu cuan noo nu nañi tahan ndutya. Ta nyee xiñi chi chichi ñiti. Ta ña cuví ca natava ra. Ta suhva ca cha ña quihvi chichi ñiti, ñihi xaan cañí tyañuhu chi chi, nyacua tahví cuatyí chi. ⁴²Tyicuan ta sindaro cacuñí ra cahñi ra chi ndii cuii maa ra cuahan cuacutuñi chi nuu ra cuví rey cahnu, coto cacono ra. ⁴³Soco capitán sindaro cuñí ra sacacu ra chi ra Pablo. Yucuan chaha ña chaha ra cahñi ra chi ra, soco catyí ra vatyí nya ra cachitó sutya, na cahun cuee ra nu ndutya ta quita ra nya ñuhú ityi. ⁴⁴Ta tandihí ca ra cha ña cacuví sutya, na quehen ra vitu cha nyisó barcu, ta suhva ra chihin yiquín vitu barcu cha tahví tyañuhu. Ta tyicuan caa cacacu tandihí ndi ta quita ndi ñuhú ityi.

Nu ñohó ra Pablo ñuhú Malta

28 Cuhva cha cha yaha cacu ndi ta catyí ñáyivi iyó

ñuhú cuan vatyí nu nyaá ndi nañí chi Malta, o Melita. ²Ta vaha xaan tyiñuhu ñu chi ndi. Ta sanatahan ñu ñuhu vatyí coón savi ta vichin xaan. Ta catyí ñu chi tandihí ndi, natuhva ndi yuhu ñuhu cuan natava ndi cha vichin ndi. ³Tyicuan ta ra Pablo naquehen ra suhva nducu tyihí ra nu ñuhu. Ta noo coo quita chichi nducu cuan, cha cuenda cha ihñi. Ta chachi yihí ti ndaha ra Pablo ta ndoo ti tacaq ti ndaha ra. ⁴Cuhva cha canyehe ñáyivi ñuhú cuan tyi tacaá coo cuan ndaha ra, quichaha catyí ñu chi tahan ñu:

—Ra ihya vasi noo ra chahñi ñáyivi cuví ra, vatyí vasi cacu ra nu tyañuhu soco ña chahá Nyoo cha coo ca ra cha cuenda cuatyí ra —catyí ñu.

⁵Soco ra Pablo naquisi ra chi coo cuan, ta canacava ti nu ñuhú, ta ñahri cuví chi ra. ⁶Tandihí ñu nyatú ñu ñáá cuhva ndaa nu tyaa ti, o ñáá cuhva cúvi ra. Soco cha yaha nyatu xaan ñu, ta nyehe ñu vatyí ñahri maa cuví chi ra. Tyicuan ta nasama ñu cuhva chicá xiñi ñu, ta quichaha catyí ñu:

—Minoo nyoo cuví ra —catyí ñu.

⁷Yatyin ri cuan nyaá ñuhú ra cha cuví nuu ñuhú cuan. Publio nañí ra. Ta vaha xaan cahñan ra chihin ndi. Ta tyiñuhu xaan ra chi ndi, ndoo ndi vehe ra uñi quivi. ⁸Ta cuhví xaan sutu ra chihin cahñi ta cha chiyó ra. Ta ra Pablo chahan ra chinyehe ra nu catuví ra. Ta chican tahví ra chaha ra. Ta tyiso ra ndaha ra siqui ra ta nduvaha ra. ⁹Yaha cuan ta quichaha caquichí tucu inga ñu cuhví cha iyó nuu cuan.

Ta nduvahā tucu ñu. ¹⁰Ta tandihi ñu tyiñuhū xaan ñu chi ndi. Ta quivi quihvi ndi chichi barcu cha cuacuhun ndi, chahā ñu tandihi cha cuchinūhu chi ndi ityi cuhun ndi.

Nu chaq ra Pablo ñuu Roma

¹¹Uñi yoo ñohō ndi Malta cuan. Tyicuan ta ñihī ndi noo barcu cha quichi nya ñuu Alejandría ityi Egipto. Ta ndoq chi Malta nya yaha yoo vichin. Ta nyaa noo cha natava ñu, noo xiñahñu nyoo Cástor ta nyoo Pólux, xiñi chi. Quihvi ndi barcu cuan ta cuahan ndi. ¹²Ta chaq ndi ñuu Siracusa. Ta yucuan ndoq ndi uñi quivi. ¹³Ta yucuan ta quitā ndi ta cuahan ndi ityi yuhu tyañuhu nyacua nya chaq ndi ñuu Regio. Ta cha inga quivi cuan caa xaan tatyī cha quichi ityi sur ta chica ndi uvi quivi ta chaq ndi ñuu Puteoli. ¹⁴Yucuan ñihj tahan ndi chihin suhva ra hermano. Ta catyī ra chi ndi cha ndoó ndi noo vitya chihin ra. Yaha cuan ta quitā ndi ta cuahan ndi nya ñuu Roma. ¹⁵Ta ñu yihí cuenda Nyoo ñuu Roma cuan ñihj ñu tuhun tyi cua chaa ndi. Ta chahān coyo ñu chisatahān ñu chi ndi ityi. Suhva ñu nyatú ñu chi ndi Nuyahví Apio. Ta inga ñu ñihj tahan ñu chihin ndi nya nu nañi Tres Tabernas. Ta cha nanyehē ra Pablo chi ñu, nacuhvā ra tyahvi nyoo chi Nyoo. Ta nduniī ca iñi ra. ¹⁶Cuhva cha chaq ndi Roma cuan, capitán cuan nacuhvā cuenda ra chi ra ca iyó cuatyī cuan chi noo ra cuvī nuu chi ra sahá cumi vehe caa. Ta chahā ra cuan cha coo siin ra Pablo. Ta noo ri sindaro sahá cumi chi ra.

Nu cahán ra Pablo tuhun

Nyoo ñuu Roma

¹⁷Uñi quivi cha yaha chaa ndi yucuan. Tyicuan ta tachī ra Pablo tyiño naquichí coyo ra cacuvī nuu cuenda ñayivi Israel cha iyó ñuu Roma cuan. Ta cuhva cha ndu iin ri ra, quichaha catyī ra chi ra:

—Nyoho yañi, vasi ñahri sacuvi chi ñu Israel tahan yo, ta ni ñahri sacuvi siqui costumbre sutu chahnu yo, soco chahā cuenda ra Israel chii chi ra ñuu Roma. Ta ñohi vehe caa Jerusalén ndaha ra ñuu Roma. ¹⁸Ta cha cutuñī chi, ta cuñī ra nyacá ñaha casaña ra chii. Vatyī ñahri cuatyī cha cahnu cha tahán chi cuvī. ¹⁹Soco cha cuenda cha nduxaán xaan ra Israel siqui, chican taxin cha cutuñi chii nuu maa rey cahnu. Vasi ñahri cuatyī cuacaquen siqui ñu ñui nuu ra. ²⁰Yucuan chaha canē chi nyoho vatyī cohon nui chi ndo, ta sacoté chi ndo vatyī nuhñí yuhu chihin cadena vityin cha cuenda cha yihí iñi yo, ñu Israel, chi Nyoo —catyī ra Pablo.

²¹Tyicuan ta catyī ra Israel chi ra Pablo:

—Ña chitó maa ndi tuhun yoho. Ta yori casacotō chi ndi, ni chihin carta, ta ni ta yori ca quichj ityi Judea sacoto cha caun, o cahān ña vaha ñu sicun. ²²Soco cuñī ndi cuiñi ndi tuhun chicá xiñi yoho. Vatyī chitó ndi vatyī tandihi ri ityi cahán ña vaha ñáyivi siqui tuhun chaa ihya —catyī ra Israel chi ra Pablo.

²³Tyicuan ta catyihj tahan ra tuhun nya quivi quichi coyo ra

inga chaha. Ta cha chaꞗ quivi cuan, chaꞗ coyo cuaha ñáyivi nu iyó ra Pablo. Ta nya ñaha ri ta nya cha cuaa cahán ra Pablo tuhun yoso caa nyacá ñaha Nyoo ánimo yo. Ta chihin ley ra Moisés ta tuhun cha catyaꞗ ra profeta Nyoo ta cha naha, sañahá ra chi ñu vatyí ra Jesús cuví ra cha sacacú chi yo, vatyí cuñi ra tyi nachino iñi ñu chi ra. ²⁴Yihí ñu chinó iñi ñu cha catyí ra Pablo. Ta inga ñu ña chinó iñi ñu. ²⁵Ta vatyí ña iin ri chino iñi ñu ta siin siin tuhun cahán ñu, ta quichahꞗ cuahan coyo ñu. Ta ra Pablo catyí ra chi ñu:

—Ndicha xaan cha catyí Tatyí li chi sutu chahnu yo chihin yuhu ra profeta Isaías ta cha naha. Vatyí catyí ra tyehe caa:

²⁶Cuahan ta catyí chi ñáyivi ihya tyehe caa:

Nyoho cucuiñi ndo tuhun Nyoo.

Soco ma cutuñi iñi ndo.

Ta cunyehe ndo chihin chiti nuu ndo cha sacuví Nyoo.

Ta ma tuvi iñi ndo.

Tyicuan caa catyí chi ñu.

²⁷Vatyí ánimo ñu cha ndundavaꞗ xaan.

Ta chiñí ri maa ñu tuhun Nyoo. Ta natahán chiti nuu ñu, tacuhva cha ma cuvi nyehe ñu. Ta nicunyasí soho ñu.

Yucuan chaha ña chiñí ñu, ta ndundavaꞗ ánimo ñu.

Yucuan chaha ña cuñí ñu quihvi ñu chichi ndahi na sanduvahi chi ñu, catyí Tatyí li chihin yuhu ra Isaías ta cha naha.

²⁸Coto vaha nyoho vatyí vityin ta ityi nuu ca cuhin cusacote chi ñu cha ñima ñu Israel cuví vatyí sacacú Nyoo chi ñu. Ta maa ñu cuatyasoho ñu, —catyí ra Pablo chi ñu.

²⁹Cuhva cha catyí ra Pablo tyehe caa, ra Israel cuahan coyo ra suri cuví yuhu ra chihin ra tahan ra tuhun cha cahan ra Pablo chihin ra.

³⁰Uvi cuiya nanií ndoꞗ ra Pablo vehe nu nyaá ra cuenda yoo ñuu Roma cuan. Ta vaha cahán ra chihin tandihí ñu chahan vehe ra.

³¹Ta chihin cha nii iñi ra ta cahan ra tuhun yoso caa nyacá ñaha Nyoo ánimo yo. Ta sañahá ra tuhun Sutu Mañi yo ra Jesucristo. Ta yori chasí cha cahán ra.